


Kuyantika 4

Luzingu ya Izaki ti Yakobi

(Mukanda ya Kuyantika, Kapu-21-35)

Baleso 13



Des 'Ministères pour Chaque Enfant'
ecmafrica@ecmafrica.org

KUYANTIKA 4—Luzingu ya Izaki ti Yakobi

(Baleso 13—3 mois)

Kuyantika kapu 21—35

72. Bo kulaka Ismaeli sambu yandi sekaka Yakobi. Kuyantika 21 :1-21

73. Nzambi lombaka Abrahama kupesa mwana na yandi Izaki bonso makabu na Yandi. Kuyantika 22 :1-18

74. Izaki kwelaka Rebeka. Kuyantika 24 :1-67

75. Rebeka butaka mapasa Ezau ti Yakobi, ti Yakobi yibaka Ezau ya kimbuta na yandi. Kuyantika 25 :20-34

76. Izaki tubaka luvunu—bonso tata na yandi salaka ntete. Kuyantika 26 :1-14

77. Izaki zolaka ve kunwanina banto ya masa. Kuyantika 26 :12-25

78. Na nzila ya luvunu, Izaki yiba Ezau ya lusakumunu ya tata. Kuyantika 27 :1-41

79. Yakobi monaka kimatinu me katuka na zulu tii na ntoto. Kuyantika 28 :10-22

80. Yakobi solaka Rashele kuvanda nkento na yandi. Kuyantika 29 :1-30

81. Yakobi butaka bana ya bakala 12, bo yelaka, bo kumaka makanda 12 ya Israele. Kuyantika 29 :31—30 :25

82. Yakobi ti Ezau wakanaka diaka.

Kuyantika 33 :1-17

83. Yakobi twadisaka fami na yandi kuzika biteki; Nzambi pesaka yandi zina ya mpa Israele. Kuyantika 35 :1-20, 27-29

84. REVISIO YA LUZINGU YA IZAKI TI YAKOBI

Moniteur, tangila bana na ntwala kuyantika kimvuka ya baleso yai :

Na malongi beto me mona na mukanda ya Kuyantika tii ntangu yai, Beto monaka mambu ya nene yai :

- 1) Nzambi gangaka bima yonso mbote, Yandi salaka mpi bambuta na beto ya ntete, bakala ti nkento, na kifwani na Yandi, ti pesaka bo kiyeka kuyala ntoto.
- 2) Bibuti na beto ya ntete, ntete bo tambulaka na kintwadi ti Nzambi, kansi na nima ya ntangu fioti, bo solaka mpila na bo mosi, yo yina, bo bwaka na masumu.
- 3) Ntoto fulukaka na masumu tii ntangu ya Nzambi kufwaka bo yonso na masa ya nene ya fulukaka na zulu ya bangumba ya nene-nene. Kaka Nzambi gulusaka bantu 8 ya fami ya Noe ti bambisi zole-zole, na bwatu mosi special.
- 4) Nzambi songaka bantu kufulusa ntoto ya mvimba, kansi bo zolaka kukangama na sika mosi, kutunga nzo ya bisambu sambu bo kumonika nene. Yo yina, Nzambi panzaka bo ti pesaka bo bandinga mingi.
- 5) Bana tatu ya Noe kumaka bambuta ya bansi mingi—Yafeti mbuta ya bantu na Europa, Kami mbuta ya bantu ya Afrika ti ndambu ya Orient, ti Semi mbuta ya bantu na Orient.
- 6) Nzambi solaka muntu mosi Abrami, ya fami ya Semi, kukuma tata ya lukwikiku ti kupesa beto Biblia, Ndinga ya Nzambi. Na fami yina, Nzambi ta pesa mpi Mvulusi-Mesia ya ta gulusa bantu ya ntoto ya mvimba.
- 7) Nzambi silaka Abrami mwana, kansi Abrami kumaka mbuta kukonda Sarai, nkento na yandi, kubuta. Yo yina, Sarai bendaka Abrami kulala na sielo na yandi zina ya Agare. Abrami salaka mpidina, ebuna mwana ya bakala butamaka zina ya Ismaeli.
- 8) Na nima, Nzambi lungisaka yina ya Yandi silaka Abrahami. Sarai, nkento na yandi, butaka mwana ya bakala zina ya Izaki.

Yai yonso me luta na Mikanda ya Kuyantika 1 tii na 3. Ntangu yai, beto landa diaka histoire na beto.....

Leso 72. Bo kulaka Ismaeli sambu yandi sekaka Yakobi.

Kuyantika 21 :1-21

Kikuma ya Leso : Na nsuka ya leso yai, bana ta bakisa nde kuseka to kufinga muntu ya nkaka, yo ikele mbi mosi ya nene ya ke nata makambo na luzingu na beto.

Nti ya dilongi ya Nzambi : Kuzaba nde na lukanu ya Nzambi, Izaki vandaka mwana ya Yandi solaka sambu na kupesa beto Bible ti Mvulusi. Ata mpila yina, Nzambi songaka luzolo ti mawa na Ismaeli mpi, bonso Yandi ke songaka na bantu yonso.

Bankunga ya kwenda nzila mosi ti leso yai :

[Moniteur, bankunga yai yonso lenda monika na mukanda ya MCE, « Bankunga ya Ecodim, Edition]

Beto Zolana

Kwenda Nord, Kwenda Sud

Nto Mosi

O Keba Maboko (Kufinga Ve)

Yesu Zola Bana Yonso

Nzambi, Tunga Dibundu na Nge (Vs. 2)

Zola!

Verse ya kulonguka :

(Munoko) 9 Beto ke sadilaka yo sambu na kupesa mersi na Mfumu Nzambi, Tata na beto, kansi beto ke sadilaka yo mpi na kusinga bantu yina ya Nzambi salaka na kifwanisu na Yandi.

10 Kaka na kima mosi yai munoko bantu ke pesaka mersi ti ke singaka bantu ya nkaka. Bampangi na mono, mambu yina lunga vanda mpidina ve.

11 Nto mosi ya masa yo lenda basisa ve masa ya mbote ti masa ya mbi.

Yakobi 3 :9-11

[Moniteur, NB: nkunga Nto Mosi me katuka na baverse yai, nkutu vs. 11.]

Kuyantika Leso:

Tobi vandaka mwana ya vandaka na kiese mingi ve. Tata ti mama na yandi, bo vandaka ve mbote na nzo na yandi. Tobi yindulaka nde bo mpi zolaka yandi ve. Na ntima, yandi monaka kaka mawa.

Yo yina, Tobi zolaka kuyangisa bana ya nkaka, nkutu bo ya vandaka ve nene bonso yandi, to bo ya vandaka ndambu luswaswanu ti bantu ya nkaka. Yandi sosaka konso mpila kupesa bo mpasi, ti yandi fingaka bo na bazina mingi. Na français bo ke binga muntu bonso yandi « un tyran » ou « un brutal. » Kikuma na yandi kaka kupesa mpasi na bantu ya nkaka.

Keti nge banza nde Tobi vandaka na banduku mingi ? (Ikele ve.) Nki nge banza Nzambi ke yindula sambu na muntu bonso Tobi ? (Ee, Nzambi ke na kiese ve na mambu mutindu yina.)

Ata nge kuvanda ve bonso Tobi, keti nge me me fingaka bantu ya nkaka? Keti nge mpi me sekaka bo na mpila ya mbi? Bubuyai beto ta mona nki mutindu mwana mosi fingaka leki na yandi, ti nki landaka mambu yina—ya kiese, to ya kiese ve.

Beto ke tanga na mukanda ya ntete ya Bible—mukanda ya Kuyantika. Beto yantika kutanga na kapu 21, verse ya ntete.

Malongi ya nene ya lesa na bandambu 7 :

72.1 Sara ti Abrahami, bo butaka Izaki bonso Nzambi silaka bo. Ntangu yandi yelaka, bo saladilaka yandi fete ya nene ntangu yandi manisaka kunwa mabele.

[Moniteur, NB: Ee, beto monaka mambu yai na lesa ya nsuka ya Kuyantika II, kansi beto ke vutuka na yo diaka, sambu yo kele mfunu.]

Kutanga: Kuyantika 21 :1-3, 5, 8

- 1 *Mfumu Nzambi yindulaka Sara mutindu Yandi silaka.*
- 2 *Sara bakaka divumu, ebuna yandi butilaka Abrahami mwana ya bakala ntangu Abrahami vandaka me nuna ka yandi. Mwana butukaka na ngonda yina ya Nzambi tubaka.*
- 3 *Abrahami pesaka mwana na yandi zina Izaki.*
- 5 *Abrahami vandaka me kuma bamvula nkama ntangu Izaki butukaka.*
- 8 *Izaka yelaka. Ebuna kilumbu ya yandi bikaka kunwa mabele, Abrahami salaka fete ya nene.*

Kuyula bana:

- Nki mutindu lubutuku ya Izaki vandaka mambu ya nene?
(Nzambi silaka yandi ti Sara bana ntama, kansi Yandi lungiska yo kaka na nima bo me nuna ngolo.)
- Sambu na nki bo sadilaka Izaki fete?
(Sambu yandi manisaka kunwa mabele. Na kati ya Bayuda, yai ta vanda na ntangu mwana me lungisa kiteso ya bamvula 3 to 5.)

Bana lenda sala kusonga nki me salama :

Babakala sala bageste bonso bo kele Abrahami, bankento bonso bo kele Sara, ke binga banduku ti bampangi na kiese yonso kukwisa na fete ya Izaki.

Bana kuyimba :

Izaki butukaka kaka bonso Nzambi me sila. Kiese!
Bo sadilaka yandi fete mosi ya nene. Kiese!

72.2. Lumbu mosi mbuta na yandi Ismaeli vandaka kuseka Izaki, ti mama Sara monaka yo.

Kutanga : Kuyantika 21 :9-10a

9 Kilumbu mosi Ismaeli, mwana yina ya Abrahami butaka na Agare muntu ya Ezipte, vandaka kusakana na Izaki, mwana ya Sara.

10a Ntangu Sara monaka bo, . . .

Kuyula bana :

- Mbuta ya Izaki zina ya Ismaeli, yandi vandaka nani ?

(Mwana ya Abrahami butaka na Agare, muntu ya Ezipte. Agare vandaka sielo ya Sara. Ntangu Abrahami ti Sara me buta ve, Sara lombaka Abrahami kubuta mwana ti sielo na yandi Agare. Abrahami salaka bonso Sara lombaka, ti mwana ya butamaka vandaka Ismaeli. Yandi ta vanda kiteso ya bamvula 14 to 16 ntangu Izaki butukaka, ti kiteso ya 17 to 19 ntangu bo salaka fete ya Izaki.)

- Ismaeli vandaka kusala nki ti Izaki?

(Kusakana. Kusakana lenda vanda mbote to mbi, kansi beto bakisa nde mpila yandi sakanaka vandaka mbi sambu na mpila ya Sara monaka yo. Yandi vandaka kusakana bonso kuseka, kufinga, to kuvwenza mpangi na yandi.)

- Ismaeli vandaka mbuta. Izaki vandaka leki. Keti yo kele mbote bambuta kuseka baleki na bo?

(Ikele ve. Bambua kele kuluta ngolo ti baleki. Bo fweti keba bo, longa bo, ti sadisa bo, kansi kuseka bo ve.)

Bana lenda sala sambu na kusonga nki me salama :

Bana yonso tuba na mpila ritimika:

Mbuta Ismaeli sekaka leki.

Kuseka mpidina, Nzambi tala yo mbi.

Bana kuyimba:

Yimba nkunga "Nto Mosi".

72.3. Sara vandaka na kiese ve na mambu yandi monaka; nswalu yandi lombaka Abrahami kukula Ismaeli ti mama na yandi.

Kutanga: Kuyantika 21 :10b

10b . . . Yandi (Sara) songaka Abrahami nde : « Kula mpika yai ya nkento ti mwana na yandi. Mwana ya mpika yai lenda baka ve ata ndambu ya fioti ya kimvwama na nge yina ya mwana na mono Izaki ta baka. »

Kuyula bana :

- Sara monaka kuseka yina nki mutindu—kiese to kiese ve ?
(Kiese ve ata fioti.)
- Sara lombaka Abrahami kusala nki na Ismaeli ?
(Yandi lombaka Abrahami kukula yandi, ti mama na yandi.)
- Nki raison Sara pesaka nde Abrahami fweti kula bo ?
(Ismaeli vandaka mwana ya mpika, yo yina yandi lenda ve baka kimvwama ya fami.)
- Nani fweti baka kimvwama yina ?
(Mwana na bo ya makwela, Izaki.)

Bana lenda sala kusonga nki me salama :

Bana bankento sala bageste bonso bo kele Sara ke songa Abrahami kukula Ismaeli. Na nima, bana babakala sala bageste bonso bo kele Abrahami, ke wa ndinga ya Sara na mawa.

Bana lenda kuyimba :

Mawa ! Ai-yai, Mawa ! Sara zolaka kukula bo.

Kaka sambu yandi sekaka leke ! Mawa ! Mawa!

72.4. Abrahami monaka mambu yina mpasi, sambu Ismaeli vandaka mwana na yandi. Kansi Nzambi songaka yandi kusala yo, ti Yandi silaka kusakumuna mpi Ismaeli. Tala mpasi yai yonso kotaka kaka sambu Ismaeli sekaka leki na yandi !

Kutanga : Kuyantika 21 : 11-13

11 Mambu yai pesaka Abrahami mpasi mingi na ntima sambu Ismaeli mpi vandaka mwana na yandi.

12 Kansi Nzambi tubaka na Abrahami nde: "Kumona mpasi ve sambu na mwana yai ti mama na yandi Agare. Sala konso mambu ya Sara ke songa nge, sambu Izaki muntu ta butila nge dikanda ya bantu mutindu Mono me tubaka.

13 Mono ta pesa mpi bana mingi na mwana ya mpika yai, ebuna bo mpi ta kuma dikanda ya nene ya bantu, sambu Ismaeli yandi mpi kele mwana na nge."

Kuyula bana :

- Sambu na nki Abrahami monaka mawa nde yandi fweti kula Isamaeli ?
(Sambu Ismaeli vandaka mwana na yandi.)
- Nani songaka Abrahami kusala yina ya Sara tubaka?

(Nzambi.)

- Nzambi songaka Abrahami nde Yandi ta sala nki sambu na Ismaeli ?
(Yandi ta kitula yandi dikanda ya bantu mpi. Yandi ta pesa yandi bana mingi.)
- Sambu na nki Nzambi ta sala mpidina ?
(Sambu Ismaeli mpi vandaka mwana ya Abrahami.)

Bana lenda sala kusonga nki me salama :

Bana zole sala mwa-theatre kusonga mambu yai. Mosi sala bageste bonso Abrahami, ke songa mawa mingi sambu na kukwenda ya Ismaeli. Mwana ya nkaka sala bageste bonso Nzambi, ke konsole yandi.

Bana kuyimba :

Ismaeli fweti kwenda, kansi Nzambi bikisaka yandi ve.

72.5. Na suka, Abrahami pesaka Agare ti Ismaeli madia ti masa, ti songaka bo kukwenda. Ebuna bo kwendaka kuyungana na ntoto ya zelo na zelo. Tala kukabana yai yonso landaka sambu Ismaeli sekaka leki na yandi Izaki!

Kutanga: Kuyantika 21 :14

14 Na suka-suka yonso Abrahami pesaka Agare ndambu ya madia ti dibungu ya kufulukana na masa. Abrahami bakaka mwana, yandi tulaka yandi na mukongo ya Agare. Ebuna yandi songaka bo na kwenda. Agare katukaka pana, yandi kwendaka kuyungana na ntoto ya zelo na zelo ya Beresheba.

[Tala, na français yo ke tuba nde yo vandaka madia ti masa ya Abrahami tulaka na mukongo ya Agare. Beto yindula nde Ismaeli na ntangu yina ta vanda na bamvula 17 to 19, yo yina, yo ta vanda mpasi nde Abrahami kutula yandi na mukongo ya Agare bonso mwana ya fioti.]

Kuyula bana:

- Nki ntangu Abrahami kulaka Ismaeli?
(Lumbu na nima Sara ti Nzambi me songa yandi kusala yo, na suka-suka yonso.)
- Yandi pesaka bo nki ntangu bo basikaka?
(Ndambu ya madia ti dibungu ya masa.)
- Nani kwendaka?
(Mama Agare ti mwana na yandi Ismaeli)
- Yandi kwendaka wapi?
(Kisika ve. Kaka kuyungana na sika ya zelo na zelo.)
- Yo kele kiesse to mawa kukwenda, kansi nge ke kwenda ve na sika, nge ke kwenda

kaka na kuyungana ?

(Kiese ve ata fioti.)

Bana lenda sala kusonga nki me salama :

Bana yonso tambula na bacercle bonso bo kele kuyungana na sika ya zelo na zelo.

Bana kuyimba:

Bo kulaka Agare, o mawa, o mawa !

Bo kulaka Ismaeli, o mawa, o mawa !

Kukwenda kaka na kuyungana, o mawa, o mawa!

72.6. Ntangu masa manaka na dibungu, Agare dilaka sambu yandi yindulaka nde bo fweti kufwa, kansi Nzambi sadisaka bo.

Kutanga : Kuyantika 21 :15-19

15 Ntangu masa kumanaka na dibungu, Agare bikisaka mwana na nsi ya mwa-nti mosi,

16 Ebuna yandi kwendaka kuvanda mwa-ntama fioti na nzila. Yandi tubaka nde : « Mono zola ve kumona mutindu mwana ke fwa.» Ntangu yai Agare yantikaka kudila.»

17 Nzambi waka mutindu mwana vandaka kudila. Agare waka ndinga ya wanzio ya Nzambi ke binga yandi na zulu nde: "Agare, nki mambu? Kumona boma ve. Nzambi me wa mutindu mwana ke dila.

18 Telama, kwenda kubaka mwana na nge sambu yandi bika kudila. Mono ta pesa Yandi dikanda mosi ya nene ya bantu. »

19 Ntangu yai Nzambi kangulaka meso ya Agare, ebuna yandi monaka dibulu mosi ya masa. Yandi kwendaka kufulusa masa na dibungu, yandi kwisaka kupesa mwana ndambu.

Kuyula bana :

- Sambu na nki Agare banzaka nde Ismaeli fweti kufwa ?
(Sambu masa manaka na dibungu ya masa. Muntu lenda zinga ntangu mingi ve kukonda masa, nkutu na sika ya zelo na zelo.)
- Nani waka kudila ya mwana Ismaeli ?
(Nzambi waka kudila na yandi. Yo yina Nzambi tindaka wanzio sambu na kusadisa yandi.)
- Ntangu yina, Nzambi kangulaka meso ya Agare sambu yandi kumona nki ?
(Dibulu to nto ya masa.)

Bana lenda sala sambu na kusonga nki me salama :

Bana yonso dila mutindu bo banza Ismaeli dilaka. Mwana mosi sala bageste bonso Nzambi, kukangula meso ya mwana nkento mosi, Agare. Agare mona masa, bo yonso kunwa bonso bo ke na nzala ya nene. Na nima, Agare sala bonso yandi ke fulusa dibungu na yandi.

Bana kuyimba:

Ata Ismaeli me sadila Izaki mbi,
Nzambi wilaka yandi mawa.
Yandi songaka mama masa.

72.7. Nzambi mpi sadisaka Ismaeli na kuyela na yandi.

Kutanga : Kuyantika 21 :20-21

20 Mwana yelaka ; yandi vandaka kuzinga na ntoto ya zelo na zelo ya Parani. Kisalu na yandi kufwa bambisi na bunduki ya tolotolo. Nzambi vandaka na yandi.

21 Mama na yandi bakilaka yandi nkento na nsi ya Ezipte.

Kuyula bana :

- Na mawa ya Nzambi, Ismaeli fwaka to yandi zingaka ?
(Yandi zingaka.)
- Nki kisalu ya Ismaeli ?
(Kufwa bambisi ti bunduki ya tolotolo.)
- Ntangu yandi me yela, mama bakilaka yandi nkento wapi ?
(Na nsi ya Ezipte, nsi mosi na Afrika. Mama na yandi mpi vandaka muntu ya Ezipte.)

Bana lenda sala na kusonga nki me salama :

Bana yonso sala bageste bonso bo kele Ismaeli, ke fwaka bambisi na bunduki na bo ya tolotolo.

Bana lenda yimba :

Nzambi, nkwa-mawa
Ata beto me finga bantu.
Nzambi, nkwa-mawa
Ata beto me finga Yandi.

Kumanisa lesa :

Kuseka to kufinga ya mwana Ismaeli, yo nataka bampasi mingi. Yandi yindulaka kupesa mpasi na leki na yandi Izaki, kansi yo nataka mpasi mingi na tata na yandi Abrahami, na mama na yandi Agare, ti na yandi mosi. Mpasi ya kukabana ya fami, mpasi ya kutambula na sika ya zelo na zelo na kukonda kikuma, mpasi ya nzala ya masa.

Kansi, ata mpila yina, Nzambi wilaka Ismaeli ti mama na yandi mawa. Yandi sadisaka bo na masa ti na bima bo vandaka na yo mfunu sambu na luzingu. Yandi pesaka Ismaeli mpila kubuta

dikanda ya nene.

Nzambi ke na mawa mingi, ata beto me sala mbi. Kansi mpasi ya kukabana ya fami, ti mpasi ya kuyungana na sika ya zelo na zelo, bampasi yina yonso, masumu ya Ismaeli nataka yo. Masumu na yandi vandaka nki? (Ee, kuseka mpangi na yandi na mpila mosi ya mbi. Kufinga na yandi.)

Beto zaba ve Ismaeli sekaka Izaki na nki. Mbala ya nkaka, bonso yandi vandaka mbuta, yandi tubaka bonso, «Mono kele mbuta. Mono ta zwa bima ya tata. Nge ta zwa kima ve. » Yo ke monika mutindu yina, sambu Sara tubilaka Abrahama nde, « Kula yandi sambu yandi ta baka ve kimvwama na nge. »

Kansi ata yandi tubaka konso mutindu, yo pesaka Mama Sara kiese ve, ti bo bendaka bampasi ya ngolo na fami ya mvimba.

Devoir sambu na bana ya me yamba Yesu dezia :

Nki mutindu bana ke fingaka to sekaka bantu na bwala na nge ?

[Moniteur, pesa bana nzila kupesa mvutu.]

Nki mutindu nge mosi me fingaka bantu, to nge mosi me sekaka bo na mpila ya mbi ?

[Moniteur, pesa bana ntangu kaka kuyindula.]

Keti nge ta lomba ndolula ya Nzambi sesepiyai sambu na mafinga yonso ya me basika na munoko ti na ntima na nge ? Beto samba sesepiyai. *[Moniteur, bana kitisa ntu ti kanga meso.]* Muntu na muntu, kaka na nsi ya ntima ya nge, lomba Nzambi kulolula nge. Lomba Yandi kupesa nge ngolo sambu nge sakumuna bantu yonso, nge kufinga bo diaka ve.

Devoir mono ke pesa beno bakristo, yo yai : Na mposo yai ke kwisa, tula ngolo kusakumuna bantu, kansi kufinga bo ve. Konso ntangu ya nge yindula kufinga, kusala yo ve, kansi sakumuna bo. Nzambi ta sadisa nge ! Bika munoko ya nge kuma nto ya ke basisa kaka masa ya kitoko.

Kubinga bana ya me yamba Yesu ntete ve :

Kansi, mbala ya nkaka nge mosi, nge me yamba Yesu ntete ve. Kukonda Yesu, nge ta vanda na ngolo ve kusala mambu ya mono me tuba. Nge kele na mfunu ya Yesu Kristo na luzingu na nge. Yandi ke kinga nge. Ketu nge ta yamba Yandi bubuyai? Kana nge me yamba Yandi ntete ve, nge lenda samba bonso yai na ntima na nge yonso kusonga nde nge ke balula ntima na Yandi:

Tata Nzambi, mono zaba nde mono me salaka mambu mingi ya me pesa Nge kiese ve. Mono me sala masumu. Mono me finga bantu, ti mono me sala mambu mingi ya nkaka. Bubuyai mono zola kubalula ntima. Sesepiyai, mono ke lomba Nge Yesu na ntima na mono. Kwisa kota ntima ti luzingu na mono sesepiyai. Mersi mingi sambu na pardo ya masumu na mono. Na zina ya Yesu. Amen.

Kana bubuyai, nge me balula ntima na Yesu, mbala ya ntete ya nge kusala yo, kwisa kusonga mono na nima ya ecodim. Mono ta yangalala ti nge.

=== NSUKA YA LESO 72

Leso 73. Nzambi lombaka Abrahami kupesa mwana na yandi Izaki bonso makabu na Yandi.

Kuyantika 22 :1-19

REVISIO:

Kuyindula diaka leso ya mposo me luta :

- Abrahami vandaka na bana ikwa ?
(Zole—Ismaeli ti Izaki)
- Bamama na bo nani ?
(Ismaeli vandaka mwana ya sielo ya Sara zina ya Agare. Ismaeli mwana ya ntete, kansi mwana ya makwela ve. Izaki vandaka mwana ya zole, mwana ya Abrahami ti nkento na yandi Sara.)
- Nani mwana ya Nzambi zolaka sadila sambu na kutindila beto Mesia Mvulusi ?
(Izaki, mwana na Abrahami ti Sara ya makwela)
- Abrahami kulaka nki mwana, ti nki mwana bikalaka na fami ?
(Yandi kulaka Ismaeli, ti Izaki bikalaka na fami.)
- Sambu na nki bo kulaka Ismaeli?
(Sambu yandi sekaka Izaki, ti yo pesaka Sara kiese ve.)
- Ata bo kulaka Ismaeli, Nzambi sadisaka yandi nki mutindu?
(Yandi songaka mama ti yandi masa, Yandi vandaka ti bo, Yandi silaka nde Ismaeli ta buta bana mingi, ti yandi ta kuma dikanda ya nene.)

Kulanda devoir ya leso ya mposo me luta :

Na mposo me luta, beto pesaka beno bakristo devoir kufinga bantu ve, kansi kusakumuna bo. Na mposo yai me luta, nani me finga bantu ve, kansi me sakumuna bo ? Nani ta songa beto mutindu yo lutaka ? *[Longi, pesa bana ntangu ya fioti kupesa mvutu. Pesa enkuragemen na bo ya me meka kusala devoir yina.]*

LESO YA BUBU YAI:

Kikuma ya leso yai :

Na nsuka ya leso yai, bana ta zaba nde Nzambi ke na kiese na beto bu beto kwikila Yandi ti lemfuka na Yandi, ata beto bakisa ve nki Yandi ke sala. Yo yina, bo ta tula ngolo kukwila Yandi ti kulemfuka na Yandi na luzingu na beto.

Nti ya dilongi ya Nzambi :

Nzambi lombaka nkailu sambu na masumu na beto, ti Yandi mosi me lungisa kupesa nkailu

Sambu na kumona baleso ya nkaka bonso yai ya dibundu na nge lenda sadila, tala site yai :
www.teachingforafrica.com , un site des « Ministères pour Chaque Enfant »

yina—mwana na Yandi Yesu Kristo.

Bankunga ya kwenda nzila mosi ti leso yai :

[Longi, bankunga yai yonso kele na mukanda ya MCE, 'Bankunga ya Ecodim'.]

Kikesa Kele

Kizitu Yonso

Masumu na Mono me Kwenda

Na Kati ya Yesu

Verse ya Kulonguka :

...Yesu nde : "... Kiese na bantu yina ke waka nsangu ya Nzambi ti ke landaka yo." Luka 11:28

Kuyantika leso :

Tata Ntumine vandaka na boma. Yandi vandaka na bana zole ya luzolo. Maladi ya ngolo kwisaka na nzo na yandi, ti mwana mosi fwaka. Me bikala ntangu fioti, yandi monaka nde mwana ya zole mpi zwaka maladi kaka kiteso mosi. Keti yandi mpi ta fwa ? Keti Tata Ntumine ta bikala na muntu ve na fami na yandi ?

Yo fweti vanda nde Tata Abrahami vandaka na boma ndambu bonso yo. Yandi me kinga bamvula mingi na kuzwa bana. Na nima, yandi zwaka bana zole. Mosi ya bo, Ismaeli, Yandi me kula. Yandi zabaka diaka ve mwana yina vandaka wapi.

Ntangu yai, Nzambi tesa lukwikilu na yandi. Yandi lombaka Abrahami kusala mambu mosi ya boma. Beto landa histoire na beto na Kuyantika kapu 22.

Malongi ya nene ya leso na bandambu 8 :

73.1. Nzambi lombaka Abrahami kupesa mwana na yandi Izaki makabu.

Kutanga : Kuyantika 22 :1-2

1 Na nima ya mambu yai Nzambi kwisaka kumeka Abrahami. Yandi bingaka yandi nde : « Abrahami ! » Abrahami tubaka nde : « E, Mfumu, mono yandi yai. »

2 Nzambi nde : « Baka mwana na nge yai Izaki, mwana yai mosi kaka ya nge ke na yandi, ya nge ke zolaka mingi, kwenda na yandi na ntoto ya Moria. Ebuna kuna na zulu ya ngumba ya Mono ta songa nge, nge fweti pesa Mono yandi makabu ya kuyoka ya mvimba. »

Kuyula bana :

- Nzambi songaka yandi kusala nki ?
(Kubaka mwana na yandi, kukwenda na ntoto ya Moria, kupesa yandi makabu.)
- Nzambi salaka mambu yai sambu na kuseka Abrahami, to sambu na kumeka yandi ?
(Sambu na kumeka yandi.)

Kuyula bana ya me yela :

- Keti nge ke mona probleme na baverse yai ? Nki ?

(Baprobleme kele zole. Ntete, beto zaba nde yo kele mbote ve kana beto kufwa muntu. Na nima ya Deluge, Nzambi tubaka nde, muntu ya kufwa muntu, bo ta kufwa yandi mpi. Probleme ya zole, Nzambi me sila nde mwana na yandi Izaki, yandi ta buta dikanda ya nene. Nki mutindu yandi ta lungisa nsilulu yina, kana Izaki kufwa na kileki na yandi?)

- Bible tuba nde Nzambi vandaka kutesa Abrahami. Kutesa yandi na nki ?

(Kutesa yandi kana yandi ta lemfuka na Nzambi, ata yandi ke bakisa ve nki Nzambi ke sala, kutesa yandi mpi kana luzolo na yandi sambu na Nzambi ta luta luzolo na yandi sambu na mwana na yandi.)

Bana sala sambu na kusonga nki me salama :

Bana yonso na kimvuka sala bonso Nzambi, kuboka nde,
« Abrahami ! Abrahami ! Pesa Mono mwana na nge. »

Bana yimba ti kina :

Kulemfuka! Nta nge kele kubakisa ve.

73.2. Kukonda kukinga, Abrahami yilamaka, ti yantikaka kusala yina ya Nzambi lombaka.

Kutanga : Kuyantika 22 :3-4

3 Na kilumbu landaka na suka-suka yonso, Abrahami zengaka ndambu ya bankuni sambu na kuyokila makabu, yandi bakaka mpunda na yandi. Yandi bakaka mpi Izaki ti bantu na yandi zole ya kisalu, ebuna yandi simbaka nzila na kwenda na kisika yina ya Nzambi songaka yandi.

4 Na nima ya bilumbu tatu, Abrahami monaka ngumba yango, yo vandaka mwa-ntama fioti.

Kuyula bana :

- Keti Abrahami lutisaka ntangu mingi sambu na kulemfuka ?
(Ikele ve. Na lumbu ya landaka, na suka-suka yonso, yandi yilamaka, ti yandi yantikaka voyage sambu na kulemfuka.
- Yandi nataka nki bima iya na nzila ?
(1. Nkuni, 2. mpunda na yandi, 3. mwana Izaka, 4. bantu zole ya kisalu)
- Bo landaka nzila bilumbu ikwa na ntwala kumona ngumba ya Nzambi songaka bo ?
(Bilumbu tatu.)

Bana sala sambu na kusonga nki me salama :

Bana yonso na kimvuka sala bageste kusonga mutindu Abrahami salaka. Nge tuba fraz

mosi, ebuna bo sala bageste kusonga yo :

Kutelema na suka yonso.

Kuzenga bankuni.

Kubaka mpunda.

Kubaka mwana Izaki ti bantu zole ya kisalu.

Kusimba nzila.

Kutambula bilumbu 3 na nzila.

Kumona ngumba ya Nzambi ke songa, mwa-ntama ti nge.

Bana yimba ti kina :

Abrahami lemfukaka Nzambi, ata yandi bakisaka ve.

73.3. Yandi songaka bantu ya kisalu nde bo bikala, yandi ti mwana, bo zole ta kwenda, ti bo zole ta vutuka. Yai songaka nde yandi kwikilaka nde, ata yandi pesaka Izaki makabu, Nzambi ta tedimisa yandi na lufwa.

Kutanga : Kuyantika 22 :5, Ba-ebreo 11 : 18-19

Kuyantika 22 :5 Ebuna yandi tubaka na bantu na yandi ya kisalu nde : « Beno bika awa ti mpunda. Mono ti mwana beto me kwenda kusamba Nzambi kuna na ngumba, ebuna beto ta kwisa kuvutuka. »

Baebreo 11 :18 Nzambi tubilaka yandi nde : « Izaki muntu ta butila nge bana. »

19 Abrahami banzaka nde Nzambi ke na kiyeka ya kuvutula diaka moyo na Izaki ; ebuna yandi bakaka diaka Izaki bonso nde Izaki me katuka na lufwa, me baka diaka moyo. »

Kuyula bana :

- Ntangu Abrahami ti Izaki kumaka penepene na ngumba yina, bo songaka bantu ya kisalu nki mutindu ?
(Bo songaka bo kubikala kuna, bo ta kwenda kusamba Nzambi, ebuna bo ta vutuka.)
- Nki mutindu yai songaka lukwikilu ya Abrahami ?
(Sambu lukanu vandaka kupesa mwana Izaki makabu, kansi Abrahami tubaka mpi nde yandi ta vutuka ti yandi. Mabanza yai zole ke kwelana kaka kana Abrahami tulaka ntima nde, ata yandi fweti kufwa Izaki, Nzambi ta tedimisa yandi na lufwa.)
- Baverse na Baebreo ke tendula beto mabanza ya Abrahami na mambu yina. Yandi yindulaka nki mutindu?
(Izaki fweti zinga sambu Nzambi me sila yandi nde, « Izaki muntu ta butila nge bana. »
Yo yina, kana Nzambi lombi yandi na kufwa Izaki, na nima, Nzambi fweti tedimisa yandi na lufwa.)

Bana sala sambu na kusonga nki me salama :

Bana sala bandambu ya bantu 1, 2, 3, 4. Kana ndambu ya bana bikala, bo kangama na ndambu ya nkaka ya bana. Na konso ndambu ya bana, muntu mosi sala bageste bonso Abrahami, muntu mosi bonso mwana Izaki, ti bantu 2 bonso bantu ya ksalu.

Abrahami songa bantu ya ksalu nde bo bikala, yandi ti Izaki ta vutuka na bo diaka.

Bantu ya ksalu ndima.

Abrahami simba diboko ya Izaki, bo kwenda. [*Moniteur, na nsuka ya parti yai, bana bikala na bandambu 4, 4 yina sambu na parti ya histoire ya ta landa.*]

Bana yimba ti kina :

Abrahami lemfukaka sambu yandi kwikilaka Nzambi.

73.4. Ntangu Izaki yulaka, « Papa, wapi mwana-dimeme, Abrahami vutulaka nde, "Nzambi Yandi mosi ta pesa yo." »

Kutanga : Kuyantika 22 :6-8

6 Abrahami pesaka Izaki bankuni na kunata. Yandi mosi Abrahami nataka tiya ti mbele. Bo zole kwendaka nzila mosi.

7 Ntama ve Izaki tubaka nde: « Papa ! » Abrahami vutulaka nde : « E. » Izaki yulaka nde : « Papa, mono ke mona nde beto ke na tiya ti bankuni, kansi mwana-dimeme yina ya beto ta pesa makabu kele wapi ?

8 Abrahami nde : « Nzambi Yandi mosi ta pesa yo. » Ebuna bo landaka nzila na bo.

Kuyula bana :

- Kana bo me kuma penepene, Abrahami pesaka Izaki nki kunata? (Izaki nataka bankuni, ebuna Abrahami nataka tiya ti mbele.)
- Izaki yufulaka tata Abrahami nki? (Mwana-dimeme sambu na makabu kele wapi?)
- Nki mvutu Abrahami pesaka? (**« Nzambi Yandi mosi ta pesa yo. »**)

[Moniteur, NB : Yai kele mambu mosi ya mfunu. Izaki ke songa beto mpila ya Nzambi Yandi mosi ta pesa makabu sambu na masumu na beto—Mwana ya luzolo ya Nzambi, Yesu Kristo.]

Bana sala sambu na kusonga nki me salama :

Na bandambu ya bana 4, 4, Izaki yula Abrahami, « Papa, wapi kele mwana-dimeme sambu

na makabu ? » Abrahami vutula mvutu nde, « Nzambi Yandi mosi ta pesa yo. »

Bana yimba ti kina :

Wapi mwana-dimeme sambu na makabu?

Nzambi Yandi mosi, Yandi ta pesa yo.

73.5. Abrahami kwisaka penepene na kufwa mwana na yandi Izaki sambu na kupesa yandi makabu.

Kutanga : Kuyantika 22 :9-10

9 Ntangu bo kumaka na kisika yina ya Nzambi songaka Abrahami, Abrahami tungaka mesa-kimenga, yandi tulaka bankuni na zulu. Yandi bakaka mwana na yandi Izaki, yandi kangaka yandi bansinga, ebuna yandi tulaka yandi na zulu ya mesa-kimenga.

10 Ntangu yai yandi bakaka mbele sambu na kufwa yandi.

Kuyula bana :

- Ntangu bo kumaka na kisika ya Nzambi songaka yandi, Abrahami salaka nki ?
- (Yandi tungaka mesa-kimenga ti tulaka bankeni na zulu na yo. Na nima, yandi kangaka mwana Izaki bansinga, ti tulaka yandi na zulu ya mesa-kimenga. Na nima, yandi bakaka mbele sambu na kufwa yandi.)

Bana sala sambu na kusonga nki me salama :

Na bandambu ya bana 4, 4 yina, Abrahami tunga mesa-kimenga ti tula bankuni na zulu na yo. Na nima, yandi baka mwana na yandi Izaki, bo kanga yandi bansinga, bo tula yandi na zulu ya mesa-kimenga. Izaki kele kaka pima. Abrahami simba mbele (imaginaire) ti nangula yo bonso yandi zola kufwa Izaki.

Bana yimba ti kina:

Abrahami salaka yonso ya Nzambi tubaka

Ata yandi bakisaka yo ata fioti ve.

73.6. Kaka na ntangu yina, wanzio bingaka Abrahami, ti songaka yandi mwana-dimeme sambu na kupesa makabu yina. Yo yina yandi yingisaka yo ti pesaka yo makabu.

Kutanga : Kuyantika 22 :11-12

*11 Kansi Abrahami waka ndinga ya wanzio ya Mfumu Nzambi na zulu ke binga nde :
"Abrahami ! Abrahami !" Abrahami nde: "E, mono yandi yai."*

12 Wanzio nde : "Kusimba mwana ve, kusala yandi ata kima ve ! Mono me zaba ntangu yai nde ya kieleka nge ke lemfukilaka Nzambi, sambu mwana na nge yai mosi kaka ya nge ke na yandi, nge me buya ve na kupesa yandi makabu na Nzambi."

13 Ntangu Abrahami talaka ndambu na ndambu, yandi monaka mwana-dimeme ya bakala me kangama na bibongo na kati ya mwa-nti. Yandi kwendaka kusimba yo, ebuna na kisika ya mwana na yandi, yandi yingisaka mwana-dimeme yina, yandi yokaka yo makabu na Nzambi.

[Moniteur, NB : Kana ntangu lunga ve kumanisa lesa, nge lenda manisa awa. Kaka luta bandambu zole ya nsuka, ti luta tii na parti, « Kumanisa Lesa. » Kansi kana ntangu lunga, nge lenda landa diaka kulonga bandambu yai zole ya landa, 7. ti 8.]

Kuyula bana :

- Kaka na ntangu ya Abrahami zolaka nangula mbele sambu na kufwa mwana na yandi, nki salamaka ?
(Wanzio ya Nzambi bingaka yandi na zina na yandi.)
- Wanzio yina tubaka nki na yandi?
(Kusimba mwana ve, kusala yandi ata kima ve.)
- Abrahami me nunga kutesa yina. Yandi me songa nki?
(Nde yandi ta lemfuka na Nzambi, ata kupesa mwana na yandi makabu.)
- Abrahami monaka nki ntangu yina?
(Mwana dimeme ya bakala, kukangama na bibongo na kati ya mwa-nti.)
- Yandi salaka nki?
(Yandi yingisaka yo makabu na sika ya mwana na yandi.)

Bana sala sambu na kusonga nki me salama :

Bana yonso na kimvuka sala bonso bo kele wanzio ya Nzambi ke kwisa na Abrahami. Bo boka ngolo nde, « Abrahami, Abrahami, kusala yandi kima ve. »

Bana yimba ti kina :

« Kusala yandi kima ve ! Tala, mwana-dimeme yo yai!"

73.7. Sambu na mambu yina, Abrahami pesaka sika yina zina "Yawe-Yire," Nzambi ke pesaka. Ebuna Nzambi sakumunaka Abrahami mingi diaka.

Kutanga: Kuyantika 22 :14-18

14 Abrahami pesaka kisika yina zina Yawe-Yire (disongidila nde Mfumu Nzambi ke pesaka). Yo yina tii bubu yai bantu ke tubaka nde : "Na ngumba yai Mfumu Nzambi ke pesaka."

15 Wanzio ya Mfumu Nzambi bingaka Abrahami diaka nde :

16 "Mfumu Nzambi ke tuba nde: 'Mono ke zenga na zina na Mono mosi nde Mono ta sakumuna nge mingi sambu na mambu yai ya nge me sala ; nge me buya ve na kupesa Mono mwana ya nge mosi kaka nge ke na yandi.

17 Mono ta pesa nge mpi dikanda ya bantu mingi. Bana na nge ta vanda mingi-mingi bonso bambwetete na zulu to bonso bambuma ya zelo na lweka ya masa. Bana na nge ta bedisaka bambeni na bo.

18 Ebuna bantu yonso ya nsi-ntoto ta lombaka mono na kusakumuna bo mutindu Mono me sakumunaka bana na nge. Mono ta sala mambu yai yonso sambu nge lemfukilaka Mono. »

Kuyula bana :

- Sambu na nki Abrahami bingaka sika yina Yawe-Yire ?
(Disongidila nde, « Nzambi ke pesaka. »)
- Nki mutindu Nzambi sakumunaka Abrahami na nima ya kutesa yai ?
(Yandi silaka diaka nde Yandi ta pesa yandi bana mingi, ti bana na yandi ta bedisa bambeni na bo.)

Bana sala sambu na kusonga nki me salama :

Bana yonso na kimvuka tuba bonso Abrahami nde, « Zina ya kisika yai, Yawe-yira, sambu awa Nzambi me pesaka. »

Na nima, bo tuba bonso Nzambi nde, « Mono ke sakumuna nge, Abrahami, sambu nge me lemfuka na Mono. » « Nge mpi ta sakumuna bantu ya kaka. »

Bana yimba ti kina :

« Yawe-yira ! Nzambi me pesaka ! »

73.8. Abrahami ti Izaki vutukaka na bantu na bo ya kisalu, mutindu yandi silaka bo.

Kutanga: Kuyantika 22 :19a

19a Abrahami vutukaka, yandi kwendaka kukuta bantu na yandi ya kisalu. . .

Kuyula bana:

- Na nima ya mambu yina yonso, Abrahami ti Izaki, bo salaka nki ?
(Bo vutukaka na bantu ya kisalu, mutindu Abrahami silaka bo.)

Bana sala sambu na kusonga nki me salama :

Na bandambu ya bantu 4, 4, Abrahami ti Izaki tambula diaka, bo vutuka na bantu ya kisalu. Bantu ya kisalu yamba bo na kiese yonso.

Kusolula ti bana ya me yela (kana ntangu kulunga) :

Bamusleman (balandi ya religio ya Islam), bo tuba nde Abrahami zolaka kupesa mwana na yandi Ismaeli. Bo sala fete ya bo binga "Eid-Al-Adha" na ngonda ya nana to uvwa sambu na kubambuka mambu yina.

Sambu na nki yo kele mfunu nde mwana ya Abrahami yindulaka kupesa, yandi kuvanda ve

Ismaeli, kansi yandi kuvanda kaka Izaki?

[Moniteur, NB : *Kuwa mabanza ya bana ntete.] Baraison zole kele mfunu :*

- 1. Bible ke tuba nde Abrahami kulaka Ismaeli, ti yo vandaka Izaki ya Nzambi songaka Abrahami kupesa makabu. Yo kele kestio ya kiyeka ya Bible na yonso ya me sonikaka kuna.*
- 2. Ata Ismaeli vandaka mwana ya ntete, yandi vandaka ve mwana ya makwela, ti yandi vandaka ve mwana ya nsilulu. Mwana ya nsilulu vandaka mwana ya ta tunga dikanda Israele, dikanda ya ta pesa beto Bible ti Mvulusi.*

Beto me mona dezia nde kimpala vandaka na ntima ya Ismaeli. Keti beno banza nde yo kitaka ntangu Abrahami kulaka Ismaeli? Ikele ve. Yo yelaka, ti yo kumaka kima mosi ya ngolo. Yo kumaka baz ya bampasi mingi ya ke landa tii bubuyai. Kimpala yina ikele baz ya mpila ya Bamusilman me balula-balula histoire yai.)

Kumanisa leso :

Nzambi salaka mambu yai na bilumbu ya ntama sambu na kusonga nde, lumbu mosi, Yandi ta tinda Mwana na yandi ya luzolo, Yesu Kristo. Beto zolaka kufwa sambu na masumu na beto, kansi Yesu me yingisa beto. Yandi fwaka na sika na beto, mwana-dimeme ya kitoko ya Nzambi ndimaka bonso makabu sambu na masumu na beto.

Yindula kulemfuka ya Abrahami. Yandi vandaka muntu. Yandi bakisaka ve yonso ya Nzambi vandaka kusala. Beto kele bantu mpi, ti Nzambi ikele Nzambi. Beto bantu lenda bakisa ve bampila yonso ya Nzambi ke salaka. Nzambi zaba yo, kansi Yandi zola bantu na Yandi kuzinga na lukwikilu. Yandi zola beto kulemfuka na Yandi na kiese, ata beto bakisa ve yonso ya Yandi me tuba.

Devoir sambu na bana ya me yamba Yesu dezia :

Nge mukristo, keti nge ikele nswalu kulemfuka na Nzambi ? Keti nge ke lemfukaka na ndinga na Yandi, ata nge bakisa ve ? Mvutu na bakestio yina ke songa pwelele kana nge kwikila Yandi. Devoir mono ke pesa beno bakristo mposo yai, yo yai : Kutanga ndambu ya ndinga ya Nzambi konso lumbu, ti tula ngolo kulemfuka na yonso ya nge tanga.

Kubinga bana ya me yamba Yesu ntete ve.

Kansi nge, mbala ya nkaka nge me kuma mukristo ntete ve. Kulemfuka ya ntete na nge, yo fweti vanda kuyamba Yesu Kristo, mwana ya Nzambi, bonso Mvulusi na nge. Keti nge ta kwisa na Yandi bubuyai ? Keti nge ta pesa Yandi nzila kukatula nge na mesa ya kimenga ? Yandi fwaka na sika ya nge. Tula yandi ntima, ebuna nge ta guluka bubuyai.

=== NSUKA YA LESO 73

Leso 74. Izaki kwelaka Rebeka.

Kuyantika 24 :1-67

REVISIO:

Kubambuka lesa ya mposho me luta :

Twadisa bana kutuba diaka lesa ya 'Abrahami ke pesa Izaki' na nkufi. Mwana mosi lenda yantika, mwana ya nkaka kulanda, etc.

Kulanda devoir ya lesa ya mposho me luta :

Nani lenda songa beto ntangu mosi na mposho me luta, ya yandi lemfukaka na Nzambi, ata yandi bakisaka ve yina ya Nzambi vandaka kusala ? *[Moniteur, pesa bana ndambu ntangu kutuba fioti. Pesa enkurajemen na bo ya mekaka kusala devoir.]*

LESO YA BUBU YAI:

Kikuma ya lesa yai :

Na nsuka ya lesa yai, bana ta bakisa nde makwela ikele mambu mosi ya mfunu, yo yina, beto lombamba Nzambi mingi kutwadisa beto na mambu yina, na mpila nde kana ntangu kukwela kulunga, konso muntu baka nkento to bakala ya mukristo.

Bankunga ya kwenda nzila mosi ti lesa yai :

Daniele sambaka mingi
Lombamba na Nzambi kaka

Mfumumu zaba nzila na mono
Nzambi kuwa na suka

[Moniteur, NB : Lesa yai kele nda, yo yina mbote kuyimba kaka nkunga mosi, sambu ntangu bikala mingi sambu na lesa. Na verse ya kulunguka mpi, bana tuba yo mbala zole kaka. Kana ntangu bikala na nsuka ya lesa, bo lenda tuba yo diaka.]

Verse ya kulunguka :

2 Korinto 6 :14-15

14 Beno kwenda kuvukana ve ti bamimpani, sambu mambu ya muntindu yina lenda salama ve. Nki mutindu mambu ya mbote lenda vukana ti mambu ya mbi ? Nki mutindu mwini lenda vukana ti mpimpa ?

15 Nki mutindu Kristo lenda wakana ti Satana ? To nki mutindu mukristo lenda vukana ti mumpani?

Kuyantika lesa :

Longi mosi pesaka bana devoir kusonika nki mutindu ya bakala to nkento bo ta sosa kukwela. Bankento sonikaka nde bakala na bo fweti vanda na luse ti nitu ya mbote, yandi fweti vanda na kikesa, yandi fweti zola bo mingi, yandi fweti vanda na mabanza kubaka nkento mosi kaka.

Babakala tubaka nde nkento na bo fweti zaba kusala ngolo, kubuta bana, ti vanda na luse ya kiese. Kansi ata mwana mosi ve tubaka mambu ya me luta mfunu. Bible ke songa nde beto bakristo, beto fweti kwela kaka mukristo. Kana beto kwela mukristo, mambu ya me luta nene na luzingu na beto, beto ta vanda kutambula nzila mosi na mambu yina.

Bubuyai beto ta mona mpila Abrahami sosaka nkento ya lukwikilu sambu na mwana na yandi Izaki. Kuyantika kapu 24.

Malongi ya nene ya lesa na bandambu 13 :

[Moniteur, NB : Lesa yai kele ndaa, yo yina, beto me tula kaka ndambu ya partisipasio ya bana na konso ndambu na yo.]

74.1. Abrahami tindaka sielo na yandi kusosila Izaki nkento na kati ya bampangi na yandi ya wilaka Nzambi boma.

Kutanga : Kuyantika 24 :1-4

1. *Abrahami vandaka me nuna. Mfumu Nzambi salaka yandi mbote na luzingu na yandi yonso.*

2. *Ntangu yai Abrahami bingaka muntu na yandi ya kisalu yina vandaka mbuta, yandi vandaka tutala mpi bima yonso ya Abrahami. Abrahami tubaka na yandi nde : "Kwisa kutula mono diboko na ntwala sambu na kuzenga Nzambi.*

3 *Mono zola nde nge zenga na meso ya Mfumu Nzambi yina salaka zulu ti ntoto, nde nge ta bakila mwana na mono Izaki nkento ve awa na nsi ya Kanana, kisika ya mono ke zinga.*

4 *Kansi nge fweti vutuka tii na ntoto na mono, ebuna ko kuna nge ta sosila Izaki nkento na dikanda na mono."*

Kutanga ntendula yai:

Bantu ya sika ya Abrahami zingaka vandaka Bakananite. Bo vandaka bantu ya buyaka Nzambi. Yo sambaka biteki ya bo mosi salaka, ti bo salaka mambu mingi ya lungaka ve na meso ya Nzambi. Yo yina, mpila vandaka ve kusosila Izaki nkento na kati ya bantu yina. Abrahami zabaka nde na kati ya dikanda na yandi, bo ta mona nkento ya kwikilaka Nzambi.

Kuyula bana:

- Abrahami zolaka sielo na yandi kusala nki?
(Kukwenda na bampangi na bo ya zabaka Nzambi, kusosa kuna nkento sambu na Izaki, mwana ya Abrahami.)

Kuyimba ti kukina:

Bana yimba: Wapi nkento ya mbote, nkento ya ke zaba Nzambi?

74.2. Abrahamu tulaka ntima nde Nzambi ta tinda wanzio na ntwala, ti yandi ta kangula nzila nde sielo baka nkento sambu na Izaki.

Kutanga : Kuyantika 24 :5-8

5 Muntu ya kisalu yulaka nde: "Mbala ya nkaka nkento yango ta ndima ve na kubika bwala na bo sambu na kwisa kwaku, mpidina nge zola nde mono tinda mwana na nge kuna na ntoto na nge?"

6 Abrahami nde : "Kele ve, nge ta tinda mwana na mono kuna ve.

7 Mfumu Nzambi ya zulu Yandi muntu katulaka mono na ntoto ya batata na mono, Yandi muntu kwisaka kunata mono kwaku. Yandi silaka mono nde Yandi ta pesa ntoto yai na bana na mono. Yandi muntu ta tinda wanzio sambu na kusadisa nge na kusosila mwana na mono nkento.

8 Kana nkento kuzola ve kwisa ti nge, kuzenga Nzambi ya nge me zenga bubu yo ta vanda kima ve. Kansi kima mosi, nge lenda nata mwana na mono kuna ve. »

Kuyula bana :

- Ketu Abrahami ndimake nde mwana na yandi Izaki kwenda kuna sambu na kusosa nkento ?
(Ikele ve. Mwana na yandi Izaki lenda kwenda ve.)
- Kana nkento ndima ve kukwela Izaki?
(Ebuna kuzenga ya sielo ya Abrahami, yo ta tadila yandi ve.)

Bana sala sambu na kusonga nki me luta :

Bana yonso sala bonso wanzio, kusonga nde Nzambi tindaka wanzio na ntwala sambu na kuyidika mambu ya bo sosaka.

74.3. Sielo lemfukaka, yandi sambaka nde Nzambi kutwadisa yandi.

Kutanga : Kuyantika 24 : 9-14

9 Yo yina muntu ya kisalu tulaka mfumu na yandi diboko na ntwala, ebuna yandi zengaka Nzambi mutindu Abrahami tubaka.

10 Muntu yango bakaka bambisi yai bashamo kumi ya mfumu na yandi, yandi bakaka mpi bima ya kuluta kitoko, ebuna yandi simbaka nzila ya kwenda na bwala yina ya Nahore vandaka kuzinga, kuna na ndambu ya norde ya nsi ya Mezopotamia.

11 Ntangu yandi kumaka penepene na bwala yina, yandi vandisaka bambisi na ntoto na kisika yina ya bo ke bakaka masa. Yandi kumaka na ntangu ya nkokila, ntangu bankento ke kwisaka kubaka masa.

12 *Ntangu yai muntu yina sambaka Nzambi nde : « Mfumu Nzambi, Nzambi ya mfumu na mono Abrahami, sadisa mono bubu yai na kulungisa mambu ya Nge tubaka na Abrahami.*

13 *Awa kisika ya mono me telama, kele kisika ya bana-bankento ya bwala ke kwisaka kubaka masa.*

14 *Mono ta tuba na mwana-nkento mosi nde, 'Pardo, tulula dibungu na nge, mono nwa masa.' Kana yandi pesa mono masa ya kunwa, kana yandi tuba nde : 'Mono ke pesa mpi bambisi na nge masa ya kunwa', mpidina mono ta zaba nde Nge me lungisa mambu yina ya Nge tubaka na mfumu na mono Abrahami."*

Kuyula bana:

- Sielo ya Abrahami kwendaka wapi sambu na kusosa nkento?
(Na sika ya bantu ke bakaka masa ya nto.)
- Yandi yindulaka kuzaba nkento yina nki mutindu?
(Kana yandi lombaka masa ya kunwa, ti nkento pesaka yo, ti pesaka masa sambu na bambisi na yandi mpi.)
- Yandi lombaka lusadisu ya nani na mambu ya nkento sambu na Izaki?
(Na Mfumu Nzambi)

Kuyimba ti kukina:

Nzambi, twadisa mono na nkento ya mbote, nkento ya kwikila Nge.

74.4. Na ntwala yandi manisaka kusamba, Rebeka kwisaka ti salaka mpidina bonso yandi me lomba.

Kutanga : Kuyantika 24 : 15-21

15 *Ntangu yandi me manisa kusamba ntete ve, Rebeka mpi kwisaka kukuma na dibungu ya masa na zulu ya mapeka. . . .*

16 *Rebeka vandaka kitoko mingi, yandi mpi vandaka me zaba ntete bakala ve. . .*

17 *Muntu ya Abrahami kwendaka ntinu sambu na kukutana na Rebeka. Yandi songaka yandi nde : "Pardo, kana nge zola, pesa mono masa ya kunwa."*

18 *Rebeka tubaka nde: "Mambu ve », ebuna nswalu yandi tululaka dibungu, yandi pesaka yandi masa.*

19 *Ntangu yandi me nwa imene, Rebeka tubaka nde : « Mono ke pesa mpi bambisi na nge masa ya kunwa, bika bo nwa mutindu bo zola."*

20 *Dibungu ya masa manaka na kupesa bambisi, ebuna Rebeka kwendaka ntinu na kubaka diaka masa tii kuna yandi lungisaka na kupesa bambisi yonso masa.*

21 Muntu ya Abrahama vandaka me vanda ke tala yandi nie. Yandi vandaka kutuba na nsi ya ntima nde : « Keti Mfumu Nzambi me sadisa mono to ve ? »

Kuyula bana :

- Nki mutindu sielo ya Abrahama zabaka nde Rebeka vandaka nkento Nzambi me zola sambu na Izaki ?
(Yandi salaka kaka na mpila ya yandi lombaka na lombilu na yandi.)

Kuyimba ti kukina :

Na ntwala bisambu manaka, Nzambi tindaka mvutu.

74.5. Yandi pesaka Rebeka bijou ya kitoko, ti Rebeka yambaka yandi kukwisa na nzo na yandi sambu na kutana ti fami. (Baze : Kuyantika 24 : 22-25)

Kuyula bana :

- Sambu na nki yo vandaka mfunu nde sielo yina kutana ti fami ya Rebeka ?
(Sambu muntu lenda kwela ve kukonda fami na yandi kundima.)

Bana sala sambu na kusonga nki me salama :

Bana bankento sala geste bonso bo ke tula bima ya kitoko na makutu, na kiese yonso.

74.6. Yandi vutulaka Nzambi matondo na mpila Yandi me twadisa yandi na voyage.

Kutanga : Kuyantika 24 : 26-27

26 Ebuna muntu ya Abrahama fukamaka, yandi sambaka Mfumu Nzambi

27 nde : Mfumu Nzambi, Nzambi ya mfumu na mono Abrahama, lukumu na Nge sambu Nge me lungisa mambu yonso ya Nge tubaka na Abrahama. Nge me nata mono tii awa na kisika ya bampangi ya mfumu na mono Abrahama."

Kuyula bana :

- Yandi vutulaka Nzambi matondo na nki ?
(Na bampila yonso Nzambi me sadisa yandi tii kuna.)

Kuyimba ti kukina :

Bana yonso fukama, bo yimba, "Matondo na Nzambi. Yandi me sadisa mono."

74.7. Yandi songaka fami ya Rebeka yonso ya me salama. (Baze : Kuyantika 24 : 28-48)

Kutanga somere yai ya nkufi :

Ebuna muntu ya Abrahama tendulaka bampangi ya Rebeka yonso ya me salama—mpila Abrahama tindaka yandi kutosila Izaki nkento na kati ya bampangi na bo ya wilaka Nzambi

boma, mpila yandi sambaka, mpila Rebeka lungisaka mambu yonso ya yandi me samba, mpila yandi me solula ti yandi, bima ya kitoko yandi me pesa Rebeka, ti mpila Rebeka me nata yandi awa tii na fami na yandi.

Kuyula bana :

- Kana nge vandaka bampangi ya Rebeka, nge waka histoire yai ya sielo ya Abrahami tubaka, nge ta mona yo nki mutindu ?
(Mbala ya nkaka kiese, sambu yandi nataka nsangu ya bampangi na beno ya me kwendaka kuzinga ntama, kiese mpi na mpila Nzambi me twadisa na mambu yina yonso.)

74.8. Fami ya Rebeka ndimaka kupesa yandi sambu yandi kwela Izaki.

Kutanga : Kuyantika 24 : 49-51

49 Ntangu yai, kana beno me ndima na ntima ya mbote mambu ya mfumu na mono tubaka, beno zabisa mono. Kansi kana beno me buya, mpidina mono ta tala nki mono fweti sala."

50 Labani (mpangi ya Rebeka) ti Betuele (tata na yandi) vutulaka nde : "Mambu yai me katuka na Mfumu Nzambi Yandi mosi ; beto ke na kima ve ya kutuba.

51 Rebeka yandi yai, baka yandi, beno kwenda. Yandi kuma nkento ya mwana ya mfumu na nge mutindu Mfumu Nzambi Yandi mosi me tuba."

Kuyula bana :

- Sambu na nki bampangi monaka mpila kubuya ve mambu ya sielo ya Abrahami zolakaka?
(Sambu bo monaka nde mambu yina me katuka na Mfumu Nzambi Yandi mosi.)

Kuyimba ti kukina:

Mambu yai me katuka na Nzambi.

Baka Rebeka, beno kwenda.

74.9. Yandi vutulaka Nzambi matondo diaka.

Kutanga : Kuyantika 24 : 52

52 Ntangu muntu ya Abrahami waka mambu yai, yandi fukamaka ilungi na ntoto, yandi sambaka Mfumu Nzambi.

Kuyula bana:

- Tii ntangu yai, beto me wa nde sielo ya Abrahami me samba Nzambi mbala ikwa? (Mbala tatu—mosi na ntwala kuyantika kisalu, mosi ya matondo ntangu yandi me kwisa na ntoto ya bampangi, ti mbala yai.

Bana sala sambu na kusonga nki me salama :

Bana yonso fukama ilungi na ntoto, bo yonso tuba nde, "Matondo, Nzambi, Matondo!"

74.10. Yandi pesaka bamakabu na Rebeka ti na fami.

Kutanga : Kuyantika 24 : 53

53 Ebuna yandi basisaka bilele ti bima-makutu ya bo salaka na arza ti wolo, yandi pesaka yo na Rebeka. Yandi basisaka mpi bima ya nkaka ya ntalu, yandi pesaka yo kado na mpangi ti na mama ya Rebeka.

Kuyula bana:

- Bakado yina vandaka bonso nki?
(Bima ya ntalu bonso kufuta fami na bo na mpila bo me sansa Rebeka, ti na mpila Izaki vandaka kubaka yandi bonso nkento. Bima bonso doti.)

74.11. Na suka yandi zolaka kuvutuka, kansi bampangi zolaka ve bo kwenda nswalu mpidina. Yo yina, bo yulaka Rebeka, ti yandi ndimaka kukwenda.

Kutanga : Kuyantika 24 : 54-58

54 Ntangu yai muntu ya Abrahami ti bantu yina kwisaka na yandi, bo diaka, bo nwaka, ebuna bo kwendaka kulala. Na suka ntangu bo telamaka, muntu ya Abrahami tubaka nde: "Beto fweti vutuka na kisika ya mfumu na mono."

56 Kansi muntu yina nde: "Pardo, ke mbote ve mono na kuvanda kwaku bilumbu mingi. Mfumu Nzambi me sadisa mono na mambu na mono yonso, mbote mono vutuka."

57 Ebuna bo nde, "Vingila, beto binga mwana-nkento, beto yula yandi kana nki yandi ke banza."

58 Bo bingaka Rebeka, bo yulaka yandi nde: "Nge zola kwenda na muntu yai ?" Rebeka ndimaka nd: "E, mono me zola."

Kuyula bana:

- Mambu mosi basikaka kana bo ta kwenda nswalu, to kana Rebeka ta bikala ndambu na fami. Nani zengaka kestio yina?
(Rebeka. Bo yulaka yandi, ti yandi tubaka nde yandi ta kwenda.

Bana sala sambu na kusonga nki me salama :

Bana yonso sala geste ti tuba nde, « Beto kwenda ! Beto kwenda ! »

74.12. Bo sakumunaka Rebeka, ti yandi kwendaka ti muntu ya Abrahami. (Base: Kuyantika 24 :59-61)

Kutanga somere yai ya nkufi :

Mambu yonso me yilama sambu Rebeka kuvutuka ti muntu ya Abrahami, yandi kuma nkento ya Izaki. Bampangi sakumunaka Rebeka. Bo lombaka nde yandi buta bana mingi. Yo yina, Rebeka ti bansadisi na yandi, bo mataka bashamo, bo simbaka nzila, bo kwendaka na Tata Abrahami.

Kuyula bana:

- Bampangi ya Rebeka lombaka nki sambu na yandi?
(Nde yandi buta bana mingi, kuma mama ya dikanda ya nene)
- Bo vutukaka na Abrahami nki mutindu?
(Na zulu ya bashamo)

Bana sala sambu na kusonga nki me salama :

Bana yonso sala geste bonso bo ke mata shamo, bo ke simba nzila.

74.13. Ntangu bo me vutuka, Rebeka kumaka nkento ya Izaki, ti Izaki zolaka yandi mingi.
(Baze: Kuyantika 24:62-67)

Kutanga: Kuyantika 24: 67

67 Izaki nataka Rebeka na nzo ya ntenta yina ya mama na yandi bikaka, yandi kumaka nkento na yandi. Izaki vandaka kuzola Rebeka mingi

Kuyula bana :

- Izaki bakaka Rebeka nki mutindu?
(Yandi bakaka yandi bonso nkento na yandi ti yandi zolaka Rebeka mingi.)

Bana sala sambu na kusonga nki me salama :

Bana yonso tula makelele ya kiese bonso na ntangu ya makwela.

Kumanisa leso :

Makwela ikele mambu mosi ya mfunu na luzingu ya muntu. Nzambi me songa beto bakristo nde beto fweti kwela kaka mukristo ya nkaka. Kana beto lomba Yandi kutwadisa beto, Yandi ta pesa beto muntu ya mbote, na ntangu mpi ya mbote. Kana beto lomba Yandi kutwadisa beto na mpila beto ikele ti babakala to ti bankento, Yandi mpi ta sala yo.

Devoir sambu na bana ya me yamba Yesu dezia :

Mono zaba nde beno ke kwelaka ve mbasi. Beno kele na bamvula na ntwala beno yantika kuyindula yo. Kansi beno lenda yantika ntangu yai kusosa lusadisu ya Nzambi na mambu yina. Devoir mono ke pesa beno bakristo na mposho yai, yo yai: kuyantika kusamba nde Nzambi twadisa na mambu ya makwela na beno.

Kubinga bana ya me yamba Yesu ntete ve.

Na kati na beno, kana bantu ya nkaka me yamba Yesu ntete ve, beno fweti kinga diaka ve. Bonso Nzambi sadisaka Abrahama ti Izaki na mambu ya makwela ya Izaki, Yandi ta sadisa nge mpi na mambu na mpulusu, na mambu ya ndolula ya masumu na nge. Nge lenda kuma mukristo bubuyai. Nge lenda kuma mukristo kaka na sika nge ikele. Kaka binga zina na Yandi. Songa Yandi nde nge ke balula ntima sesepeiyai. Lomba Yandi kulolula nge, ebuna yangalala na mpulusu ya nene ya Yandi me pesa nge.

Kana nge me kuma mukristo bubuyai, songa mono na nima ya ecodim. Mono ta vanda na kiese, ti mono ta samba ti nge.

=== NSUKA YA LESO 74

Leso 75. Rebeka butaka Ezau ti Yakobi, ti Yakobi yibaka Ezau ya kimbuta na yandi.

Kuyantika 25:20-34

REVISIO:

Kubambuka lesa ya mposho me luta :

Nki mutindu Izaki bakaka nkento? [*Moniteur, bana lenda songa na nkufi mambu ya nene ya lesa me luta.*]

Kulanda devoir ya lesa ya mposho me luta :

Nani na mposho me luta sambaka Nzambi nde, kana ntangu kulunga, Yandi twadisa nge na bakala to na nkento ya mukristo ya nge fweti kwela ? [*Moniteur, songa kiese na konso mwana ya me meka kusala devoir na beto.*]

LESO YA BUBU YAI :

Kikuma ya lesa yai :

Na nsuka ya lesa yai, bana ta bakisa nde bantu kele mayele ve kana bo sola kiese ya masumu ya kele ntangu fioti, kansi yo ta nata mawa ntangu mingi. Yo yina, na ntwala kusala, bo ta yindula nki mambu ta landa—kana ya kiese to ya mawa.

Kikuma ya bana ya me yela :

(Na zulu ya kikuma beto me tuba :)

Leso yai ta longa ngindu ya « conséquences , suites, to résultats ». Bonso Galatia 6 :7 ke songa beto, yo kele mambu ya fweti landa mpila muntu me sola, me tuba, to me sala. Yo kele bonso bambuma ya mpila na yandi. Bo ta yantika kuyindula ve kaka kiese na minute yina, kansi mambu ya fweti landa, kana ya mbote to ya mbi.

Nti ya dilongi ya Nzambi :

Ata bantu sala mbi ya konso mutindu, Nzambi ke sala lukanu na Yandi.

Bankunga ya kwenda nzila mosi ti lesa yai :

Bi-bi-la ! (Vs. 1)

Mfumu Zaba Nzila na Mono

Mpasi ta Vanda Ve

Mwini na Mono

Sosa Ntete

Verse ya kulonguka :

Beno kudikusa ve, sambu bo ke sekaka Nzambi ve. Muntu ke katulaka bambuma yina ya yandi

ke kunaka.

Galatia 6 :7

Kuyantika lesa :

Mono ta songa beno bahistoire tatu ya nkufi. Beno kuwa mbote, ebuna na nima, beno ta songa mono nki kele kiteso mosi na kati ya bana yai 3.

Histoire ya ntete :

Samba vandaka na devoir ya longi me pesa yandi, kansi yandi zolaka ve kusala yo. Na ntima, yandi zolaka kusakana na football. Yo yina yandi sakanaka lumbu ya mvimba. Na ntangu ya longi lombaka bana kupesa devoir bo me sala, Samba vandaka na kima ve kupesa.

Histoire ya zole :

Kali vandaka nkento ya kitoko. Mbala mingi, bana babakala zolaka kusakana na yandi. Lumbu mosi, bakala zina ya Tino songaka Kali nde, “Nge nkento kuluta kitoko na ntoto ya mvimba. Mono zola nge mingi. Lumbu mosi, mono zola kukwela nge. Kali kwendaka kulala na Tino bonso bakala na yandi. Na nima ntangu fioti, yandi monaka nde yandi me baka divumu. Kansi Tino vandaka na mpila kukwela yandi ve, sambu bo yonso zole vandaka kaka bana ya kalasi.

Histoire ya tatu :

Mambu zabaka nde mama me longi yandi kuyobisa maboko na ntwala ya kudia. Yandi zabaka nde yo sadisaka nde bamikrobi ya mbi kukota nitu na yandi mingi ve. Kansi yandi zolaka kumanisa kudia nswalu, sambu yandi kwenda diaka kusakana na banduku na yandi. Yandi yobisaka ve maboko na yandi. Na nima ndambu bilumbu, yandi yantikaka kubela. Yandi vandaka na ngolo diaka ve kusakana na banduku na yandi.

Nki mambu vandaka kiteso mosi ya bo yonso tatu?

[Moniteur, mvutu beto ke sosa kele nde bo yonso tatu salaka mambu bo monaka ta pesa kiese, kansi na nsuka yo pesaka mpasi. Bo yindulaka ve mbote-mbote nki lenda landa mpila bo salaka. Kana bana tuba mambu ya nkaka, tuba, “ee, ti nki ya nkaka ? »]

Na lesa na beto ya Bible ya beto ke landa na mukanda ya Kuyantika, mwana mosi ya Izaki salaka na mpila ya pesaka yandi kiese ntangu fioti, kansi na nima, yo pesaka mawa ntangu mingi. Beto kangula na Kuyantika, kapu 25, nzila ya kutanga 20.

Malongi ya nene ya lesa na bandambu 7:

75.1. Rebeka butaka ve bamvula 19. Izaki sambaka Nzambi, ebuna yandi bakaka divumu.

Kutanga: Kuyantika 25 : 20-21, 26b

20 Izaki vandaka me kuma bamvula makumi iya (40) ntangu yandi kwelaka Rebeka. Rebeka vandaka mwana ya Betuele, yandi vandaka mpi mpangi ya Labani. Betuele vandaka muntu ya dikanda ya Arami na nsi ya Mezopotamia.

21 Rebeka, nkento ya Izaki, vandaka na bana ve, mpidina Izaki sambaka Mfumu Nzambi sambu Yandi pesa bo mwana. Mfumu Nzambi waka bisambu na yandi, ebuna Rebeka bakaka divumu

26b . . . Ntangu bana yina butukaka, Izaki vandaka me kuma bamvula makumi sambanu (60).

Kuyula bana:

- Izaki vandaka bamvula ikwa ntangu yandi kwelaka Rebeka ? (Bamvula 40)
- Bo butaka ntangu yandi me lungisa bamvula 60. Yai ke songa nde bo kingaka bamvula ikwa sambu na mwana? (Bamvula 19 to 20)
- Nki mutindu bo bakaka mwana na nima ya bamvula 20 ? (Izaki sambaka Nzambi kulomba mwana.)

Bana sala sambu na kusonga nki me salama :

Bana yonso sala bageste bonso bo me samba Nzambi nde Rebeka kubaka divumu.

Bana yimba ti kina:

Izaki sambaka Nzambi:

"Bika Rebeka buta."

Nzambi waka bisambu,

Ti Rebeka bakaka divumu.

75.2. Bana mapasa vandaka kukwana na kati ya divumu. Nzambi tubaka nde bambuta ya makanda zole vandaka kunwana na kati na yandi, ti bo ta landa kaka kunwana.

Kutanga: Kuyantika 25 : 22-23

22 Ntangu bana-mapasa vandaka kunwana na kati ya divumu ya Rebeka, yandi tubaka nde: "Kana yo kele mpidina, nki mfunu na mono na kuzinga?" Yandi sambaka Mfumu Nzambi sambu na mambu yai.

23 Mfumu Nzambi tubilaka yandi nde : « Makanda zole ya bantu kele mwamu na divumu na nge. Nge ta buta bana zole ; bana yango ta zolanaka ve bo na bo, bana na bo mpi ta vandaka bambeni bo na bo. Dikanda mosi ta luta dikanda ya nkaka na ngolo, dikanda ya mbuta ta sadilaka dikanda ya leki."

Kuyula bana:

- Izaki lombaka Nzambi mwana. Kansi Nzambi pesaka bo bana ikwa ? (Bana zole. Mapasa. Nzambi pesaka double yina ya yandi lombaka.)

- Bana zole yina, bo vandaka kusala nki na divumu ya Mama Rebeka ?
(Bo vandaka kunwana na kati ya divumu.)
- Rebeka salaka nki sambu na kunwana na bo.
(Yandi sambaka Nzambi.)
- Nki mutindu beto zaba nde yandi vandaka na dekurajeman ?
(Yandi tubaka nde, Kana mpidina, nki mfunu ya mono kuzinga ?)
- Keti Nzambi tubaka nde bana yai zole ta zolana, to bo ta zolana ve ?
(Bo ta zolana ve, ti bana na bo mpi ta zolana ve.)
- Na kati na bo zole, nani ta sadila nani ?
(Ezau, mbuta na kati na bo, ta sadila leki. Yai ke kwenda nzila mosi ve ti mpila ya beto ke sala. Yo vandaka bonso mambu ya yituka.)

Bana sala sambu na kusonga nki me salama :

Bana yonso sala bageste bonso bo ke nwana bo na bo.

Bana kuyimba ti kukina :

Makanda zole vandaka kunwana na divumu.

75.3. Yandi butaka mapasa Ezau ti Yakobi, ti bo vandaka ya luswaswanu mingi.

Kutanga : Kuyantika 25 : 24-26a

24 Bilumbu ya kubuta lungaka, Rebeka butaka bana-mapasa.

25 Mwana ya ntete vandaka na nsuki ya mbwaki, nitu na yandi ya kifuluka na mika mingi bonso mukanda ya mbisi. Bo pesaka yandi zina Ezau.

26a Mwana ya zole, ntangu yandi butukaka, yandi vandaka me simba dikulu ya mbuta na yandi, Ezau. Bo pesaka yandi zina Yakobi. . . .

Kuyula bana:

- Mbuta na kati ya bana, yandi vandaka nki mutindu ti nki zina?
(Yandi vandaka na nsuki ya mbwaki, ti mika mingi. Zina na yandi Ezau.)
- Leki na kati ya mapasa yai, yandi vandaka nki mutindu?
(Yandi simbaka dikulu ya mbuta na yandi. Zina na yandi Yakobi.)

Bana sala sambu na kusonga nki me salama :

Bana yonso songa misapi zole. Bo simba musapi mosi, ebuna bo tuba nde, « Ezau, mbuta, mika mingi na nitu. » Bo simba musapi ya nkaka, ebuna bo tuba nde, « Yakobi, leki, ke simba dikulu ya mbuta na yandi. »

Bana kuyimba ti kukina :

Mapasa butukaka, kansi kaka kunwana.

75.4. Ezau kumaka muzombi, kansi Yakobi zolaka kosalu ya bwala ; ebuna, Tata Izaki zolaka Ezau, kansi Mama Rebeka zolaka Yakobi.

Kutanga : Kuyantika 25 : 27-28

27 Bana ya Izaki yelaka. Ezau kumaka muntu ya ngolo na kuzomba bambisi, yandi vandaka kuzola kutambula na nseke. Kansi Yakobi vandaka muntu ya pima, yandi vandaka kubikala kaka na bwala.

28 Izaki vandaka kuzola Ezau mingi sambu yandi vandaka kumona kiese na kudia bambisi yina ya Ezau vandaka kunatila yandi, kansi Rebeka vandaka kuzola mingi Yakobi.

Kuyula bana :

- Ntangu bo yelaka, nki luswaswanu vandaka na kati na bo ?
(Ezau vandaka muzombi ya ngolo, kansi Yakobi vandaka muntu ya bantenta.)
- Keti bibuti na bo zolaka bo yonso zole kiteso mosi?
(Ikele ve. Izaki zolaka Ezau sambu yandi zolaka kudia bambisi ya Ezau natilaka yandi, kansi Rebeka vandaka kuzola Yakobi.)

Bana sala sambu na kusonga nki me salama :

Bana yonso songa misapi zole. Bo simba musapi ya ntete, ebuna bo tuba nde, « Ezau, muzombi ya ngolo. » Bo simba musapi ya zole, ebuna bo tuba nde, « Yakobi, muntu ya bwala. » Bo nangula musapi ya ntete diaka. Bo tuba nde, « Mono Ezau. Tata Izaki ke zola mono mingi. » Bo nangula musapi ya zole, ebuna bo tuba nde, « Mono Yakobi. Mama Rebeka ke zola mono. »

Bana kuyimba ti kukina :

Ezau muzombi ya ngolo, kansi Yakobi muntu ya bwala.

Tata zola Ezau, kansi mama zolaka Yakobi.

75.5. Kilumbu mosi, Ezau vutukaka na kuzomba ; yandi vandaka nzala mingi. Yakobi vandaka kulamba, ebuna yandi lombaka Yakobi kupesa yandi madia.

Kutanga : Kuyantika 25 : 29-30

29 Kilumbu mosi Yakobi vandaka kulamba supu. Ezau katukaka na nseke kuna ya yandi kwendaka kuzomba bambisi. Yandi kwisaka kukota na nzo, yandi vandaka me lemba mingi.

30 *Ebuna yandi tubaka na Yakobi nde: "Mono ke wa nzala mingi ; pesa mono ndambu ya supu yai ya mbwaki, mono dia." (Yo yina bo pesaka Ezau zina ya nkaka Edomi.)*

Kuyula bana:

- Ezau lombaka nki ya Yakobi?
(Supu ya mbwaka ya yandi vandaka kulamba.)

Bana sala sambu na kusonga nki me salama :

Kabisa bana na bandambu zole. Mosi sala bonso Yakobi. Bo sala bageste bonso bo ke lamba madesu.

Ndambu ya nkaka sala bonso Ezau. Bo tuba na Yakobi nde, « Mono me tambula mingi sambu na kuzomba bambisi. Mono me lemba, ti mono ke na nzala. Pesa mono madia. »

Bana kuyimba ti kukina :

Ezau vandaka na nzala, yandi lombaka Yakobi supu.

75.6. Yakobi lombaka yandi kutekila yandi nswa ya kimbuta na yandi sambu na madia, ti Ezau ndimaka.

Kutanga : Kuyantika 25 : 31-33

31 *Kansi Yakobi nde : "Mono ke pesa nge supu yai kana nge tekila mono kimbuta na nge."*

32 *Ezau nde : "Mambu ve, mono ke fwa na nzala ; nki mfunu ya kimbuta na mono ?"*

33 *Yakobi nde : "Zenga ntete Nzambi nde nge ta pesa mono kimbuta na nge. » Ezau zengaka Nzambi, yandi tekaka kimbuta na yandi na Yakobi.*

Kuyula bana :

- Nki mutindu Leki Yakobi bakaka kimbuta ya fami ?
(Ezau me katuka na kuzomba bambisi, yandi vandaka na nzala mingi, ebuna Yakobi songaka yandi nde yandi ta tekila yandi supu sambu na kimbuta ya fami. Ezau ndimaka, ebuna kimbuta kwendaka na yandi.)

- Nki zina ya nkaka bo bingaka Ezau?
(Edomi, sambu yandi tekaka kimbuta sambu na madesu ya mbwaki.)

Bana sala sambu na kusonga nki me salama :

Ndambu ya bana ya ke sala bonso Yakobi, bo tubila Ezau nde : « Pesa mono kimbuta na nge, ebuna mono ta pesa nge madesu yai. »

Ndambu ya bana ya ke sala bonso Ezau, bo tuba nde : « Mono lenda kudia kimbuta ve. Kima ve, nge baka yo. Kaka pesa mono madesu sesepeyai. »

Bana kuyimba ti kukina :

Yakobi lombaka Ezau nde : « Kupesa mono kimbuta na nge. »

Yandi lombaka Ezau ntalu mosi ya nene.

75.7. Ezau zolaka madia ya yandi lenda kudia kaka mabala mosi. Yandi monaka yo kuluta mfunu, ti kimbuta na yandi mfunu mingi ve. Yo yina, yandi tekaka kimbuta na yandi.

Kutanga : Kuyantika 25: 34

34 Ebuna Yakobi pesaka yandi ndambu ya mampa ti supu ya madeso. Ezau diaka imene, yandi kwendaka. Mutindu yo yai Ezau buyaka kimbuta na yandi, yandi monaka yo bonso kima ya mpamba.

Kuyula bana:

- Ezau monaka kimbuta na yandi nki mutindu ?
(Yandi monaka yo bonso kima ya mpamba.)

Bana sala sambu na kusonga nki me salama :

Ndambu ya bana ya ke sala bonso Ezau, bo tuba nde, « Supu ya madeso. Kiese ya 10 minutes.” Ndambu ya bana ya ke sala bonso Yakobi, bo tuba nde “Kimbuta—Kiese bamvula mingi.”

Bo yonso tuba na kimvuka nde, “Nani me sola mambu ya mbote?”

Bana kuyimba ti kukina :

Ezau yindulaka kiese kaka ya bubuyai. Ebuna, Leki bakaka kimbutu ya fami.

Kumanisa lesa :

Ezau vandaka mbuta sambu yandi basikaka ntete na divumu ya mama. Bonso mbuta, yandi vandaka na nswa, na nima ya lufwa ya tata, kubaka bima na yandi mbala zole. Mbandu, kana bana zole vandaka, bo ta kabisa bima ya tata na bandambu tatu. Mbuta ta baka bandambu zole ti leki ta baka kaka ndambu mosi. Na kati ya kimbuta mpi, lusakumunu ya tata vandaka. Na lukanu ya Nzambi, muntu ya vandaka na kimbuta, yandi ta kuma mbuta ya Mesia-Mvulusi ya Nzambi me silaka, mpi.

Nani vandaka mbuta ? (Ee, Ezau basikaka ntete.) Na nswa ya dikanda na yandi, yandi fweti baka lusakumunu yina yonso. Kansi lumbu mosi, yandi vandaka na nzala, yo yina, yandi tekaka kimbuta na yandi na leki na yandi Yakobi. Yandi yindulaka kiese ya minute kumi ya yandi ta dia madia ya Yakobi me lamba. Yandi tekaka kimbuta na yandi, ebuna yandi vilaka nki?

(Bimvwama mingi, sambu na nsuka ya kapu 24, beto tanga nde Abrahama me fwaka dezia.

Yandi mpi vilaka lusakumunu ya tata, yandi mpi vilaka mpila kukuma mbuta ya Mesia-Mvulusi na beto, Yesu Kristo.) Dilonga ya madia ya Yakobi, yo vandaka ntalu miiiingi !

Yai songaka mpi nde mambu ya Nzambi, Ezau monaka yo mambu ya nene ve. Mabanza yina, yandi pesaka yo na bana na yandi, ebuna bo kumaka dikanda mosi ya monaka Nzambi mfunu mingi ve. Mawa na mawa ! Nki pri ya nene Ezau pesaka sambu na kiese ya ntangu fioti !

Devoir sambu na bana ya me yamba Yesu dezia :

Beno ya tuba nde beno kele bakristo, ntangu beno ke zenga kana kusala yai, to kusala yina, keti beno ke yindula nki ta landa mambu ya beno me zenga?

Beno bambuka bana 3 ya beto waka bahistoire na bo na luyantiku ya lesu ?

Samba solaka kubula football na ntangu ya yandi fweti sala devoir. Nki yandi banzaka ta landa? Yandi fweti bakisa nde yandi ta konda devoir kupesa longi na yandi.

Kali salaka bizumba ti bakala Tino. Kiese na yo vandaka kaka ntangu ya fioti. Nki yandi banzaka ta landa ? Keti yandi bakisaka ve nde yina kele mpila Nzambi me pesa bankento kubaka divumu ?

Mambu zabaka nde yandi fweti yobisa maboko, kansi yandi yindulaka kaka kiese ya kusakana na banduku ntangu fioti. Keti yandi kwikilaka ve ndinga ya mama nde maladi ke landa kana beto ke yobisa ve maboko ? Kiese ya kusakana vandaka ndambu ya lumbu mosi. Mawa ya maladi vandaka bilumbu mingi.

Devoir mono ke pesa beno bakristo na mposo yai, yo yai : Konso mambu ya nge sala, yindula nki ta landa yo. Sala na mpila nde, mambu ya ta landa, yo ta vanda kiese.

Kubinga bana ya me yamba Yesu ntete ve :

Awa na kati na beno mpi ikele bana ya nkaka ya me yamba Yesu ntete ve. Beno me balula ntima ve sambu na kukuma mukristo. Kana nge yamba Yandi ve, nki ta landa na lufwa na nge ? Yo ta vanda ve kiese mvu ya mvu ti Yesu Kristo na zulu. Nge me sola nde nge ke na mfunu na Yandi ve. Kaka mawa mvu ya mvu na bilungi ke kinga nge.

Kansi, kana nge ta balula ntima bubuyai sambu Yesu kota, kiese ya zulu lenda vanda na nge, mpi. Keti nge ta zenga mambu sambu na Yesu bubuyai ? Keti nge ta kuna madeso na nge na bilanga ya Yesu ? Kana nge ke na mfunu ya lusadisu na mambu yina, kwisa na mono na nima ya ecodim bubuyai. Songa mono nde, "Mono zola yamba Yesu." Mono ta vanda na kiese kusadisa nge.

=== NSUKA YA LESO 75

Leso 76. Izaki tubaka luvunu—bonso tata na yandi salaka ntete.

Kuyantika 26:1-10

REVISIO:

Kubambuka lesa ya mposho me luta :

- Na nsuka ya lesa me luta, Kuyantika kapu 25, nani vandaka na kimbuta ya fami ya Izaki ? (Yakobi)
- Yakobi bakaka kimbuta nki mutindu, sambu Ezau butukaka bonso mbuta ya fami ? (Ezau vandaka na nzala. Yakobi lombaka yandi kutekila yandi kimbuta ya fami sambu yandi kupesa Ezau supu ya madesu. Ebuna Ezau ndimaka.)
- Na ntima na nge, nge mona Ezau nki mutindu ? Yakobi nki mutindu ?
[Longi, bana lenda pesa mabanza na bo.] (Sambu na mono, mono mona Ezau bonso muntu ya ke yindula mambu ya Nzambi mingi ve, ya ke tanga yo bonso mambu mosi ya mfunu ve. Mono ke mona Yakobi bonso muntu ya zola simba okazio kudipusa yandi mosi na ntwala.)

Kulanda devoir ya lesa ya mposho me luta :

Na mposho me luta, beto lombaka beno bakristo nde na mposho yai me luta, beno yindula, « Kana mono sala mutindu yai, nki mambu ta landa ? » Nani ta songa beto nki mutindu yo kwendaka ? Beno yindulaka nki mambu ?

LESO YA BUBU YAI :

Kikuma ya lesa yai :

Na nsuka ya lesa yai, bana ta bakisa nde, bantu ya nkaka ke tala mutindu bo ke sala, bo mpi kele kulanda mbandu na bo, kana yo kele mbote, to kana yo kele mbi. Yo yina, bo ta tula ngolo kusala mbote na mpila ya bantu ya nkaka lenda landa bo na kiese.

Bankunga ya kwenda nzila mosi ti lesa yai :

Landa, Mo' Ta Landa Nge, Mfumu Mfumu Zaba Nzila na Mono
O, Luvunu Yambula

Verse ya kulonguka :

(Yesu nde :) Mono me songa beno mbandu, sambu beno kusala mutindu Mono me sala beno.
Yoane 13 :15

Kuyantika lesa :

Tata ya Sali vandaka na makasi mingi sambu Sali me vwenza Nzambi. Tata tubaka na ndinga mosi ya ngolo. Luse na yandi balulaka mutindu ya nkaka. Sali zabaka nde yandi vandaka na trouble. « Nge lenda ve vwenza Nzambi mutindu yina ! » Tata tubaka. « Nzambi zola yina ve ! Yina ikele ve mpila ya kutuba .

Na nima yandi me tuba mingi, tata talaka Sali na meso. « Sambu na nki nge ta tuba mutindu yina ? » yandi yulaka .

Sali vandaka pima. 'Keti yandi lenda tuba yo ?' yandi yindulaka.

« Mono yulaka nge kestio, » tata tubaka.

Silence. Sali tubaka kima ve.

« Mono yulaka nge kestio, » tata tubaka diaka. « Sambu na nki nge ta tuba mutindu yina ? »

Sali talaka tata. Yandi yantikaka kutuba, malembe, malembe. « Mono ke mona nge tuba mutindu yina, » Sali tubaka. « Mono zolaka kuvanda bonso nge. »

Tata zabaka ve nki kutuba. Yandi bakisaka nde yandi lenda ve pesa ndola na Sali na mambu ya yandi mpi vandaka kusala. Yandi monaka nsoni nde mwana na yandi me landa yandi na mpila ya mbi bonso yina. Yandi bakisaka nde mbandu na yandi vandaka mfunu mingi sambu na mwana na yandi.

Na baleso ya nkaka, beto me mona nde, Tata ya Izaki, Papa Abrahami, yandi tubaka luvunu nkento na yandi vandaka nani. [Kuyantika III, Leso 41, Kuyantika kapu 12]

Izaki vandaka me buta ntete ve ntangu Abrahami tubaka luvunu yina. Kansi mbala ya nkaka bo solulaka yo mbala mingi na fami, mutindu beto ke solula mambu ya me kwisila beto, mpi mambu ya bo me sala. Izaki waka mpila tata kusaka Mfumu ya Ezipte, ti yo pesaka yandi mbandu. Na lesa yai, beto ta mona nki mutindu mbandu ya tata salaka na yandi. Kuyantika kapu 26.

Malongi ya nene ya lesa na bandambu 5 :

76.1. Izaki kwendaka na ntoto ya Filistia sambu ntangu ya nzala me kota na sika yandi vandaka.

Kutanga : Kuyantika 26:1-2

1 Nzala ya nkaka kotaka na ntoto bonso nzala yina vandaka na ntangu ya Abrahami, Ebuna Izaki kwendaka na Abimeleki, mfumu ya nsi ya Filistia; yandi vandaka kuzinga na bwala Gerare.

2 Mfumu Nzambi kwisaka kumonika na Izaki ; Yandi tubilaka yandi nde : "Nge kwenda na Ezipte ve, nge fweti bikala na ntoto yai ya Mono ke songa nge na kubikala."

Sambu na kumona baleso ya nkaka bonso yai ya dibundu na nge lenda sadila, tala site yai :
www.teachingforafrica.com , un site des « Ministères pour Chaque Enfant »

Kuyula bana :

- Nki mambu salamaka ya pusaka Izaki kukwenda na ntoto ya Filistia ?
(Ntangu ya nzala. Yai salamaka mbala na mbala na ntoto yina, sambu bisika ya zelo vandaka mingi.)
- Izaki kwendaka na nani ?
(Na Abimeleki, mfumu ya ntoto ya Filistia. 'Abimeleki' vandaka zina ya muntu ve, kansi titre bonso 'mfumu'.)
- Nzambi songaka Izaki nki?
(Kukwenda ve na Ezipte, kansi kubikala na nsi ya Yandi vandaka kusonga yandi.)
- Keti Izaki lemfukaka?
(Ee, yandi kwendaka ve na Ezipte, kansi yandi vandaka kubikala na ntoto ya Filistia, na maboko ya Abimeleki to Mfumu na bo.)

Bana kusala sambu na kusonga nki me salama :

Bana yonso sala bageste kusonga nde nzala me simba bo.

Na nima, bo sala bonso Nzambi. Bo tuba nde, "Izaki! Kwenda na Ezipte ve, kansi na Filistia.")

Bana kuyimba ti kukina :

Nzala simbaka Izaki, ye yandi kwendaka na Filistia.

76.2. Nzambi monikaka na Isaki ti songaka yandi nde Yandi ta vanda ti yandi, Yandi ta sakumuna yandi, yandi kwenda ve na Ezipte, kansi kubikala kuna.

Kutanga : Kuyantika 26 :3-6

3 (Nzambi ke tuba na Izaki) Vanda awa ; Mono ta vanda na nge, mono ta sakumuna nge. Mono ke pesa bantoto yai yonso na maboko na nge ti ya bana na nge. Mono ta lungisa mambu ya Mono silaka tata na nge Abrahami.

4 Mono ta pesa nge dikanda ya bantu mingi, bo ta vanda bonso bambwetete na zulu. Ebuna Mono ta pesa bo bantoto yai yonso. Bantu yonso ya nsi-ntoto ta lombaka Mono na kusakumuna bo mutindu Mono sakumunaka bana na nge. »

5 Mono ta sadisaka nge sambu Abrahami lemfukilaka Mono, yandi landaka mpi bansiku na Mono.

Kuyula bana :

- Nani songaka Izaki kubikala awa ?
(Mfumu Nzambi)

- Ntoto ya Filistia vandaka na maboko ya Abimeleki na bo ntangu yina. Kansi nki Nzambi silaka Izaki sambu na ntoto yina ?

(Nzambi ta pesa yo na Izaki ti na bana na yandi, sambu bo kele bana ya Abrahami, ti Yandi silaka bo ntoto yina.)

- Sambu na nki Nzambi ta sadisa yandi ?
(Sambu tata na yandi Abrahami lemfukilaka Nzambi ti landaka bansiku na Yandi.)

Bana kusala sambu na kusonga nki me salama :

Bana kabana na bandambu tatu-tatu. Na konso ndambu, mwana mosi ta sala bonso Nzambi, mosi bonso Abrahami, mosi bonso Izaki.

Mwana ya ke sala bonso Nzambi ta sala geste bonso yandi ke pesa Abrahami kima. Yandi ta tuba nde, « Mono silaka kusakumuna Abrahami. » Abrahami sala bonso yandi ke baka lusakumunu yina, ke simba yo na yandi.

Na nima, « Nzambi » sala geste bonso yandi ke pesa Izaki kima. Yandi ta tuba nde, « Ti bana na yandi, mvu ya mvu. » « Izaki » sala bonso yandi ke baka lusakumunu yina, ke simba yo na yandi.

Bana kuyimba ti kukina :

Mono Nzambi sakumunaka Abrahami
Mono ta sakumuna nge.

76.3. Izaki kusaka babakala ya bwala yina na mambu ya Rebeka, yandi vandaka nani.

Kutanga : Kuyantika 26 : 6-7

6 Yo yina Izaki tungaka na bwala Gerare.

7 Babakala ya bwala yina vandaka kuyula Izaki sambu na nkento na yandi nde : "Yai nani na nge ?" Yandi vandaka kutuba nde : "Yai kele mpangi na mono ya nkento," (sere na mono) sambu yandi monaka boma na kundima nde: "Yai kele nkento na mono." Yandi monaka boma nde mbaimbai bantu yina lenda kufwa yandi, mpidina bo baka Rebeka sambu yandi vandaka kitoko mingi.

Kuyula bana :

- Ntangu babakala ya bwala Gerare monaka nkento na yandi Rebeka, bo yulaka Izaki nki ?
(Yai nani na nge ?)
- Yindula. Nki zolaka kuvanda mvutu ya kieleka ?
(Yandi nkento na mono.)

- Kansi Izaka pesaka ve mvutu ya masonga. Yandi kusaka bo nki mutindu? (Kutuba nde Rebeka vandaka mpangi na yandi ya nkento.)
- Na lesa mosi ya ntama, beto me mona muntu ya nkaka tuba luvunu bonso yai. Yandi nani? (Abrahami, tata ya Izaki. Yandi tubaka nde nkento na yandi Sara vandaka mpangi na yandi.)

NB sambu na bana ya me yela : Mvutu ya Abrahami vandaka ndambu to demi kieleka, ti ndambu to demi luvunu. Sara vandaka mwana ya tata na yandi, kansi ya mama ya nkaka. Yandi vandaka demi-sere. Kansi Abrahami kusaka mpi, sambu Sara vandaka ve kaka sere to mpangi na yandi, kansi yandi vandaka mpi nkento na yandi.

Kansi, ntangu Izaki landaka mbandu ya tata na yandi, yina ya yandi tubaka vandaka kaka luvunu yonso. Rebeka vandaka ve sere na yandi, kansi kaka mpangi ya nkaka.

- Nki pusaka Izaki kukusa Abimeleki mutindu yina? (Yandi yindulaka nde bantu ya sika yina, bo ta mona nde Rebeka vandaka kitoko, ebuna bo ta kufwa yandi sambu bo lenda kwela Rebeka.)

Bana kusala sambu na kusonga nki me salama :

Bana tuba bonso Isaki: "Ata nge Rebeka kele nkento na mono, beto ta tuba nde nge kaka mpangi."

Bana kuyimba ti kukina :

Abrahami kusaka luvunu,
Ti mwana na yandi, mpi.

Izaki tubaka luvunu, nde
Yai kaka mpangi na mono.

76.4. Abimeleki Mfumu ya Filistia monaka nde Izaka me kusa bo, ebuna yandi nganinaka yandi.

Kutanga : Kuyantika 26 : 8-9

8 Izaki vandaka me zinga dezia mwa-bilumbu mingi na Gerare. Kilumbu mosi Abimeleki, mfumu ya Filistia, vandaka kutala na fenetre, yandi monaka Izaki ke sakana na Rebeka.

9 Ebuna Abimeleki bingaka Izaki, yandi yulaka yandi nde: "Si yai kele nkento na nge. Sambu na nki nge tubaka nde yandi kele mpangi na nge?" Izaki nde: "Mono banzaka nde bo ta fwa mono kana mono tuba nde yandi kele nkento na mono."

Kuyula bana :

- Nki mutindu Izaki kwisaka kubakisa nde Izaki me kusa yandi ?
(Yandi monaka Izaki ke sakana na Rebeka, bonso kusimba yandi na mpila ya muntu ke simba nkento na yandi.)
- Abimeleki bingaka Izaki ti yulaka yandi nki ?
(Sambu na nki nge me kusa mono ?)
- Izaki pesaka nki excuse na mpila yandi me kusa ?
(Yandi vandaka na boma nde bo ta fwa yandi sambu bo kubaka nkento na yandi.)

Bana kusala sambu na kusonga nki me salama :

Bana sala bageste bonso bo kele Abimeleki ke mona Izaki kusakana na Rebeka. Bo mona bonso kuyituka. Bo tuba nde, "Nki mambu yai? Nkento yina fweti vanda nkento ya Izaki !"

Bana kuyimba ti kukina :

Luvunu na yandi kwisaka kumonika.

76.5. Abimeleki songaka Izaki nki zolaka kuvanda nsuka ya luvunu na yandi.

Kutanga : Kuyantika 26 : 10

10 Abimeleki nde : «Nki nge me sala beto? Kubika fioti muntu mosi awa na beto zolaka kulala na nkento na nge, ebuna nge zolaka kumona beto bantu ya mbi, kisi ve yo kele mbi na nge.»

Kuyula bana :

- Abimeleki monaka nki mambu ya mpasi na mpila Izaki salaka ?
(Kubika fioti muntu na bo lenda baka Rebeka bonso nkento na yandi. Kana mambu yina salama, Izaki ta mona bo mbi, kansi kieleka mbi zola vanda na yandi.)
- Keti Abimeleki tubaka na mpila ya mbote?
(Ee. Yo lenda salama mutindu yina. Luvunu na yandi lenda nata bampasi mingi.)

Bana kusala sambu na kusonga nki me salama :

Bana yonso nikisa musapi na makasi bonso bo ke nganina Izaki.

Bana kuyimba ti kukina :

Abimeleki songaka Izaki mbi yandi me sala.

Kumanisa lesa :

Mambu ya mawa, ntangu mupani bonso Abimeleki fweti tendula na muntu ya Nzambi mbi ya yandi me sala ! Yindula. Abrahami yantikaka na kutuba luvunu. Mwana na yandi Izaki me

Sambu na kumona baleso ya nkaka bonso yai ya dibundu na nge lenda sadila, tala site yai :
www.teachingforafrica.com , un site des « Ministères pour Chaque Enfant »

landa kusala kaka mutindu yina. Keti nge banza nde bana ya Izaki ta vanda bantu ya tuba kieleka ? Mono banza ve.

Konso ntangu, bantu ya nkaka ikele kutala mpila beto ke sala, kana ya mbote to ya mbi. Bantu ya nkaka mpi kele kulanda beto. Keti beto ta twadisa bo na mpila ya mbote, to ya mbi?

Devoir sambu na bana ya me yamba Yesu dezia :

Beno ya zaba nde beno me kuma bakristo, devoir mono ke pesa beno, yo yai: Na mposo yai, yindula mbote yonso ya nge yindula kusala, ti yonso ya nge yindula kutuba. Kana nge zola ve mambu yina kumonika, kusala yo ve. Kana nge zola ve bantu ya nkaka kulanda mbandu na nge na mambu yina, kusala yo ve. Tula ngolo kusala ti kutuba kaka na mpila ya nge ta zola bantu ya nkaka kulanda.

Kubinga bana ya me yamba Yesu ntete ve :

Kansi nki nge ta sala kana nge zaba ve nde nge me kuma mukristo ? Mambu ya ntete ikele kuzaba nde, ata nge me sala masumu, Nzambi zola nge mingi. Yandi tindaka Mwana na Yandi Yesu Kristo kukwisa kuzinga na kati na beto, yandi kufwa na zulu ya kulunsi sambu na kubaka ndola ya masumu ya nge. Kana nge kwikila yina, yo ke bikala kaka kuzenga na ntima nde nge ta landa Yandi. Binga yandi na ntima na nge na lombilu bonso yai :

Tata Nzambi, mono bakisa nde mono me sala masumu mingi. Mono bakisa nge yai kele mambu ya nene ya ke fwaka kinduku na mono ti nge. Mono kwikila nde Nge tindaka Mwana na Nge Yesu Kristo sambu na kuvutula mono na kinduku yina. Yandi fwaka sambu na masumu na mono. Matondo, Nzambi. Yesu Kristo, kwisa sesepi yai. Kota ntima ti luzingu na mono. Vanda Mvulusi ti Mfumu na mono. Sadisa mono kulanda nge bilumbu na mono yonso. Na zina ya Yesu Kristo, Amen!

Kana nge me balula ntima bubuyai na Yesu Kristo, mono ta vanda na kiese kuzaba yo. Kwisa na mono na nima ya ecodim, ti songa mono mpila nge me yamba Yesu.

=== NSUKA YA LESO 76

Leso 77. Isaki zola ve kunwanina banto ya masa-- Kuyantika 26:12-25

REVISIO:

Kubambuka lesa ya mposo me luta :

- Beto ke landa moyo ya Izaki, mwana ya Abrahami. Yandi vandaka muntu ya Nzambi, kansi na mposo me luta, beto monaka nde yandi salaka mbote to mbi ?
(Yandi salaka mbi.)
- Yandi salaka mbi nki mutindu ?
(Yandi tubaka luvunu nde Rebeka vandaka mpangi na yandi, kansi kieleka yandi vandaka nkento na yandi.)
- Yandi landaka mbandu ya nani na mambu yina ?
(Mbandu ya Tata Abrahami)

Kulanda devoir ya lesa ya mposo me luta :

Na mposo me luta mono pesaka devoir na beno ya zaba nde beto me kuma bakristo. Na yonso ya beno sala, ti ya yonso ya beno tuba, mono me lomba beno kuyindula nki mambu zole?

(1. Keti mono zola mambu yai kumonika ? Bambuka nde luvunu ya Izaka monikaka ata na meso ya mimpani. 2. Keti mono zola bantu ya nkaka kulanda mbandu yai?)

Nani ta songa beto mpila beno salaka na mambu yina ? *[Moniteur, kuwa mpila bana ta tuba, ti pesa bo kikesa kana bo me meka kulemfuka na devoir yina.]*

LESO YA BUBU YAI :

Kikuma ya lesa yai :

Kuzaba nde mfunu kele ve kunwanina konso kima. Nzambi zola bantu ya sosa ngemba kana mpila ikele. Yo yina, bana ta vanda nswalu ve kunwana, ti bo ta sosa ngemba.

Nti ya dilongi ya Nzambi :

Nzambi zola ngemba.

Nzambi ta pesa yonso beto ke na yo mfunu. Yo yina, mfunu kele ve kunwanina bima.

Bankunga ya kwenda nzila mosi ti lesa yai :

O Luvunu Yambua(Verse O Kunwana Yambula)

O Keba Maboko (O Keba mukristo nki nge sala-Kunwana ve !)

Verse ya kulonguka :

Beno tula ngolo mpenza na kuzinga na ngemba ti bantu yonso.

Roma 12 :18

Kuyantika leso :

Rolani zolaka kunwana mingi. Kana muntu ata simbaka kima na yandi, yandi kwendaka kunwanisa yandi. Kana muntu tubaka na mpila ya yandi zolaka ve, Rolani fweti kunwana ti yandi. Kana muntu talaka yandi na mpila ya yandi zolaka ve, kaka kunwana. Bantu vandaka kutina yandi. Bo zolaka ve kuvanda nduku na yandi. Bo zolaka ve kusakana ti yandi, to kusolula ti yandi mpi ve. Bo yonso kumaka na boma nde yandi ta nwanisa bo. Ntete, Rolani monaka nde yandi vandaka muntu ya nene sambu bana yonso wilaka yandi boma. Kansi yo vandaka kiese ve kuvanda kaka yandi mosi. Kiese ve kuvanda na muntu ve ya zolaka kuvanda ti yandi. Na nsuka, yandi monaka nde, kunwanisa bantu, yo me sadisa yandi ve. Yo me bebisa luzingu na yandi.

Na baleso yai, beto ke yindula mpangi na beto Izaki, mwana ya Abrahami. Na mposo me luta, beto monaka mambu ya mbi sambu na yandi. Nki yina? (*Ee, yandi kusaka luvunu.*) Kansi bubuyai, beto zola kumona mambu ya mbote sambu na yandi. Yandi vandaka ve nswalu kunwana. Yandi vandaka muntu ya mbote. Beto kele na mukanda ya Kuyantika, kapu 26, nzila ya kutanga 12.

Malongi ya nene ya leso na bandambu 8 :

77.1 Nzambi sakumunaka Izaki na bimvwama mingi.

Kutanga : Kuyantika 26 :12-13

12 Izaka salaka bilanga na ntoto yina. Mfumu Nzambi sakumunaka yandi, ebuna na mvula yo yina bilanga na yandi butaka bima mingi mpenza.

13 Izaki yantikaka kuzwa bima mingi tii yandi kumaka mvwama ya nene.

Kuyula bana :

- Nki mpila ya ntete Nzambi sakumunaka Izaki ?
(Na bilanga. Bilanga butaka bima mingi mpenza.)
- Nki mutindu ya nkaka Nzambi sakumunaka yandi ?
(Yandi zwaka bima mingi, ti yandi kumaka mvwama ya nene.)

Bana kusala sambu na kusonga nki me salama :

Bana sala bageste bonso bo ke baka bima ya bilanga mingi. Na nima bo sala bonso bo ke teka bima yina, ke zwa mbongo mingi.

Bana kuyimba ti kukina :

Nzambi sakumunaka Izaki
na bilanga na yandi.

77.2 Na kimpala, bantu ya Filistia fulusaka ntoto na mabulu ya masa ya tata na yandi timunaka, ti Abimeleki kulaka yandi.

Kutanga : Kuyantika 26 : 14-16

14 Bantu ya Filistia wilaka yandi kimpala sambu yandi vandaka na mameme ti bangombe mingi, yandi vandaka mpi na bampika mingi.

15 Yo yina bantu ya Filistia fulusaka ntoto na mabulu yonso ya masa yina ya bantu ya tata na yandi Abrahami timunaka.

16 Ebuna Abimeleki tubaka na Izaki nde: "Katuka na bwala na beto. Nge me kuma mvwama ya nene, nge me luta beto na ngolo."

Kuyula bana :

- Keti bantu ya Filistia vandaka na kiese na mpila Nzambi sakumunaka Izaki ?
(Ikele ve. Bo wilaka yandi kimpala.)
- Kimpala pusaka bo kusala nki mambu ya mbi ?
(Kufulusa mabulu ya masa ya Izaki na ntoto)
- Yindula. Yai pesaka yandi nki mpasi ?
(Bambisi na yandi ti bantu na yandi vanda na masa ve ya kunwa.)
- Abimeleki mpi, yandi salaka nki sambu na Izaki ?
(Abimeleki kulaka Izaki na bwala na bo.)

Bana kusala sambu na kusonga nki me salama :

Bana yonso na kimvuka, bo sala bageste bonso Izaki ntangu yandi monaka nde bantu ya Filistia me fulusaka banto na bo na ntoto. Na nima, bo sala bonso Izaki ntangu yandi vandaka kubasika na ntoto yina sambu Abimeleki me kula yandi.

Bana kuyimba ti kukina :

Kimpala kotaka na bantu

ti bo salaka Izaki mbi.

Kimpala kotaka na mfumu

ti yandi kulaka yandi.

77.3 Izaki sosaka ngemba, yo yina, yandi basikaka kukwenda kuzinga na nseke, ti yandi kangulaka diaka banto ya bantu me kanga.

Kutanga : Kuyantika 26 :17-18

17 Mpidina Izaki katukaka na bwala yina, yandi kwendaka kutunga na nseke ya Gerare.

18 Yandi timunaka diaka mabulu ya masa yina ya bo timunaka ntete na ntangu ya Abrahami. Mabulu yango yina bantu ya Filistia fulusaka yo ntoto na nima ya lufwa ya Abrahami. Ebuna Izaki pesaka mabulu yina bazina ya tata na yandi bikaka kupesa.

Kuyula bana :

- Ntangu Izaki katukaka na bwala, yandi tungaka wapi ?
(Na nseke ya Gerare)
- Yandi salaka nki kuna ?
(Yandi timunaka diaka mabulu ya masa, yina ya tata na yandi Abrahami timunaka ntete.)
- Bantu ya Filistia salaka nki ntangu yina ?
(Bo fulusaka mabulu yina na ntoto.)
- Yai mbala ikwa bo me sala yo ?
(Mbala ya zole.)
- Bantu ya Filistia me sala Izaki mbi mbala zole na mambu ya bantu ya masa. Keti Izaki ti bantu na yandi nwanaka ti bo sambu na yo ?
(Ikele ve. Bo kaka kwendaka kutimuna diaka bantu ya nkaka.)

Bana kusala sambu na kusonga nki me salama :

Bana sala bonso bo kele bantu ya ksalu ya Izaki, ke sala ngolo kutimuna mabulu ya masa. Na nima, bo tala na kuyituka mpi na mawa, kumona bantu ya Filistia kwisa kufulusa yo na ntoto diaka.

Bana kuyimba ti kukina :

Mbala ya zole bo timunaka bantu,
Mbala ya zole bantu fulusaka yo ntoto !

77.4 Basadi ya Izaki timunaka dibulu ya mpa ya masa ya kitoko, kansi bantu ya Filistia kwisaka kaka kunwanina yo.

Kutanga : Kuyantika 26 :19-20

19 Bantu ya Izaki timunaka dibulu ya nkaka na nseke yina, bo monaka nto mosi ya masa ya kitoko.

20 Bantu yina vandaka kukeba mameme ya bantu ya Gerare, bo kwisaka kuswanisa bantu ya Izaki nde: "Masa yai kele ya beto." Yo yina Izaki pesaka masa yina zina Eseki (disongidila nde kuswana).

Kuyula bana :

- Basadi ya Izaki timunaka diaka dibulu ya nkaka ya masa. Yai mbala ikwa bo me sala yo ?
(Mbala ya tatu.)
- Mbala yai, bantu ya Filistia fulusaka yo na ntoto ve. Kansi bo salaka nki ?
(Bo kwisaka kuswanisa bantu ya Izaki, kutuba nde masa yina vandaka na bo.)

- Kana basadi ya Izaki timunaka nto yina, nki mutindu bantu ya Filistia monaka nde yo vandaka nto na bo ? Nki beno banza ?
(Kaka mpila ya kuswana.)
- Izaki bingaka sika yina "Eseki," ya zola tuba "kuswana." Kansi kuswana yina—yo vandaka Izaki ya swanaka, to nani ?
(Izaki swanaka ve. Bantu na yandi ve. Yo vandaka bantu ya Filistia ya zolaka kuswana.)

Bana kusala sambu na kusonga nki me salama :

Kabisa bana na bandambu zole. Ndambu mosi vanda bantu ya Izaki. Bo sala ngolo kutimuna nto ya masa. Ndambu ya nkaka vanda bantu ya Filistia. Bo tuba kaka nde, "Nto yina kele ya beno ve. Nto yina kele ya beto."

Bana kuyimba ti kukina :

Bantu ya Filistia zolaka kuswana,
Kansi Izaki kuswanaka ve, ve, ve.

77.5 Basadi ya Izaki timunaka diaka dibulu ya mpa, kansi bo kwisaka mbala ya iya kunwanina yo.

Kutanga : Kuyantika 46 : 21

21 Bantu ya Izaki timunaka diaka dibulu ya nkaka. Bo swanaka mpi sambu na yo. Izaki pesaka dibulu yango zina Sitna (disongidila nde kimbeni.)

Kuyula bana :

- Bana ya Izaki timunaka diaka dibulu ya masa. Yai mbala ikwa bo me sala yo ?
(Mbala ya iya.)
- Bantu ya Filistia sala nki na dibulu yina ?
(Bo kwisaka diaka kunwanina yo.)
- Izaka pesaka sika yina Sitna. Zina yina zola tuba nki?
(Kimbeni.)
- Yo vandaka Izaki ya vandaka kusala kimbeni? To yo vandaka nani?
(Izaki ve. Yandi me zinga na ngemba kaka ti bantu ya Filistia. Yo vandaka bantu ya Filistia ya zolaka kuzinga na kimbeni ti yandi, kansi Izaki vutulaka kimbeni ve.)

Bana kusala sambu na kusonga nki me salama :

Bana tanga misapi iya sambu na kusonga nde mbala iya, bantu ya Filistia kwisaka kunwanina banto ya Izaki. Bo tanga, "Mbala mosi. Mbala ya zole," etc.

Bana kuyimba ti kukina :

Yimba diaka :

Bantu ya Filistia zolaka kuswana,
Kansi Izaki kuswanaka ve, ve, ve.

77.6 Izaki nwanaka ve, kansi yandi kwendaka kutimuna diaka dibulu mbala ya tanu.

Kutanga : Kuyantika 46 :22

22 Yandi katukaka na kisika yina, yandi kwendaka kutimuna dibulu ya nkaka. Na mbala yai, kuswana vandaka diaka ve. Yandi pesaka dibulu yina zina Rehoboti (disongidila nde kisika ya nene) ; yandi tubaka nde : "Ntangu yai Mfumu Nzambi me pesa beto kisika ya nene na kutunga na ntoto yai, mpidina beto ta vanda mbote."

Kuyula bana :

- Izaki nwanaka ve, ata bantu ya Filistia me meka kunwana ti yandi mbala iya. Yandi salaka nki?
(Yandi kwendaka kutimuna diaka nto mbala ya tanu.)
- Mbala yai ya tanu, nki salamaka ?
(Bantu ya Filistia kwisaka diaka ve kunwanisa yandi. Bo bikaka yandi na ngemba.)
- Izaki bingaka sika yina nki?
(Rehoboti, disongidila « sika ya nene »)
- Yandi zingaka kuna, ti yandi vandaka nki mutindu ?
(Yandi vandaka mbote.)

Bana kusala sambu na kusonga nki me salama :

Sadila diaka bandambu zole ya bana. Mosi sala bageste bonso bantu ya kisalu ya Izaki, ke timuna dibulu ya masa. Ya nkaka sala bageste bonso bantu ya Filistia. Bo kaka tala bantu ya Izaki, na nima bo kwenda.

Bana kuyimba ti kukina :

Ngemba! Kiese! Ngemba!

77.7 Nzambi silaka kusakumuna Izaki diaka, ebuna Izaki sambaka Nzambi na kiese.

Kutanga : Kuyantika 26 : 23-25

23 Izaki katukaka pana, yandi kwendaka na ndambu ya Beresheba.

24 Na mpimpa Mfumu Nzambi kwisaka kumonika na yandi. Yandi tubilaka Izaki nde: "Mono kele Nzambi ya tata na nge Abrahami. Kumona boma ve, Mono kele na nge. Mono ta sakumuna nge, Mono ta pesa nge dikanda ya bantu mingi. Mambu yai yonso Mono ta sala yo sambu na muntu na Mono Abrahami.

25 Izaki tungaka mesa-kimenga kuna, ebuna yandi sambaka Mfumu Nzambi. Na kisika yina yandi tungaka camp na yandi, bantu na yandi mpi timunaka dibulu ya masa.

Kuyula bana :

- Na nima ya mambu yai, Izaki kwendaka wapi ?
(Na ndambu ya Beresheba)
- Nzambi kwisaka na mpimpa kusonga Izaki nde Yandi Nzambi ta sakumuna yandi nki mutindu ?
(Kuvanda ti yandi, ti kupesa yandi dikanda ya nene)
- Yai vandaka nsilulu ya Nzambi silaka nani ntete ?
(Tata na yandi Abrahami)
- Izaki tungaka mesa-kimenga kuna sambu na kusala nki ?
(Sambu na kusamba Mfumu Nzambi)
- Yandi tungaka camp na yandi kuna, ti bantu ya kisalu salaka nki ?
(Bo timunaka diaka dibulu ya masa.)

Bana kusala sambu na kusonga nki me salama :

Bana yonso na kimvuka sala bonso bo ke sala mesa-kimenga sambu na kusamba Nzambi.

Bana kuyimba ti kukina :

Ngemba ! Kiese, Ngemba !

77.8 Na nsuka, Abimeleki kwisaka na kuwakana ti yandi.

Kutanga :

Tangila bana somere yai ya Kuyantika 26 :26-33 :

Na nsuka, Abimeleki ti mfumu ya armee na yandi, bo kwisaka kusosa kuwakana na Isaki.

Bo yonso ndimaka kusadisana. Na nima, bantu ya Izaki kwisaka kusonga yandi nde bo me mona nto ya masa ya mpa diaka. Bo yonso kwendaka na kiese ti na ngemba.

Kuyula bana :

- Mambu ya yituka! Bantu yai ya me zola mbala iya kuswana ti Izaki, ntangu yai bo me sala nki ?
(Bo kwisaka kusosa kuwakana ti yandi, ebuna bo zole ndimaka kusadisana.)
- Bambeni me kwisa kuvanda banduku. Bantu yonso kwendaka nki mutindu ?
(Na kiese ti na ngemba.)

Bana kusala sambu na kusonga nki me salama :

Bana yonso simbana na mapeka na bo. Bo tuba nde, "Kuwakana! Kuwakana! Kuswana ve,

kansi kuwakana !”

Bana kuyimba ti kukina :

Izaki kuswana ve,
Ti bambeni kitukaka banduku! Kiese!

Kumanisa lesa :

Izaki vandaka na rezo ya kunwana. Kansi yandi sosaka ngemba, ti Nzambi sakumunaka yandi. Yandi zwaka banto ya vandaka mfunu sambu na bambisi ti bantu na yandi, ti yandi vandaka kuzinga na ngemba ti bantu penepene na yandi. Kiese mingi kuzinga na ngemba !

Devoir sambu na bana ya me yamba Yesu dezia :

Beno bana ya zaba nde lumbu mosi, nge yambaka Yesu bonso Mvulusi na nge, mono ke pesa beno bakristo devoir yai :

Tula ngolo na mposo ya mvimba ke kwisa, kuswana ve ata fioti. Kana yai ikele mpasi sambu na nge, samba Nzambi bonso na verse ya beto ya bubuyai, « Nzambi, sadisa mono kuzinga na ngemba ti bantu yonso. »

Kubinga bana ya me yamba Yesu ntete ve.

Kansi nge, kana nge zaba ve nde nge me yamba Yesu Kristo, zaba nde nge ke bikala mbeni ya Nzambi. Yesu Kristo, Mwana ya Nzambi, kwisaka sambu na kufuta ndola ya masumu yonso ya nge, na mpila nde nge lenda kuma nduku ya Nzambi, ti mwana na yandi. Kana nge kwikila mambu yai, yo ke bikala nde nge zenga na ntima na nge yonso nde nge ta kuna madeso na nge na bilanga ya Yesu. Nge ta landa Yandi. Nge lenda kuma mukristo sesepiyai, kana nge ta zenga mambu yai. Kaka binga yandi na lombilu bonso yai :

Tata Nzambi, mono kwikila nde Yesu Kristo kele Mwana na Nge me kulumuka na zulu kuvanda Mvulusi na mono. Mono ndima nde mono ke na mfunu na Yandi. Mono ndima nde mono me sala mambu mingi ya Nge me zola ve—masumu. Mono zola kuvanda mukristo. Mono me zenga kulanda Nge tii na nsuka ya moyo na mono. Yesu Kristo, kota ntima ti luzingu na mono sesepiyai. Yobisa ntima na mono. Lolula masumu na mono. Mono zola kusala yo diaka ve. Sadisa mono yantika ntangu yai tii kuna kuzinga sambu na Nge. Matondo sambu Nge me lolula mono, mpi nge me kitula mono mulanda na Nge sesepi yai. Na zina ya Yesu, Amen!

=== NSUKA YA LESO 77

Leso 78. Na nzila ya luvunu, Izaki yibaka Ezau ya lusakumunu ya tata.

Kuyantika 27 yonso & 28:1-5

REVISIO:

Kubambuka diaka lesa me luta :

- Na mposho me luta, beto monaka nki mambu ya mbote sambu na Izaki?
(Ee, yandi buyaka kunwana. Yandi vandaka muntu ya ngemba. Nzambi zola ngemba na kati ya bantu.)

Kulanda devoir ya mposho me luta :

Nki vandaka devoir beto pesaka beno bakristo? Ee, kuswana ve na mposho yai, ti kusamba Nzambi kusadisa nge kuzinga na ngemba ti bantu yonso, bonso Bible ke songa beto na Roma 12:18.

LESO YA BUBU YAI :

Kikuma ya lesa yai :

Na nsuka ya lesa yai, bana ta bakisa nde, luvunu ke nata mpasi, ke kabisa bantu. Yo yina, bo ta buya kukusa bantu.

Verse ya kulonguka :

« Kutuba ve kitemwe ya luvunu sambu na mpangi na nge. »

Kubasika 20 :16 (9^{eme} na kati ya Bansiku 10 ya nene ya Nzambi pesaka Moize)

Bankunga ke kwenda nzila mosi ti lesa yai :

Masumu na Mono Me Kwenda (Luvunu na mono me kwenda)

Mo' ta Tuba Luvunu Ve

Nani Kele Ngolo ? (Nani kele kieleka ?)

O Luvunu Yambula !

Kuyantika :

Nani ta zola kuvanda na zina bonso « Muyibi » to « Nkwa-mbi » ? Ata muntu mosi ve. Kansi na ntangu ya Bible, bazina ya bantu, mbala mingi yo songaka bifu na bo, mpila bo vandaka na nsi

ya ntima. Izaki vandaka na bana zole, mapasa—Yakobi ti Ezau. Zina ya Yakobi, disongidila na yo, « Mukusi, » to « Nkwa-luvunu. » Yandi mpi nwanaka mingi na probleme yina.

Malongi ya nene na bandambu 8 :

78.1. Na ntwala yandi kufwa, Izaki zolaka kusakumuna Ezau bonso mbuta ya fami.

Kutanga : Kuyantika 27 :1-4

1 *Izaki kumaka mununi, meso na yandi mpi kufwaka. Yandi bingaka mwana na yandi ya ntete Ezau nde, "Mwana na mono Ezau !" Ezau tubaka nde: "E, mono yandi yai."*

2 *Ebuna Izaki nde : "Nge ke mona, mono me nuna, kubika fioti mono ke fwa ka mono.*

3 *Baka bunduki na nge ya tolotolo, kwenda sosila mono mbisi ya nseke.*

4 *Lambila mono madia yina ya kitoko, mutindu mono ke zolaka. Nge natila mono yo sambu mono kudia. Mono ke zola sakumuna nge mbala ya nsuka ntangu mono me fwa ntete ve. »*

Kuyula bana :

- Ntangu Izaki zabaka nde ntama ve yandi fweti kufwa, yandi bingaka nani sambu na kubaka lusakumunu na yandi ?
(Yandi bingaka Ezau, mbuta ya fami.)
- Sambu na nki Izaki monaka ve mbote ?
(Bonso yandi me nuna, meso na yandi me fwaka.)
- Izaki zola Ezau kupesa yandi nki na ntwala kubaka lusakumunu ?
(Madia ya mbisi ya yandi zolaka mingi, sambu yandi dia)

Bana sala sambu na kusonga nki me salama :

Bana yonso na kimvuka sala bageste bonso Izaki ke binga Ezau, ke tinda yandi kusosa mbisi sambu yandi dia, yandi sakumuna yandi.

Kuyimba ti kukina :

Ezau, mbuta ya fami,
Tata zola sakumuna nge.

78.2. Rebeka pusaka Yakobi kukusa tata na yandi sambu na kuyiba lusakumunu ya mbuta ya fami.

Kutanga somere yai ya Kuyantika 27 :5-13 :

Rebeka waka mpila Izaki tubaka na Ezau, yo yina, na nima Ezau me kwenda na kuzomba mbisi, yo yina yandi yidikaka lukanu sambu bo kusa yandi. Yandi tindaka Yakobi kusimba bana-bankombo zole ya kitoko sambu yandi lambila Ezau madia na mpila yandi zolaka.

Yandi bendaka Yakobi kunata yo na tata bonso yandi vandaka Ezau, sambu tata sakumuna yandi na sika ya Ezau. Yakobi vandaka na boma nde Papa ta zaba nde yandi kele Ezau ve, sambu nitu na yandi vandaka na mika mingi ve bonso nitu ya Ezau, kansi Rebeka pusaka yandi kaka.

Kuyula bana :

- Rebeka vandaka nani ?
(Rebeka vandaka nkento ya Izaki, mpi mama ya butaka mapasa Ezau, mbuta, ti Yakobi, leki.)
- Keti beno ke bambuka nani zolaka Ezau, ti nani zolaka Yakobi ?
(Papa Izaki zolaka Ezau mingi, kansi Mama Rebeka zolaka Yakobi mingi.)
- Rebeka songaka Yakobi kukwenda kuyiba lusakumunu ya mbuta ya fami nki mutindu ?
(Yandi simba bana bankombo ya kitoko, mama lamba yo sambu yo monika bonso mbisi ya Ezau me zomba, ebuna Yakobi pesa yo na papa bonso yandi kele Ezau, na mpila nde papa kupesa yandi lusakumunu ya mbuta.)
- Sambu na nki Yakobi vandaka na boma ?
(Sambu nitu na yandi vandaka na mika mingi ve bonso nitu ya Ezau. Kana papa kusimba yandi, yandi ta zaba nswalu nde yandi ke kusa yandi.)

Bana sala sambu na kusonga nki me salama :

Bana yonso simba maboko na bo, bo tuba nde, "Mono ke na mika mingi ve bonso Ezau. Papa ta mona nde mono ke kusa yandi."

Kuyimba ti kukina :

Mawa ! Mama Rebeka bendaka Izaki na mbi.
Mawa ! Bo yindulaka kukusa papa ya fami.

78.3. Rebeka lwatisaka Yakobi bonso Ezau, ebuna Yakobi kusaka papa Izaki nde yandi vandaka Ezau, mbuta ya fami. 27 :14-25

Kutanga : 15-25

15 Ebuna Rebeka bakaka bilele ya Ezau ya kitoko mingi, yandi lwatisaka Yakobi.

16 Yandi bakaka mikanda ya bana-bankombe, yandi lwatisaka Yakobi na maboko ti na nkingu.

17 Ebuna yandi pesaka yandi madia yina ya kitoko ti mampa ya yandi salaka.

18 Ntangu yai Yakobi kwendaka na tata na yandi, yandi tubaka nde : « Papa ! » Izaki vutulaka nde : « E, nani mwana ke binga mono ? »

19 Yakobi nde : « Yai mono Ezau, mwana na nge ya ntete. Mono me sala mambu yonso mutindu nge songaka mono. Pardo, telama nge dia madia yai ya mono me natila nge, mpidina nge ta zaba kusakumuna mono.»

20 Izaki yulaka yandi nde : "Nki mutindu nge me mona mbisi nswalu mpidiyai, mwana na mono?" Yakobi nde: "Mfumu Nzambi na nge me sadisa mono na kuzwa yo. »

21 Izaki tubaka na Yakobi nde: "Kwisa penepene, mono simba nge na nitu. Keti ya kieleka nge kele mwana na mono Ezau to ve ?"

22 Yakobi kwisaka penepene na tata na yandi, ebuna Izaki simbaka yandi. Yandi nde : "Ndinga na nge kele bonso ya Yakobi, kansi maboko na nge, ntangu mono me simba yo, mono ke wa bonso maboko ya Ezau."

23 Yandi zabaka ve nde yai Yakobi, sambu maboko na yandi vandaka mika bonso yina ya Ezau. Izaki zolaka kusakumuna yandi.

24 kansi yandi yulaka diaka nde: "Ya kieleka, nge kele mwana na mono Ezau ?" Yakobi nde: "E si, yai mono Ezau."

25 Izaki nde: "Pesa mono mbisi na nge mono dia, ebuna mono sakumuna nge." Yakobi pesaka yandi madia, yandi natilaka yandi mpi vinu.

Kuyula bana :

- Nki mutindu Rebeka ti Yakobi zolaka kukusa tata Izaki na mambu ya mika ya nitu ? (Bo tulaka mikanda ya bana-bankombo, bo lwatisaka yandi na maboko ti na nkingu.)
- Nki ya nkaka bo salaka sambu Izaki kubaka Yakobi bonso nde, yandi kuvanda Ezau ? (Bo lwatisaka Yakobi na bilele ya kitoko ya Ezau. Yo yina, ata papa kusimba yo, ata yandi kuwa nsudi na yo, yandi ta baka yo bonso bilele ya Ezau.)
- Yakobi nataka nki na papa ? (Madia ya kitoko ti mampa bonso papa zolaka)
- Sambu na nki bo salaka mambu yina yonso? (Sambu na kukusa papa, sambu na kuyiba lusakumunu ya mbuta ya fami)
- Ntangu Yakobi kotaka na papa, yandi tubaka nki ? (Yai mono Ezau, mwana ya nge ya ntete)
- Bandinga yina, yo vandaka kieleka to luvunu ? (Luvunu kaka.)
- Papa yulaka yandi nki ? (Nki mutindu nge me mona mbisi nswalu mpidiyai ?)
- Nki mvutu na yandi ? (Mfumu Nzambi na nge me sadisa mono na kuzwa yo.)

- Keti yina mvutu ya kitoko?
(Ikele ve. Mfumu Nzambi zola masonga. Awa yandi ke tuba luvunu, yandi mpi ke tanga zina ya Nzambi na nzila ya mpamba. Yai yonso zole keke mambu ya Nzambi ke zola ve.)
- Papa Izaka salaka nki ya songaka nde yandi vandaka na keti-keti kana yai vandaka Ezau to ve ?
(Yandi lombaka mwana yina kukwisa penepene sambu yandi simba yandi.)
- Nki salamaka ntangu papa simbaka yandi ?
(Yandi simbaka mikanda ya bana-bankombo na nitu ya Yakobi. Sambu yandi waka bonso mika mingi, yandi kwikilaka nde yo vandaka Ezau.)
- Papa Ezau tubaka nde yandi waka nitu bonso ya Ezau, kansi nki bonso ya Yakobi ?
(Ndinga bonso ya Yakobi)
- Nki mutindu Yakobi tubaka luvunu mbala ya zole ?
(Papa yulaka diaka nde, « Ya kieleka, nge keke mwana na mono Ezau ? » Ebuna Yakobi vutulaka nde, « E, si, yai mono Ezau. »

Bana sala sambu na kusonga nki me salama :

Bana sala bageste bonso bo keke Papa Izaki, ke simba Yakobi, kansi yandi ke wa mika ya mpusu bonso ya Ezau.

Kuyimba ti kukina :

O luvunu, O Yakobi ! O luvunu yambula !

78.4. Papa Izaki yindulaka nde Yakobi vandaka Ezau, yo yina yandi sakumunaka yandi na lusukumunu ya mbuta ya fami.

Kutanga : Kuyantika 27 :26-29

26 *Ntangu yai Izaka songaka yandi nde : « Mwana na mono, kwisa penepene, nge pesa mono beze. »*

27 *Ntangu Yakobi kwisaka kupesa yandi beze, Izaki waka nsudi ya bilele na yandi ; mpidina yandi sakumunaka yandi nde : « Nsudi yai ya kitoko ya bilele ya mwana na mono, yo keke bonso nsudi yina ke basikaka na bilanga yina ya Mfumu Nzambi me sakumuna !*

28 *Nzambi kupesa nge mvula sambu bima na bilanga na nge kumena mbote. Yandi pesa nge mpi ble ti vinu mingi.*

29 *Makanda ya bantu fweti sadila nge, bo fweti fukama na ntwala na nge. Nge fweti vandaka mfumu ya bampangi na nge, bana ya mama na nge fweti fukama na ntwala na nge. Kana bantu kusinga nge, Nzambi mpi ta singa bo ; kana bantu kusakumuna nge, Nzambi ta sakumuna bo. »*

Kuyula bana :

- Na nsuka ya mambu yina yonso, Papa Izaki lombaka mwana na yandi nki ?
(Kupesa yandi beze.)
- Ntangu Yakobi pesaka papa beze, nki songaka Papa Izaki nde yo fweti vanda Ezau ?
(Nsudi ya bilele na yandi)
- Na nsuka, Papa Izaki salaka nki ?
(Yandi sakumunaka Yakobi na lusakumunu ya mbuta ya fami, kuyindula nde yandi vandaka kusakumuna Ezau.)
- Lusakumunu yina, yo tubaka nde Izaki fweti vanda nki?
(Mfumu ya bampangi)
- Nzambi tubaka nde bantu ya ta singa yandi, Nzambi ta singa bo, kansi bo ya to sakumuna yandi, Nzambi ta sakumuna bo. Keti nge bambuka Nzambi tubaka mambu yai na nani ntete?
(Na Tata Abrahami, papa ya Izaki.)

NB sambu na bana ya me yela :

Nsilulu yai Nzambi pesaka na fami ya fweti buta Mesia. Bonso Nzambi tubaka mutindu yina ya Yakobi, yo songaka nde yo ta vanda mwana ya dikanda na yandi ya ta buta Mesia.)

Bana sala sambu na kusonga nki me salama :

Bana yonso sala bageste bonso Papa Izaki ke sakumuna mwana na yandi Yakobi.

Kuyimba ti kukina :

Papa me sakumuna Yakobi. O, la la ! O, la la !

78.5. Na nima, Ezau kwisaka sambu papa sakumuna yandi, kansi lusakumunu yina me kwenda dezia na Yakobi, mpila kukatula yo vandaka ve. Yo yina, Izaki sakumunaka Ezau na mpila na yandi.

Kutangila bana somere ya baverse yai : Kuyantika 27 : 30-40

Kaka na ntangu Papa Izaki me manisa kusakumuna Yakobi mutindu yina ti Yakobi me basika, Ezau kwisaka kukota, kulomba nde tata sakumuna yandi. Ntangu Izaki bakisaka nde Yakobi me kusa yandi, yandi vandaka kutetika ngolo, sambu yandi zabaka nde yandi me sakumuna Yakobi bonso mbuta ya fami, mpila kukatula yo vandaka ve. Ezau mpi bakisaka nde Yakobi me kusa yandi. Ebuna Ezau bwaka na ntoto, kudila nde, « Pardo papa, sakumuna mono mpi » (vs 34). Ezau bondilaka tata nde, « Papa, nge ke zaba kusakumuna kaka mbala mosi ? Sakumuna mono mpi ko, Papa ! » (vs. 34). Ebuna yandi dilaka.

Ebuna Izaka sakumunaka yandi na visio Nzambi pesaka yandi ya luzingu ya Ezau. Mawa

mingi. Izaki tubaka nde bilanga na yandi ta zwa masa ve, yo yina yo ta buta ve, yandi ta vanda kunwana mingi, ti yandi ta sadila mpangi na yandi. Kaka mambu ya kiese vandaka nde, na nima, kana yandi sala ngolo, yandi ta katuka na kimpika na yandi.

Kuyula bana :

- Nani kwisaka na nima ya Yakobi, sambu na kusosa lusakumunu ya papa ?
(Ezau, mwana na yandi ya ntete)
- Ntangu Papa Izaki bakisaka nde Yakobi me yiba lusakumunu na yandi, yandi yantikaka kusala nki?
(Kutetika. Yo vandaka mambu ya nene ya me salama.)
- Ezau bondilaka Izaki kusala nki ?
(Kusakumuna yandi mpi.)
- Nki Nzambi songaka Izaki sambu na luzingu ya Ezau ?
(Kitoko ve. Yandi ta vanda kunwana mingi ti yandi ta sadila bampangi na yandi.)
- Kaka mambu mosi ya ndambu mbote vandaka na lusakumunu yina. Nki yina ?
(Nde na nima, kana Ezau kusala ngolo, yandi ta katuka na kimpika na yandi.)

Bana sala sambu na kusonga nki me salama :

Bana yonso sala bageste bonso bo ke songa Ezau na mawa mpila luzingu na yandi ta vanda.

Kuyimba ti kukina :

Izaki yibaka lusakumunu,
Luzingu ya Ezau ta vanda mawa.

78.6. Kimenga ti kimpala kotaka na ntima ya Ezau sambu na mambu yina, ebuna yandi zengaka nde yandi ta fwa leki na yandi Yakobi.

Kutanga : Kuyantika 27 :41

41 Ezau mengaka Yakobi sambu na kusakumuna ya tata na yandi sakumunaka Yakobi. Yandi yindulaka na nsi ya ntima nde : « Kubika fioti beto ke dila tata na beto ; kana mafwa me mana imene, mono ta fwa Yakobi. »

Kuyula bana :

- Nki kotaka na Ezau sambu na mambu yina ?
(Kumenga leki na yandi, mpi nzala ya kufwa yandi.)
- Mambu mingi ya kiese me kwisa ya Yakobi na lusakumunu ya papa. Kansi ntangu yai, nki mambu ya mawa me kwisa na yandi ?

(Kimbeni, kukabana ti boma, sambu mbuta na yandi ke sala lukanu nki mutindu kufwa yandi.)

Bana sala sambu na kusonga nki me salama :

Bana yonso na kimvuka songa luse ya kimenga ya Ezau, na nima, bo songa luse ya boma ya Yakobi ntangu yandi bakisa nde Ezau zola kufwa yandi.

Kuyimba ti kukina :

Yakobi, nge me kusa.
Yo me natila kimbeni.

78.7. Rebeka zolaka Yakobi kutina na bampangi sambu mbuta na yandi kufwa yandi ve, yo yina yandi tubaka na Izaki na mpila nde yandi mpi ta pusa Yakobi kutina kuna.

Kutanga somere ya baverse yai : Kuyantika 27 :42-46

Ntangu Rebeka zabaka nde Ezau vandaka na lukanu na kufwa Yakobi, yandi bendaka Yakobi yandi tina na bampangi na bo Ngwasi Labani, ya zingaka ntama ti bo na bwala Arani. Yandi tubaka nde na nima Ezau me vila yina ya Yakobi me sala, yandi ta binga, ebuna yandi kwenda kwisa kuvutuka na fami. Kansi mpila vandaka ve kusonga papa mambu yai, mbaimbai yandi ta bakisa nde yandi Rebeka muntu me pusa Yakobi nde yandi kusa yandi.

Yo yina, Rebeka songaka Izaki nde, « Mambu ya nkento ya Ezau yo me lembisa mono ngolo » (vs 46) sambu Ezau me kwela nkento ya bo zolaka ve. « Kana Yakobi mpi kukwela nkento na dikanda yai ya Heti, mono mfunu ya kuzinga kele ve. » (vs 46). Yandi zabaka nde Izaki ta tinda Yakobi na bampangi na bo na bwala Arani.

Kuyula bana :

- Sambu na nki Rebeka zolaka Yakobi kutina, kukwenda na bampani fami ya Labani ? (Sambu Ezau kufwa yandi ve.)
- Nki mutindu yandi tubaka na Izaki sambu yandi tinda Yakobi kuna ? (Mbote ve yandi kwela nkento ya Kanana, yandi kwenda kuna kusosa nkento.)

Bana sala sambu na kusonga nki me salama :

Bana yonso sala geste nde, « Kwenda! »

Kuyimba ti kukina :

Yakobi fweti tina sambu Ezau kufwa yandi ve.

78.8. Izaki tindaka Yakobi kukosa nkento na bampangi na yandi. Yakobi kabanaka na fami na yandi, ti kimbeni kotaka na kati na Ezau ti yandi.

Kutanga somere ya baverse yai : Kuyantika 28 :1-5

Izaki salaka kaka bonso Rebeka yindulaka. Yandi tindaka Yakobi kuna. Yandi bakisaka ve nde Yakobi fweti bikala kuna ntangu mingi.

Kuyula bana :

- Luvunu ya Yakobi, na nsuka yo nataka nki ?
(Kimbeni ti kukabana na kati ya fami)

Bana sala sambu na kusonga nki me salama :

Bana yonso songa luse ya mawa, sambu fami me kabana na kimbeni.

Kuyimba ti kukina :

Ton : O Luvunu Yambula
Luvunu, O Yakobi !
Mo' ta tuba luvunu ve
Nsuka na yo kukabana.

Kumanisa :

Rebeka ti mwana na yandi Yakobi, bo kusaka Papa Izaki, ebuna na nzila ya luvunu, bo yibaka lusakumunu ya mbuta ya fami. Bo yindulaka nde yo ta natila bo kiese, kansi yo natilaka bo ntete mpasi. Mama Rebeka fweti kabana ti mwana ya yandi zolaka mingi. Izaki kabanaka ti fami na yandi yonso. Ezau mengaka Yakobi, yandi zolaka kaka kufwa yandi. Kukabana ya nene, boma ya nene, mawa ya nene kotaka na fami—yonso sambu na mambu yai ya kukusa.

Devoir sambu na bana me balula ntima na Yesu dezia :

Kukusa ikele mbote ve, sambu Nzambi kele masonga. Devoir mono ke pesa beno bana ya zaba nde beno me balula ntima na Yesu dezia, yo yai : Na mposo yai, beno tula ngolo kutuba luvunu ve, kukusa muntu ve. Tuba ti sala kaka masonga. Yai ta pesa Nzambi kiese, ti yo ta benda mambu ya kiese na luzingu na nge ti ya bantu ya nkaka.

Kubinga bana ya me balula ntima na Yesu ntete ve :

Nzambi ke songa beto kaka mambu ya kieleka. Mambu ya kieleka, yo yai : Kana muntu yindula kuguluka, kukwenda na bwala ya Nzambi, yandi fweti balula ntima. Yai zola tuba nde yandi kubika luzingu na yandi ya masumu, ti tula ntima na Yesu. Ntangu Yesu kota na luzingu ya muntu, Yandi ke pesa ntima ya mpa—ntima ya zola kulemfuka na Nzambi. Keti nge me yilama kusamba sambu na kutula ntima na Yesu ?

Kana nge me yilama, nge lenda samba kisambu bonso yai :

Tata Nzambi, mono bakisa nde mono ke na makambo ti Nge sambu na masumu na mono. Kieleka, mono me sala masumu mingi na meso na Nge. Sesepiyai, mono zola kubika luzingu ya ntama ya masumu. Mono zola Nge kupesa mono moyo ya mpa na Nge. Kwisa Yesu Kristo, kota ntima ti luzingu na mono sesepiyai. Kwisa, Mpeve ya Nzambi. Mono yamba Nge na ntima na mono. Lolula masumu na mono. Pesa mono moyo ya mpa. Pesa mono ngolo kulanda Nge na mambu yonso. Mono tula ntima na Nge sesepiyai. Matondo sambu na ndolula ya masumu na mono. Matondo sambu na moyo ya mpa Nge me pesa mono bubu yai. Na zina ya kitoko ya Yesu, Amen !

=== NSUKA YA LESO 78

Leso 79. Yakobi monaka kimatinu me katuka na zulu tii na ntoto-- Kuyantika 28:10-22

REVISIO:

Kubambuka diaka lesa me luta:

- Nani kusaka Papa Izaki sambu na kuyiba lusakumunu ya mbuta ya fami?
(Yakobi)
- Nani pusaka yandi kusala mpidina ?
(Mama na yandi, Rebeka)
- Nki vandaka nsuka ya mambu yina ?
(Kimenga ti kimbeni na kati ya mapasa Ezau ti Yakobi. Ezau zolaka kufwa Yakobi, ebuna Yakobi tinaka na boma. Mpidina, fami kabanaka.)

Kulanda devoir ya lesa me luta :

Na mposo me luta, beto me mona nde kutuba luvunu to kukusa muntu, yo ke nata makambo mingi ya mpasi. Na mposo me luta, nani me tula ngolo kutuba luvunu ve ? Nani monaka mpukumunu kutuba luvunu, kansi beno nungaka, beno tubaka yo ve ? *[Moniteur, pesa bana ntangu fioti kutuba nki lutaka.]*

LESO YA BUBU YAI :

Kikuma ya lesa yai :

Na nsuka ya lesa yai, mono zola bana kubakisa nde ata na ntangu ya me luta mpasi na luzingu na beto, Nzambi ikele ti beto, Yandi ke sala na luzingu ya bana na Yandi. Yo yina, bo ta kangama na Nzambi kaka.

Verse ya kulonguka :

Nzambi ke tuba : « Kuvila ve, Mono ta vandaka na nge, Mono ta kebaka nge bisika yonso ya nge ta kwendaka tii kuna Mono ta vutula nge na ntoto yai. Mono ta bika nge ve tii kuna Mono me lungisa mambu yai yonso ya Mono me songa nge. »

Kuyantika 28 :15

Bankunga ke kwenda nzila mosi ti lesa yai :

Bu Yesu Kele na Mono
Konso Lumbu Kiese Kele
Nkunga 46 :1
Yesu Ikele Awa

Kuyantika :

Tali me sala mbi, ti yandi zabaka yo. Yandi me yiba na kati ya banzo ya bwala. Ntangu bo

Sambu na kumona baleso ya nkaka bonso yai ya dibundu na nge lenda sadila, tala site yai :
www.teachingforafrica.com , un site des « Ministères pour Chaque Enfant »

kangaka yandi, yandi kusaka bo kutuba nde yandi salaka yo ve. Kansi mambu ya kieleka me monika na kitemwe ya bantu ya nkaka. Ata yandi vandaka kaka mwana, bo tulaka yandi na boloko. Kuna, mpasi mingi. Nzala mingi. Bumosi mingi. Nsoni mingi.

Yandi vandaka na mawa mingi. Sambu na nki yandi me sala mpidina ? Yandi sambaka nde, Kuna na boloko, yandi sambaka: « Nzambi, pardo mingi. Nzambi, lolula mono. Nzambi, mono ke vutula bima yonso ya mono yibaka. Nzambi...Nzambi...»

Keti Nzambi waka yandi ? Yandi waka ve bonso Nzambi vandaka kuwa. Ketu yandi me bebisa tii kuna ?

Na mposo me luta, beto monaka nde Yakobi bebisaka. Nzambi me zenga dezia nde dikanda na yandi ta vanda yina ya ta buta Mesia. Kansi Yakobi zolaka ve kukinga Nzambi kusala na mambu yina. Mama na yandi Rebeka pusaka yandi kutuba luvunu, kukusa papa sambu yandi ziba lusakumunu ya mbuta ya fami na kingolo-ngolo.

Kansi na nima yandi salaka yo, kimbeni ya ngolo kotaka na mbuta na yandi Ezau ti yandi. Na makasi, Ezau zengaka nde yandi fweti kufwa Yakobi. Yakobi tinaka. Ntangu beto mona yandi na lesu yai, yandi kele na nzila kukwenda kuzinga na mpangi na yandi Nguasi Labani.

Bonso Tali na histoire na beto, Yakobi zabaka nde yandi me bebisa. Ketu Nzambi ta lolula yandi ? Ketu Nzambi ta vanda ti yandi, na nima ya yonso yandi me sala ? Beto yantika bubu na Kuyantika kapu 28, nzila ya ntete.

Malongi ya nene na bandambu :

79.1 Na nzila, Yakobi lalaka ndosi. Yandi monaka kimatinu ke kwenda na zulu, ti bawanzio ke mata ti ke kulumuka na zulu na yo.

Kutanga : Kuyantika 28 :10-12

10 Yakobi katukaka na bwala Beresheba, yandi simbaka nzila na kwenda na ndambu ya bwala Arani.

11 Yandi kwisaka kukuma na kisika mosi, ebuna yandi yidikaka kisika ya kulala pana sambu ntangu vandaka me yantika kudinda. Na ntangu ya kulala, yandi bakaka ditadi mosi sambu na kutula ntu.

12 Na mpongi yandi lalaka ndosi. Yandi monaka kimatinu me katuka na zulu tii na ntoto. Ebuna bawanzio ya Nzambi vandaka kulumuka ti kutombuka na kimatinu yina.

Kuyula bana :

- Bu Yakobi monaka nde yandi fweti lala na nzila, yandi tulaka ntu na yandi na zulu ya nki ?
(Na zulu ya ditadi)
- Yandi monaka nki na ndosi ?
(Kimatinu me katuka na zulu tii na ntoto)
- Banani vandaka kulumuka ti kutombuka na kimatinu yina ?
(Bawanzio ya Nzambi)

Bana sala sambu na kusonga nki me salama :

Bana yonso na kimvuka sala bageste bonso bo ke tula ditadi na nsi ya ntu, ke lala sambu mpongi kusimba bo. Na nima, bo sala bonso bo me mona bawanzio ya Nzambi na zulu ya kimatinu.

Kuyimba ti kukina :

Yimba verse 1 ya nkunga: "Yakobi Monaka Kimatinu » (Ton: anglais "We are climbing Jacob's ladder)

Yakobi monaka kimatinu (3x)

Bawanzio ya Nzambi.

79.2 Nzambi mpi songaka yandi nde Yandi ta vanda ti yandi sambu na kulungisa bansilulu yonso na Yandi.

Kutanga : Kuyantika 28 :13-15

13 Yandi ke mona Mfumu Nzambi me telama penepene ke tubila yandi nde : « Mono kele Mfumu Nzambi, Nzambi ya nkaka nge Abrahama ti ya tata na nge Izaki. Ntoto yai ya nge me lala Mono ta pesa yo na nge.

14 Bana na nge ta vanda mingi, bonso putulu ya ntoto. Bo ta mwangana ndambu yonso, ebuna bantu yonso ya nsi-ntoto, Mono ta sakumuna bo sambu na nge ti bana na nge.

15 « Kuvila ve, Mono ta vandaka na nge, Mono ta kebaka nge bisika yonso ya nge ta kwendaka tii kuna Mono ta vutula nge na ntoto yai. Mono ta bika nge ve tii kuna Mono me lungisa mambu yai yonso ya Mono me songa nge. »

Kuyula bana :

- Yakobi monaka Nani penepene ?
(Yandi monaka Mfumu Nzambi)
- Nzambi silaka kupesa yandi nki ?
(Ntoto sika yandi vandaka)

- Nzambi silaka nde bana na yandi ta vanda ikwa ?
(Mingi bonso putulu ya ntoto)
- Keti bana na yandi ta zinga na sika yina kaka ?
(Ikele ve. Ntoto yina ta vanda ya bo, kansi bo mpi ta mwangana na bisika yonso.)
- Keti Nzambi ta sakumuna kaka bo mpamba
(Ikele ve. Nzambi ta sakumuna bantu yonso ya nsi-ntoto sambu na bo.)

- Nzambi silaka Yakobi nki sambu na voyage na yandi ti sambu na bamvula na ntwala na yandi ?
(Nzambi ta keba yandi na bisika yonso ya yandi ta kwenda tii ntangu Nzambi ta vutula yandi diaka na sika yina ya yandi vandaka.)
- Keti Nzambi ta bikisa yandi ?
(Ikele ve.)
- Keti Nzambi ta vila bansilulu Yandi me pesa yandi ?
(Ikele ve. Yandi fweti lungisa yonso.)

Bana sala sambu na kusonga nki me salama :

Bana yonso tuba verse ya kulonguka, Kuyantika 28 :15

Kuyimba ti kukina :

Bana yimba verse 2 ya nkunga, "Yakobi Monaka Kimatinu"

79.3 Yakobi bakisaka nde Nzambi vandaka ti yandi, ebuna yandi sambaka Nzambi. Yo yina, yandi bingaka sika yina, Beteli, nzo ya Nzambi.

Kutanga : Kuyantika 28 :16-19

16 Yakobi telamaka na mpongi, yandi tubaka nde: "Ya kieleka, Mfumu Nzambi kele na kisika yai.

17 Yandi monaka boma, ebuna yandi tubaka nde : "Kisika yai kele boma! Yo fweti vanda kisika ya Nzambi ti kielo ya zulu!"

18 Yakobi telamaka na suka-suka yonso. Yandi bakaka ditadi yina ya yandi tulaka ntu, yandi tedimisaka yo, ebuna yandi losilaka yo mafuta ya olive.

19 Yandi pesaka kisika yina zina Betele. Ntete zina ya bwala yina vandaka Luzi.

Kuyula bana :

- Yakobi bakisaka nki sambu na ndosi ya yandi me mona ?
(Nde kieleka Mfumu Nzambi vandaka na sika yina)
- Yakobi salaka nki na ditadi yina ya yandi sadilaka na nsi ya ntu na yandi ?

(Yandi nangulaka yo, ebuna yandi losilaka yo mafuta ya olive.)

- Zina ya sika yina vandaka ntete Luz. Kansi Yakobi pesaka yo nki zina ya mpa?
Betele, disongidila nde "nzo ya Nzambi »

Bana sala sambu na kusonga nki me salama :

Bana yonso na kimvuka bula makulu na bo, ti bo tuba nde, "Sika yai Betele, nzo ya Nzambi, sambu Nzambi ikele na sika yai.»

Kuyimba ti kukina :

Bana yimba nkunga « Yesu ikele awa» (Ton: Lingala Yesu azali awa.)

79.4 Yakobi silaka kulanda Nzambi ti kupesa Yandi mosi ya kumi.

Kutanga : Kuyantika 28 :20-22

20 Ntangu yai Yakobi zengaka na zina ya Mfumu Nzambi nde : « Kana Nge vanda na mono ti kukeba mono na nzila yai ya mono ke kwenda, kana Nge pesa mono madia ti bilele

21 ti vutula mono mbote na bwala ya tata na mono, Nge ta vanda Nzambi na mono.

22 Na kisika ya ditadi yai ya mono me tedimisa, bantu ta kwisa kusamba Nge. Bima yonso ya Nge ta pesa mono, mono ta kabisa yo na ndambu kumi, ebuna mono ta baka ndambu mosi, mono ta pesa Nge makabu. »

Kuyula bana :

- Na nsuka ya mambu yai yonso, Yakobi silaka kusala nki ?
(Kupesa Nzambi mosi ya kumi, sambu Nzambi ta vanda Nzambi na yandi.)

Bana sala sambu na kusonga nki me salama :

Bana sala geste bonso bo ke tanga bima na bo kumi. Bo ke simba kitini mosi, ke pesa yo na Nzambi.

Kuyimba ti kukina :

Bana yimba verse 3 ya nkunga "Yakobi Monaka Kimatinu."

Kumanisa :

Yakobi vandaka muntu bonso beto. Yandi kwikilaka Nzambi, kansi mbala mingi, yandi salaka ve mutindu Nzambi zolaka. Kansi bonso yandi vandaka muntu ya Nzambi, Nzambi vandaka ti yandi. Yandi fweti kabana ti fami na yandi, yo ta sala bamvula mingi. Kukabana yina nsuka ya masumu na yandi. Kansi ata yandi me bebisa, Nzambi zolaka yandi. Nzambi vilaka yandi ve.

Beto mpi, mbala mingi beto bebisa, kansi kana beto me tula ntima na Yesu, Nzambi ke vilaka beto ve. Yo ke pesa beto kikesa kuzaba nde Yesu kele kusimba diboko na beto. Bonso beto zaba nde Nzambi zola beto mutindu yina, bika beto kangama na Yandi mutindu Yandi me kangama na beto.

Devoir sambu na bana me balula ntima na Yesu dezia :

Beno bana ya lenda tuba nde, « Mono bambuka lumbu mosi ya mono tulaka ntima na Yesu Kristo, » devoir mono ke pesa beno yo yai: Na mposo ke kwisa, sosa konso ntangu kukangama na Yesu. Kana nge zaba nde nge me vila nzila fioti, vutuka nswalu. Ndimba mbi yina, ti vutuka kukangama na Yesu diaka.

Kubinga bana me balula ntima na Yesu ntete ve :

Kansi mbala ya nkaka, Yesu me kangama na nge ntete ve, sambu nge me tula ntima na Yandi ntete ve. Nge lenda sala yo bubu. Nge yamba Yesu mbala mosi. Ntangu yina, Yandi ta simba nge, Yandi ta kangama na nge tii kuna. Kana nge zola kuyamba Yesu bubuyai, mono ta vanda na kiese kusamba ti nge na nima ya ecodim. Kaka kwisa na mono ti tuba nde, « Mono ke na mfunu ya Yesu. »

=== NSUKA YA LESO 79

Leso 80. Yakobi solaka Rashele kuvanda nkento na yandi.

Kuyantika 29 :1-30

REVISIO:

Kuyindula diaka lesa me luta :

[Moniteur, desine bafoto 3 to lomba mwana kudesine yo : Kimatinu, bawanzio, ti bibende kumi (tula cercle na lweka na bibende mosi). Songa bafoto mosi-mosi, ti lomba bana kutuba nki bo monaka sambu na yo na lesa me luta.]

Kulanda devoir ya lesa me luta :

Na mposo me luta, beto monaka nde, kana muntu me yamba Yesu Kristo, Nzambi me kangama na yandi. Beto lombaka beno bakristo kukangama mpi na Yandi, kuvutuka nswalu na Yandi kana beno me vila nzila. Na mposo me luta, nani mekaka kukangama ngolo na Nzambi ? Nani ta pesa beto kitemwe nki mutindu mambu yina lutaka na luzingu na yandi ? *[Moniteur, pesa bana nzila kutuba fioti kana bo zola.]*

LESO YA BUBU YAI :

Kikuma ya lesa yai :

Na nsuka ya lesa yai, mono zola bana kubakisa nde mbala mingi, mbi ya beto sala ke landaka beto. Yo yina, bo ta sosa kusala mbi ve, ti kuvanda na ntima ya kubalula ntima nswalu kana bo me sala mbi.

Verse ya kulonguka :

Beno kudikusa ve, sambu bo ke sekaka Nzambi ve, muntu ke katulaka bambuma yina ya yandi ke kunaka.

Galatia 6 :7

Bankunga ke kwenda nzila mosi ti lesa yai :

Masumu na Mono Me Kwenda

Mo' Ta Tuba Luvunu Ve

O Luvunu, Yambula !

Kuyantika :

[Moniteur, longa ntete verse ya kulonguka na ntwala kuyantika lesa.]

Kana muntu kuna madesu na bilanga na yandi, yandi ta katula bambuma ya nki ? (Ee, madesu. Yandi ta katula masangu ve. Yandi ta katula madesu, sambu yandi me kunaka madesu.

Nki beno banza ? Kana muntu kuna luvunu na luzingu na yandi, yandi ta katula nki ? (Ee, kaka yina ya yandi me kunaka.) Yindula mpila Yakobi bakaka lusakumunu ya mbuta ya fami. Yandi

Sambu na kumona baleso ya nkaka bonso yai ya dibundu na nge lenda sadila, tala site yai :

www.teachingforafrica.com , un site des « Ministères pour Chaque Enfant »

bakaka yo nki mutindu ? (Ee, na mpila ya luvunu, ya kukusa. Na français beto tuba "tricherie". Nzambi vilaka yandi ve, bonso beto monaka na mposo me luta. Kansi mambu ya yandi me sala lenda konda ve kulanda yandi. Bubuyai beto ta mona mutindu yo landaka yandi. Beto me kuma na Kuyantika kapu 29.

Malongi ya nene na bandambu 6 :

80.1. Yakobi kwisaka na nto, ti yandi bakisaka nde yandi vandaka penepene na Nahor, sika mpangi na yandi Labani zingaka.

Kutanga somere yai ya Kuyantika 29 :1-8 :

Yakobi landaka voyage na yandi, tii yandi kumaka na nto, sika bamvungi ti mameme vandaka sambu na kusosa masa. Bo songaka yandi nde bo zabaka mpangi na yandi Labani, yandi vandaka mbote. Bo songaka yandi nde mwana na yandi Rashele vandaka kukwisa ti mameme na yandi.

Kuyula bana :

- Yakobi kumaka na nki ?
(Na nto ya masa)
- Bamvungi kunga songaka yandi nde nani ke kwisa ?
(Rashele, mwana ya ngwasi na yandi Labani)

Bana sala sambu na kusonga nki me salama :

Bana yonso sala bageste kusonga nde Rashele vandaka kukwisa.

Kuyimba ti kukina :

Yakobi kwisaka na nto
Ye monaka Rashele ke kwisa.

80.2. Yandi kutanaka na Rashele, mwana ya Labani.

Kutanga : Kuyantika 29 :9-12

9 Ntangu Yakobi vandaka ke solula na bantu yango, Rashele mpi kwisaka kukuma, na bambisi ya tata na yandi. Rashele muntu vandaka kukeba bambisi ya tata na yandi.

10 Yakobi monaka Rashele ke kwisa na bambisi ya ngwasi na yandi Labani, ebuna yandi kwendaka na dibulu ya masa, yandi katulaka ditadi, yandi pesaka mameme masa.

11 Ntangu yai, Yakobi pesaka Rashele beze, ebuna yandi yantikaka kudila sambu na kusonga kiese.

12 Yandi songaka Rashele nde: "Mono kele mwana ya Rebeka, mpangi ya tata na nge." Rashele kwendaka ntinu na kusonga tata na yandi.

Kuyula bana :

- Nki vandaka ksalu ya Rashele ?
(Kukeba mameme ya tata na yandi Labani)
- Nki salamaka na kati na bo ntangu Rashele kwisaka na nto?
(Yakobi yambaka yandi na kiese, na beze. Yandi songaka Rashele yandi vandaka nani.)
- Rashele kwendaka ntinu kusala nki ?
(Kusonga tata na yandi nde mpangi na bo me kwisa.)

Bana sala sambu na kusonga nki me salama :

Bana yonso dila bonso kusonga kiese nde mpangi me kwisa.

Kuyimba ti kukina :

Rashele kiese kumona mpangi,
Yandi kwendaka kusonga papa.

80.3. Labani bakaka ntinu kuyamba yandi, ebuna Yakobi bikalaka ti yandi ngonda mosi.

Kutanga : Kuyantika 29 :13-14

13 Ntangu tata na yandi waka nsangu ya mwana-mpangi na yandi Yakobi, yandi kwendaka nswalu kuyamba yandi. Yandi pesaka yandi mbote, yandi pesaka yandi mpi beze, ebuna yandi nataka yandi na nzo. Yakobi songaka Labani mambu yonso mutindu yo bwaka.

14 Ntangu yai Labani tubilaka yandi nde : « E, ya kieleka, nge kele mwana ya fami, nge kele menga na mono. » Yakobi bikalaka na nzo na yandi ngonda mosi.

Kuyula bana :

- Yakobi bikalaka na nzo ya Labani ntangu ikwa ?
(Ngonda mosi)

Bana sala sambu na kusonga nki me salama :

Bana yonso simbana na mapeka, bo tuba nde,
« Yambi ! Yambi ! Yambi !
Mpangi mene kwisa.
Yambi ! Yambi ! Yambi ! »

Kuyimba ti kukina :

Ngwasi Labani yambaka Yakobo
kaka na kiese.

80.4. Yakobi wakanaka ti Labani kusadila yandi bamvula 7 sambu Rashele kuma nkento na yandi.

Kutanga : Kuyantika 29 :15-19

15 Labani yulaka Yakobi nde : « Mono zola ve nde nge sadila mono kisalu ya mpunda sambu nge kele mpangi na mono. Nge zola mono futa nge ikwa ? »

16 Labani vandaka na bana-bankento zole, ya mbuta zina na yandi Lea, ya leki Rashele.

17 Lea vandaka kitoko na meso, kansi Rashele vandaka me luta Lea na kitoko, nitu na yandi ti ilungi na yandi vandaka kitoko.

18 Yakobi vandaka kuzola Rashele mingi, yo yina yandi songaka Labani nde : « Mono zola sadila nge bamvula nsambwadi sambu na kukwela mwana na nge ya leki Rashele. »

19 Labani tubaka nde : « Mbote nkutu na kupesa yandi na nge, kansi muntu ya nkaka ve ; bikala awa na nzo na mono. »

Kuyula bana :

- Na nsuka ya ngonda mosi, Labani yulaka Yakobi nki ?
(Nge zola nde mono futa nge ikwa sambu na kisalu na nge ?)
- Yakobi lombaka lufutu ya nki mutindu ?
(Yandi sadila Labani bamvula 7 sambu na mwana ya leki ya Labani, Rashele, na makwela.)
- Sambu na nki Labani ndimaka salaire yina ?
(Yandi monaka nde mbote nkutu kupesa Rashele na Yakobi, kansi muntu ya nkaka ve.)

Bana sala sambu na kusonga nki me salama :

Bana simba misapi mosi-mosi tii na musapi ya 7. Na konso musapi, bo tuba nde, « Mono ta sadila nge mvula mosi, Rashele kuma nkento na mono, » « Mono ta sadila nge bamvula zole, Rashele kuma nkento na mono, » etc. tii na nsambwadi.

Kuyimba ti kukina :

Mono ta sala bamvula 7

Na nima mo' ta kwele Rashele. Kiese !

80.5. Labani kusakaka Yakobi ; yandi pesaka Lea, mbuta ya Rashele, bonso nkento na yandi.

Kutanga : Kuyantika 29 :20-23, 25

20 Yakobi salaka bamvula nsambwadi sambu na kubaka Rashele. Yandi monaka bamvula yai bonso bilumbu fioti sambu yandi vandaka kuzola Rashele mingi.

21 Yakobi tubaka na Labani nde : « Ntangu me lunga, pesa mono mwana na nge sambu mono kwela yandi. »

22 *Mpidina Labani salaka fete ya makwela, yandi bingaka bantu yonso ya bwala.*

23 *Na mpimpa Labani nataka ve Rashele na Yakobi, kansi yandi natilaka yandi Lea. Ebuna Yakobi lalaka na yandi.*

25 *Na kilumbu landaka na suka, Yakobi kwisaka kumona nde, Ho ! nkento yango Lea ! Yandi yulaka Labani nde : « Sambu na nki nge me sala mono mambu ya mutindu yai ? Mono sadilaka nge ksalu sambu na kukwela Rashele. Sambu na nki nge me kusa mono mpila yai ? »*

Kuyula bana :

- Sambu na nki Yakobi monaka bamvula 7 ya ksalu bonso ntangu fioti ? (Sambu yandi zolaka Rashele mingi.)
- Na nima yandi me sadila Labani bamvula 7, Yakobi lombaka Labani nki ? (Kupesa yandi mwana na yandi Rashele na makwela bonso bo me wakana)
- Labani salaka fete ya makwela ya nki mutindu—ya nene, to ya fioti? (Ya nene. Bwala ya mvimba kwisaka.)
- Na mpimpa, ntangu lungaka nde Labani natila Yakobi nkento na yandi. Yandi natilaka yandi nani? (Mbuta ya Rashele, Lea. Kansi Yakobi zabaka yo kaka na suka, na nima yandi me lala dezia na Lea bonso nkento na yandi.)
NB: Mbala mingi, bankento vandaka kulwata mvwela na zulu ya ntu. Mvwela + mpimpa + bamwinda ya mbote mingi ve = yandi bakisaka nde yo vandaka Lea kaka na suka.
- Na suka, Yakobi monaka nki? (Labani me kusa yandi, me yiba yandi nkento ya yandi zolaka, ti nkento bo me wakana ta vanda na yandi.)
- Yakobi yulaka Ngwasi Labani nki ? (Sambu na nki nge me kusa mono mpila yai ?)
- Keti nge ke bambuka, na nzo ya tata Izaki, Yakobi kusaka nani, ti yandi yibaka nani ? (Yandi kusaka tata na yandi Izaki, yandi mpi yibaka mbuta na yandi Ezau.)
- Ntangu yina, Yakobi yindulaka ve mpasi yandi pesaka Papa Izaki to mbuta na yandi Ezau. Kansi ntangu yai, Nzambi me songa yandi mpasi sambu Ngwasi Labani me kusa yandi. Keti nge banza Yakobi bakisaka yo ?
[Moniteur, bana pesa kaka mabanza na bo. Beto kaka zola bo kuyindula mambu yina.]

Yula bana ya me yela:

- Nani ya nkaka monaka mpasi na mpila Labani kusaka Yakobi? (Rebeka, sambu Labani yibaka yandi bakala ya yandi yindulaka kukwela, ti Lea, sambu

Yakobi zolaka yandi ve.)

- Yindula mpila yo vandaka sambu na Lea na mpimpa ya makwela. Yakobi banzaka nde yandi vandaka Rashele. Kana Yakobi tubaka bandinga bonso, “Oh, Rashele, nge kitoko kuluta bankento yonso,” Lea zolaka kumona yo nki mutindu? Yindula boma yandi fweti mona na suka, ntangu luvunu ya Labani fweti kumonika.
(Bana lenda solula mpila Lea waka na nsi ya ntima.)

Bana sala sambu na kusonga nki me salama :

Bana yonso sala bageste bonso Yakobi na suka ntangu yandi monaka nde Labani me kusa yandi.

Kuyimba ti kukina :

Yakobi, nge mukusi
Ti Labani me kusa nge.
Nge kunaka nkeni
Konso nkeni fweti kumena.

80.6. Yakobi wakanaka diaka ti Labani, ti sadilaka yandi bamvula 7 diaka, sambu yandi kwelaka Rashele mpi.

Kutanga : Kuyantika 29 :26-28, 30

26 Labani vutulaka nde : “Beto ke na kikalulu mosi, yo yai: Leki lenda kwela ve kana mbuta me kwela ntete ve.

27 Vingila mposo mosi ; kana fete me mana, beto ta pesa nge mpi Rashele kana nge sala diaka bamvula nsambwadi ya nkaka.”

28 Yakobi ndimaka. Ebuna ntangu mposo mosi me luta, fete ya makwela mpi me mana. Labani pesaka Yakobi mwana na yandi Rashele na kuvanda nkento na yandi.

30 Ebuna Yakobi lalaka mpi na Rashele. Yandi vandaka kuzola Rashele mingi kansi Lea mingi ve. Yandi sadilaka Labani diaka kisalu bamvula nsambwadi.

Kuyula bana :

- Sambu na nki Labani pesaka Yakobi Lea, ata yandi me ndima kupesa Rashele ?
(Nsiku ya dikanda na bo vandaka nde mbuta fweti kwela na ntwala ya leki.)
- Labani zabaka mambu yina katuka na luyantiku. Sambu na nki yandi songaka Yakobi mpidina ve ntangu yandi wakanaka ti yandi ntete ?
(Yo fweti vanda nde yandi zolaka kukusa Yakobi kaka.)
- Labani songaka nde yandi fweti sala nki diaka sambu yandi kwela mpi Lea ?
(Kusadila yandi bamvula 7 diaka)

- Ketu Yakobi ndimaka yo ?
(Ee. Na nima bo manisaka fete ya Lea, Yakobi bakaka Rashele, ebuna yandi sadilaka Labani bamvula 7 diaka sambu na kumanisa doti na yandi. Bamvula yonso 14.)

Bana sala sambu na kusonga nki me salama :

Bana simba misapi mosi mosi ; bo tanga na misapi tii na 14. Na misapi 7 ya ntete, bo tuba nde, « Sambu na Rashele, sambu na Rashele, etc. » Na misapi 8 tii na 14, bo tuba nde, « Sambu Labani kusaka mono, sambu Labani kusaka mono, » etc.

Kuyimba ti kukina :

Bana yimba diaka--
Yakobi, nge mukusi
Ti Labani me kusa nge.

Nge kunaka nkeni
Ti konso nkeni fweti kumena.

Kumanisa :

Yakobi kusaka mbuta na yandi Ezau ti yibaka yandi kimbuta ya fami. Masumu na yandi me landa yandi. Ntangu yai, Ngwasi na yandi Labani me kusa yandi, ti me yiba yandi nkento na yandi. Ata Yakobi me sadila Labani bamvula nsambwadi ya mvimba na mpila mosi ya kwikama, na nsuka, Labani yibaka lufutu ya yandi me ndima kupesa—Rashele bonso nkento na Yakobi. Ntangu yina, Yakobi bakisaka nki mutindu yo ikele ntangu muntu kusa nge ti yiba nge. Yandi kunaka luvunu ; yandi me katula mpi bambuma ya luvunu kaka. Bambuka nde, ata yo monika nde muntu me zwa ndola ve sambu na mbi na yandi, masumu ikele kulanda kaka muntu ya sala yo.

Devoir sambu na bana me balula ntima na Yesu dezia :

Mbote beto bakristo bika mambu ya masumu na luzingu na beto. Kansi kana mbala na mbala beto kubwa na mambu mosi ya masumu, mbote beto vanda na ntima kundima yo nswalu, kubika yo, kubalula ntima sambu na yo.

Devoir mono ke pesa beno bakristo, yo yai: Na mposo yai ke kwisa, konso ntangu beno ke yindula kana kusaka mambu mosi, kudi yula mutindu yai: Ketu mono zola mambu yai ya mono ke yindula kulanda mono? Kana nge zola ve nde yo landa nge, kusala yo ve ! Kansi, kana nge kubwa, ti nge bakisa nde nge me sala mbi, vanda nswalu kundima masumu yina, kulomba ndolula, kubika mpi yo.

Ntangu yai, beto yonso bakristo, beto samba nge Nzambi sadisa beto kubika masumu, mpi nde Yandi pesa beto ntima mosi ya kele nswalu kubalua ntima. [Moniteur, yula bana kana mwana

mosi na kati na bo zola kusamba mutindu yina. Kana nge kuzwa volontier ve, nge mosi twadisa na bisambu yina.]

Kubinga bana me balula ntima na Yesu ntete ve :

Beto me solula mpasi ya ta landa kana muntu me kusa mpangi ya nkaka. Kansi nsangu ya mbote ikele nde Muntu mosi ikele ya ta kusa beto ve ata fioti. Yandi lenda kusa ve, sambu Yandi kele Nzambi, ti Yandi kele mbote yonso, masonga yonso.

Yesu me sila beto, « Muntu ya kwisa na Mono, Mono ta buya yandi ve” (Yoane 6:37b). Yandi kele kukusa ve. Yo kele kaka mutindu yina. Keti nge me kwisa na Yesu na ntima na nge yonso, sambu Yandi kugulusa nge? Kaka samba na ntima ya kieleka, kulomba Yandi kulolula masumu na nge ti kukuma Mvulusi na nge. Songa Yandi nde nge kwikila Yandi, nde nge zola landa Yandi, kukuma longuki na Yandi.

Kana nge kwisa na Yandi, Yandi ta buya nge ve !

Kana nge ke na mfunu ya lusadusu, bambuka nde konso ntangu beto kele awa na nima ya ecodim sambu na kusadisa nge. Kaka songa beto, « Mono zola kwisa na Yesu. » Beto ta vanda na kiese kusadisa nge.

=== NSUKA YA LESO 80

Leso 81. Yakobi butaka bana ya bakala 12 ; bo yelaka, bo kumaka makanda 12 ya Israele.

Kuyantika 29 :31—30 :24

REVISIO :

Kuyindula diaka leso me luta :

- Na baleso ya ntama, nki mutindu Yakobi kusaka muntu ?
(Yandi kusaka tata na yandi nde yandi vandaka Ezau, ebuna yandi yibaka lusakumunu ya mbuta ya fami.)
- Na leso ya mposo me luta, nki mutindu masumu yai 'kukusa' landaka yandi ?
(Ngwasi na yandi Labani kusaka yandi na mambu ya makwela.)

Kulanda devoir ya leso me luta :

Devoir ya mposo me luta vandaka na mambu tatu. Nani bambuka mosi na kati na yo ?

(Yo vandaka 1. Kudiyula, keti mambu yai mono zola sala, mono zola nde yo landa mono ?

2. Kutula ngolo kubika masumu.

3. Kana muntu kusala masumu, kuvanda nswalu kundima yo, kubalula ntima, kubika yo.

LESO YA BUBU YAI :

Kikuma ya leso yai :

Na nsuka ya leso yai, bana ta bakisa nde bana kele lusakumunu ya Nzambi. Yo yina, bo ta mona bana ya nkaka na luzitu, ti bo ta yamba bana ya mpa na kiese na kati ya dikanda na bo.

[Moniteur, NB : Mbala mingi, beto kele na kaka kikuma mosi ya konso lesu. Kansi na lesu yai, beto monaka nde bikuma zole vandaka mfunu. Kikuma ya zole, yo yai :]

Na nsuka ya lesu yai, bana ta bakisa mpi nde fami ya Yakobi kumaka Bayuda, ti na nima-nima, Nzambi pesaka bo ntoto ya Israele. Nzambi sakumunaka bo sambu Yandi solaka bo kupesa beto Bible mpi Mvulusi. Yandi mpi silaka nde bantu yonso yina ta sakumuna Bayuda, Yandi mpi ta sakumuna bo. Yo yina, bana ta samba sambu na mambote ya Israele ti sosa kusakumuna Bayuda, bonso dikanda ya pesaka beto Yesu.

Verse ya kulonguka :

*Bana kele makabu ya Mfumu Nzambi,
bo kele mambote ya Yandi ke pesaka bantu.*

Bankunga 127 :3

Sambu na kumona baleso ya nkaka bonso yai ya dibundu na nge lenda sadila, tala site yai :
www.teachingforafrica.com , un site des « Ministères pour Chaque Enfant »

Bankunga ke kwenda nzila mosi ti leso yai :

Mwana ya Fioti Lenda
Na Kati ya Abrami
Yesu Ke Zola Mono
Yesu Zola Bana Yonso

Kuyidika na ntwala :

[Moniteur, na zulu ya papier, sonika ngolo ti nene sambu bana yonso lenda mona yo :]

Dititi 1—Mama Lea. Na nsi zina na yandi, sonika bazina ya bana na yandi : Rubeni, Simeoni, Levi, Yuda.

Dititi 2—Mama Rashele. Na nsi zina na yandi, sonika kima ntete ve.

Dititi 3—Mama Bila (Sielo ya Mama Rashele). Na nsi zina na yandi, sonika Dani ti Neftali.

Dititi 4—Mama Zilpa (Sielo ya Mama Lea). Na nsi zina na yandi, sonika Gadi ti Asere.

Dititi 5—Papier ndambu fioti : Sonika Isakari ti Zabulone.

Dititi 6—Papier ndambu fioti : Sonika Yozefi.

Kuyantika :

Mama vandaka na divumu, ti Maputi vandaka na kiese na yo ve. Yandi tubaka nde, "Mwana ya nkaka ta kaka natila beto kosalu ya kuluta. Mama ta songa mono kuyobisa bilele na yandi. Mama ta songa mono kunata yandi bisika na bisika. Mama ta yindula kaka yandi. Mono zola ve mwana ya mpa na kati ya fami."

Bana nki beno banza sambu na mabanza ya Maputi? Mwana ya mpa na kati ya fami kele mbote to mbi? *[Moniteur, bana lenda tuba mabanza na bo.]*

Bubuyai, beto ta mona mabanza ya Nzambi sambu na bana. Beto ke landa na Kuyantika kapu 29, nzila ya kutanga 31.

Malongi ya nene na bandambu 5 :

81.1 Nzambi pesaka na Lea bana ya bakala iya (Rubeni, Simeoni, Levi ti Yuda), kansi na Rashele, Nzambi pesaka mwana ve.

Kutanga : Kuyantika 29 : 31-35

31 Mfumu Nzambi monaka nde Yakobi vandaka kuzola Lea mingi ve. Yo yina Yandi pesaka Lea bana, kansi Rashele Yandi vandaka kubuta ve.

32 Lea bakaka divumu, ebuna yandi butaka mwana ya bakala. Yandi pesaka yandi zina Rubeni sambu yandi tubaka nde : « Mfumu Nzambi me mona mpasi na mono, ntangu yai

bakala na mono ta zolaka mono. »

33 Yandi bakaka diaka divumu, yandi butaka mwana ya nkaka ya bakala. Yandi pesaka yandi zina Simeoni sambu yandi tubaka nde : « Mfumu Nzambi me pesa mono mwana yai diaka sambu Yandi waka nde Yakobi vandaka kuzola mono ve. »

34 Lea bakaka diaka divumu, yandi butaka mwana ya nkaka ya bakala. Yandi pesaka yandi zina «Levi sambu yandi tubaka nde : « Ntangu yai Yakobi ta kangama na mono sambu mono me butila yandi bana tatu ya babakala.

35 Yandi pesaka yandi zina Yuda sambu yandi tubaka nde : « Mbala yai mono ke kumisa Mfumu Nzambi. » Ebuna Lea butaka diaka ve.

Kuyula bana :

- Sambu na nki Nzambi kangulaka divumu ya Lea ntete ?
(Sambu Nzambi monaka nde Yakobi zolaka yandi mingi ve.)
- Nki zina ya mwana ya ntete ya butamaka na kati ya fami?
(Rubeni. Yandi mbuta ya fami ya Yakobi.)
- Nki bazina ya bana tatu ya landaka Yakobi?
(Simeoni, Levi ti Yuda.)

NB: Kutangila bana ya me yela:

Na nima, Nzambi solaka fami ya Levi kusala kusalu ya banganga-Nzambi. Yandi solaka fami ya Yuda sambu na kubuta Mesia Yesu Kristo.

Bana sala sambu na kusonga nki me salama :

Bana tanga na misapi na bo bana iya ya Lea, bambuta ya fami ya Yakobi : Rubeni, Simeoni, Levi, ti Yuda.

Songa mwana-nkento mosi kusala bageste bonso Lea. Yandi kwisa na ntwala. Pesa yandi Dititi 1 kusonga.

Kuyimba ti kukina :

Yakobi zolaka Lea mingi ve,
Yo yina, Nzambi pesaka yandi bana.

Lea butaka Rubeni,
Simeoni, Levi, ti Yuda.
Fami ya Yakobi
Kumaka na bana 4.

81.2 Rashele ti Yakobi nwanaka sambu na mambu ya kubuta; yo yina, Rashele pesaka Yakobi muntu ya kusalu na yandi Bila, ebuna yandi butilaka yandi Dani ti Neftali, bana ya bakala.

Sambu na kumona baleso ya nkaka bonso yai ya dibundu na nge lenda sadila, tala site yai :
www.teachingforafrica.com , un site des « Ministères pour Chaque Enfant »

Kutanga : Kuyantika 29 : 30 :1-8

Kuyula bana :

1 *Ntangu Rashele monaka nde yandi ke butila Yakobi bana ve, yandi wilaka mbuta na yandi Lea kimpala. Yandi songaka Yakobi nde : « Pesa mono bana kana ve mono ke fwa.*

2 *Yakobi wilaka Rashele makasi nde: « Keti mono kele Nzambi ? Nzambi Muntu me kangaka nge nzila ya kubuta. »*

3 *Rashele vutulaka nde : « Tala mpika na mono yai Bila. Baka yandi, kwenda kuvanda na yandi sambu yandi butila mono bana. Mono ta baka bana, mpidina sambu na Bila mono ta kuma mama ya bana. »*

4-5 *Yo yina Rashele pesaka mpika na yandi Bila na bakala na yandi Yakobi. Ebuna Bila bakaka divumu, yandi butilaka Yakobi mwana ya bakala.*

6 *Rashele tubaka nde : « Nzambi me nungisa mono, Yandi me ndima bisambu na mono, ebuna yandi me pesa mono mwana ya bakala. » Mpidina yandi pesaka mwana zina Dani.*

7 *Bila bakaka diaka divumu, yandi butilaka Yakobi mwana ya zole ya bakala.*

8 *Rashele nde: «Mono me nwana ngolo na mpangi na mono Lea, mono me nunga. » Yo yina yandi pesaka mwana zina Neftali.*

Bana sala sambu na kusonga nki me salama :

Bana sala bonso bo kele Rashele ti Yakobi ke nwana. [Moniteur tala mbote nde yai vanda kaka geste, ti kunwana ya kieleka ve ya lenda pesa mpasi na muntu.]

Sola mwana-nkento kuvanda Rashele. Yandi kwisa na ntwala. Pesa yandi dititi 2 kusonga na classe.

Rashele sola mwana-nkento kuvanda Bila. Mwana yina kwisa na ntwala. Pesa yandi dititi 3 kusonga na classe. (Bana yai yonso bikala na ntwala ya classe ti Lea.)

Kuyimba ti kukina :

Bila butaka Dani

Ya' butaka Neftali.

Fami ya Yakobi

Kumaka na bana 6.

81.3 Lea pesaka Yakobi muntu ya ksalu na yandi, ebuna bo butaka Gadi ti Asere.

Kutanga : Kuyantika 30 : 9-13

9 *Ntangu Lea monaka nde yandi ke buta diaka ve, yandi bakaka mpika na yandi Zilpa,*

yandi pesaka yandi na Yakobi bonso nkento na yandi.

10 Ebuna Zilpa butilaka Yakobi mwana ya bakala.

11 Lea tubaka nde : « Shanse na mono ! » Yo yina yandi pesaka yandi zina Gadi.

12 Zilpa butilaka Yakobi mwana ya zole ya bakala.

13 Lea nde « Mono kele na kiese mpila ve. Ntangu yai bankento ta bingaka mono Kimona-mbote. » Yandi pesaka mwana zina Asere.

Kuyula bana :

- Sambu na nki Lea pesaka Yakobi mpika na yandi Zilpa ?
(Sambu yandi monaka nde yandi vandaka kubuta diaka ve)
- Zilpa butilaka Yakobi banani?
(Gadi ti Asere, bana ya bakala)

Bana sala sambu na kusonga nki me salama :

Bana sala bageste kusonga kiese ya Lea ntangu bana yai zole me butamaka.

Lea sola mwana-nkento kuvanda Zilpa. Yandi kwisa na ntwala, kutelama ti Lea, Rashele, ti Bila. Pesa yandi dititi 4 kusonga.

Kuyimba ti kukina :

Zilpa butaka Gadi

Ya' butaka mpi Asere.

Fami ya Yakobi

Kumaka na bana 8.

81.4 Rashele ti Lea nwanaka nani ya lala ti Yakobi. Lea futaka Rashele sambu na kuvanda ti Yakobi, ti bo butaka Isakare ti Zabuloni, ti mwana-nkento Dina.

Kutangila bana somere ya baverse yai : Kuyantika 30: 14-21

Bankento ya Yakobi Lea ti Rashele vandaka kaka kunwana sambu na yandi, yandi ta zola nani ya kuluta. Na nsuka ya kunwana mosi, Lea futaka Rashele sambu yandi kulala ti Yakobi na mpimpa yina.

*Tanga vs. 17: Nzambi ndimaka bisambu ya Lea. Lea bakaka divumu, yandi butilaka Yakobi mwana ya tanu ya bakala.**

**Yandi vandaka kutanga kaka bana ya yandi mosi me butila Yakobi. Na nkunga na beto, beto me tanga bana yonso ya bankento iya Lea, Rashele, Bila ti Zilpa me butila yandi.*

18 Lea pesaka yandi zina Isakare sambu yandi tubaka nde : « Nzambi me pesa mono

*matabisi sambu mono pesaka mpika na mono na bakala na mono Yakobi. »***

***Yina vandaka mabanza ya Lea, kansi lukanu ya Nzambi lenda vanda mambu ya nkaka, bonso kaka sambu kukangisa yandi ntima, sambu Yakobi zolaka yandi mingi ve bonso Rashele.*

19 Lea bakaka diaka divumu, yandi butilaka Yakobi mwana ya sambanu ya bakala.

20 Yandi pesaka yandi zina Zabuloni sambu yandi tubaka nde : « Nzambi me pesa mono makabu ya mbote. Ntangu yai bakala na mono ta ndima mono sambu mono me butila yandi bana sambanu ya babakala. »

21 Na nima Lea butaka mwana ya nkento. Yandi pesaka yandi zina Dina.

Kuyula bana :

- Sambu na nki Lea yantikaka kubuta diaka?
(Nzambi kangulaka divumu na yandi diaka.)
- Bazina ya babakala zole ya Lea butaka diaka mbala yai, banani?
(Isakari ti Zabuloni)
- Zina ya mwana nkento Lea butaka nani?
(Dina)

Bana sala sambu na kusonga nki me salama :

Bana sala bageste bonso maboko na bo ke kangula. Bo tuba nde, « Nzambi kangulaka diaka divumu ya Lea. »

Yika Lea dititi 5 kusonga na classe. Yandi simba ti yandi songa matiti zole.

Kuyimba ti kukina :

Lea butaka diaka Isakare
Ya' butaka mpi Zabuloni
Fami ya Yakobi
Kumaka na bana 10.

81.5 Nzambi kangulaka divumu ya Rashele ti pesaka yandi Yosefi, ti yandi kwikilaka Nzambi kuyika yandi diaka mwana-bakala ya nkaka.

Kutanga : Kuyantika 30 : 22-24

22 Ntangu yai Nzambi yindulaka Rashele. Yandi ndimaka bisambu na yandi, yandi pesaka yandi nzila ya kubuta bana.

23-24 Rashele bakaka divumu, ebuna yandi butaka mwana ya bakala, Yandi pesaka yandi zina Yozefi sambu yandi tubaka nde : « Nzambi me katula mono nsoni sambu mono*

*vandaka kubuta ve. » Kana Yandi pesa mono diaka mwana ya nkaka, mbote ! **»*

**NB : Yai vandaka ve Yozefi ya kwelaka Maria, mama ya Yesu. Yozefi yina kwisaka na nima ya bamvula mingi.*

*** Na français yo ke tuba bonso Rashele ke tuba, bika yo kuvanda. Yandi kwikilaka nde Nzambi ta yika yandi diaka mwana ya bakala ya nkaka, ti yo salamaka mpidina na nima ya ntangu. Mwana yina ya Nzambi yikaka na nima, zina na yandi Benyamini (Kuyantika 35 :18).*

Kuyula bana :

- Na nsuka, Nzambi yindulaka mpi Rashele, ti yandi butaka nani? (Yozefi, mwana ya bakala)
- Na kubuta yai, Nzambi pesaka yo bonso mvutu na nki? (Mvutu na bisambu ya Rashele. Bambuka nde ntete, yandi vandaka kuyangisa Yakobi bonso yo vandaka yandi ya me kanga yandi nzila ya kubuta . Yo sadisaka ve. Mbala yai, yandi me samba Nzambi na mambu yina. Yina sadisaka, ti yandi zwaka mwana.)
- Keti Rashele ndimaka nde yina vandaka nsuka ya bana Nzambi ta pesa yandi? (Ikele ve. Yandi kwikilaka nde Nzambi ta yika yandi mwana ya nkaka diaka.)

Bana sala sambu na kusonga nki me salama :

Bo sala bageste bonso bo ke samba Nzambi. Na nima, bo sala bonso bo ke simba mwana na diboko. Bo tuba nde, "Mwana na mono Yozefi, makabu ya Nzambi."

Pesa Rashele dititi 6. Yandi simba ti yandi songa matiti yonso zole.

Kuyimba ti kukina :

Rashele sambaka Nzambi
Ti yandi butaka mwana

Rashele butaka Yosefi.
Ti lombaka Nzambi ya nkaka.
Fami ya Yakobi
Kumaka na bana 11.

Kumanisa :

Nzambi sakumunaka Yakobi na bana ya bakala 11, ti mwana-nkento mpi. Rashele kwikilaka Nzambi sambu na mwana-bakala mosi ya nkaka, yonso 12. Nzambi pesaka yandi mwana yai na nima. Bana 12 yai, ntangu bo yelaka, bo kumaka batata ya makanda 12 ya Israele. Na nima-nima, Nzambi pesaka bo ntoto ya beto ke binga Israele. Nzambi silaka kusakumuna bo, sambu

Sambu na kumona baleso ya nkaka bonso yai ya dibundu na nge lenda sadila, tala site yai :
www.teachingforafrica.com , un site des « Ministères pour Chaque Enfant »

na lukanu na Yandi bo bantu pesaka beto Bible, bo bantu pesaka beto mpi Mesia-Mvulusi Yesu Kristo.

Yo yina, yo kele mfunu nde bakristo bubuyai samba Nzambi sambu na mambote ya Israele. Bo kele na bambeni mingi ke wila bo kimpala, kansi beto samba Nzambi nde Yandi keba Israele, Yandi pesa bo ngemba, Yandi sakumuna bo. *[Moniteur, baka ndambu ntangu sesepiyai sambu bana kusamba nde Nzambi sakumuna Israele.]*

Beto me mona mpi nde yo kele Nzambi ya ke pesa bana. Bana ikele lusakumunu ya nene. Yo mpi kele Yandi ke kanga nzila kubuta ntangu ya nkaka bonso kele lukanu na Yandi.

Devoir sambu na bana me balula ntima na Yesu dezia :

Beno bana ya me tula ntima na Yesu dezia, mono ke pesa beno devoir yai, nde na mposo ke kwisa, beno tula ngolo kuyamba bana na dikanda na nge ti bwala na nge. Nge sosa kuvanda mbote ti bo na mposo yai, mpi kusadisa bamama na bo kana mpila ikele.

Kubinga bana me balula ntima na Yesu ntete ve :

Mbala ya nkaka nge zaba ntete ve nde nge me tula ntima na Yesu. Mpidina nge me kuma mukristo ntete ve. Kana nge ta tula ntima na Yesu, Nzambi ta kitula nge mwana na Yandi bubuyai. Tala, beto me tula bakiti awa. *[Moniteur, songa bana wapi bakiti yina.]* Konso muntu ya zola kutula ntima na Yesu ntangu yai, na nima ya ecodim, beno basika ve, kansi beno kwisa vanda awa na zulu ya bakiti yai. Mono ta kwisa kusadisa beno.

=== Nsuka ya Leso 81

Leso 82. Yakobi sosaka kuwakana ti Ezau diaka.

Kuyantika 32 :4-- 33 :1-17

REVISIO :

Kuyindula diaka leso me luta :

- Na leso me luta, beto monaka nde Yakobi butaka bana ikwa ?
(Bana-bakala 11 ti mwana-nkento mosi. Rashele mpi kwikilaka sambu na mwana-bakala mosi diaka, ti Nzambi pesaka yandi mwana nombre 12 na nima.
- Na nima-nima, Nzambi pesaka bana ya Yakobi nki ntoto ?
(Ntoto ya beto ke binga Israele)
- Sambu na nki Nzambi sakumunaka bantu ya Israele, ti Yandi mpi zola beto kusakumuna bo ?
(Sambu bantu ya Israele, bo bantu pesaka beto Bible, mpi Mesi-Mvulusi Yesu Kristo)
- Bana yonso kele lusakumunu ya nani ?
(Ya Nzambi)

Kulanda devoir ya leso me luta :

Bonso bana kele lusakumunu ya Nzambi, nani me tula ngolo kusala mbote ti bana ya fami ti bwala na yandi na mposo me luta ? Nani ta songa beto nki mutindu yandi salaka yo ?

LESO YA BUBU YAI :

Kikuma ya leso yai :

Na nsuka ya leso yai, bana ta zaba nde, ata kimbeni me kota na bantu, na ngolo ya Nzambi, bo lenda wakana diaka. Yo yina, bana ta yantika kusosa kuwakana na bantu ya bo me nwana ti bo, to na bantu ya bo zola ve.

Verse ya kulonguka :

Kiese na bantu yina ke kotisaka ngemba na kati ya bantu, sambu Nzambi ta binga bo bana na Yandi!

Matayo 5:9

Bankunga ke kwenda nzila mosi ti leso yai :

Beto Zolana

Kudikulumusa na Meso ya Nzambi

O Luvunu Yambula ! (O Kimbeni Yambula)

Sambu na kumona baleso ya nkaka bonso yai ya dibundu na nge lenda sadila, tala site yai :

www.teachingforafrica.com , un site des « Ministères pour Chaque Enfant »

Sika ya Kiese Ke Zulu (Kimbeni ta kota kuna ve)
Zola

Kuyantika :

- Keti kimbeni ikele mambu ya kiese?
(Ikele ve. Mambu ya mawa ti ya mpasi.)
- Kana kimbeni ikele na kati ya bantu zole, yo lenda nata nki mambu ya mbi ti ya mpasi?
(Mawa, makasi, kunwana, kufwa muntu, kuloka muntu.)
- Na nitu ya bantu kimbeni lenda sala nki ?
(Ntu mpasi, divumu mpasi, hypertensio, mpila kulala mpongi ve, etc.)
- Keti beno lenda bambuka kimbeni mosi ya me kota na kati ya fami ya Yakobi?
(Kimbeni na yandi ti mbuta na yandi Ezau)
- Yo kotaka nki mutindu ?
(Yakobi kusaka tata na bo, ebuna yandi yibaka lusakumunu ya mbuta ya fami)
- Kimbeni ya kotaka me nata nki mpasi ya beto me mona dezia ?
(Ezau zolaka kufwa Yakobi, ebuna Yakobi tinaka na mpangi na bo Labani na ntoto ya nkaka.)
- Ntangu yai, Yakobi me sala ntangu ikwa na Arani, ntoto ya Labani ?
(Kuluta Bamvula 14, sambu yandi salaka kusalu bamvula 7 sambu na Lea ti bamvula 7 diaka sambu na Lea.)

Nzambi sakumunaka Yakobi mingi, kansi Ngwasi Labani wilaka yandi kimpala. Yo yina, Yakobi bakaka fami na yandi, ti bo bikisaka Labani. Na bamvula Yakobi vandaka na ntoto ya Labani, Nzambi me kangula meso na yandi. Labani me sala na yandi bonso yandi me sala na Ezau. Yakobi waka mawa mingi. Ntangu yina, yandi bakisaka mbi yandi me sala na mpangi na yandi Ezau. Yandi vandaka na mawa sambu kimbeni me kota na kati na bo. Yandi zolaka kusosa kuwakana. Yo yina yandi kwendaka ntete na ntoto sika fami ya Ezau vandaka kuzinga.

Malongi ya nene na bandambu 9 :

82.1 Yakobi tindaka bantu na kusalu kusonga Ezau nde Yakobi ke kwisa na bambisi mingi, kusosa nde Ezau kuwila yandi mawa.

Kutanga : Kuyantika 32 :4-6

4 Yakobi tindaka bantu na mbuta na yandi Ezau. Ezau vandaka kuzinga na ntoto ya bangumba na nsi ya Edomi.

5 Yandi songaka bo nde : « Beno kwenda kutuba na Ezau mutindu yai : 'Mono mpika na nge Yakobi, mono ke zabisa nge mfumu na mono Ezau nde mono kwendaka kuzinga

bamvula mingi na bwala ya Labani, ntangu yai mono ke kwisa kuvutuka.

*6 Mono ke na bangombe, bampunda, mameme ti bankombo; mono ke na bampika mpi.
Pardo mingi mfumu, mono me tinda nge ndinga na ntwala sambu nge wila mono mawa.*

Kuyula bana :

- Tala mpila Yakobi tubaka na Ezau—na luzitu, to na luzitu ve ?
(Na luziutu yonso, ti na kudikulumuka. Yakobi tubaka nde 'Mono mpika na nge Yakobi.')
- Kana nge vandaka na makambu ti muntu, ti yandi kwisaka kutuba nde, « Mono mpika na nge, » nge ta mona nki mutindu ?
(Kudikulumuka, bonso yandi ke sosa kuyidika makambo.)
- Yakobi tubaka nde yandi sosaka Ezau kusala nki ?
(Kuwila yandi mawa. Yai kele bonso kulomba pardo sambu na mbi yandi me sala.)

Bana sala sambu na kusonga nki me salama :

Bana sala bageste bonso bo ke tinda bandonga na bandonga ya bantu na Ezau, konso ndonga ti makabu ya bambisi : bangombe, bampunda, mameme ti bankombo.

Kuyimba ti kukina :

Izaki tindaka makabu na kuwakana na Ezau.

82.2 Bantu vutulaka ndinga nde Ezau ke kwisa kutana ti yandi na babakala 400.

Kutanga : Kuyantika 32 :7

*7 Ntangu bantu yina ya Yakobi tindaka na Ezau kwisaka kuvutuka, bo songaka Yakobi nde :
« Beto me kwenda kukuta mbuta na nge Ezau na nzila ke kwisa kwaku sambu na kukutana
na nge. Yandi ke kwisa na bantu nkama iya (400).*

Kuyula bana :

- Bantu ya Yakobi vutulaka yandi nki mvutu ?
(Ezau ke kwisa ti babakala 400.)

Bana sala sambu na kusonga nki me salama :

Bana tuba nde, « Ezau ke kwisa na bantu 400 ! »
Bo tanga 'Bantu 100, 200, 300, 400' !

Kuyimba ti kukina :

Nge ke sosa Ezau, Yakobi.
Yandi mpi ke sosa nge.

82.3 Yo yina Yakobi vandaka na boma. Yandi kabisaka bantu ya vandaka ti yandi na bandambu 2 na mpila nde, kana Ezau kunwana ti ndambu mosi, ndambu ya nkaka lenda tina.

Kutanga : Kuyantika 32 : 8-9

8 Boma mingi ti matekita simbaka Yakobi. Yandi kabisaka bantu na yandi ti bambisi na yandi yonso (mameme, bankombo, bangombe ti bashamo) na ndambu zole.

9 Yandi banzaka nde: "Kana Ezau kwisa kunwanisa ndambu ya ntete, mpidina ndambu ya zole lenda tina."

Kuyula bana :

- Rapport ya bantu, yo pesaka Yakobi nki –kikesa, to boma?
(Boma. Yandi yindulaka nde, mbala ya nkaka, Ezau vandaka kukwisa na bantu na yandi bonso basoda sambu na kunwanisa yandi.)

Bana sala sambu na kusonga nki me salama :

Bana sala bageste bonso bo kele na boma mutindu Yakobi vandaka na boma ntangu bo songaka yandi nde Ezau vandaka kukwisa ti bantu 400.

Kuyimba ti kukina :

Ezau ke kwisa na bantu mingi
Boma, boma, boma !

82.4 Yakobi sambaka Nzambi. Na kulumuka yonso, yandi lombaka lusadisu ya Nzambi.

Kutanga : Kuyantika 32 : 10-13

10 Ntangu yai Yakobi sambaka Mfumu Nzambi nde : « Nzambi ya nkaka na mono Abrahami, Nzambi ya tata na mono Izaki, wila mono. Nge Mfumu songaka mono na kuvutuka na ntoto na mono ti na bampangi na mono ; Nge songaka mono mpi nde Nge ta sadisa mono mbote na mambu yonso.

11 Mono muntu na Nge, na kumona mutindu Nge vandaka kutala mono na disu ya mbote ti mutindu Nge lungisaka mambu yonso ya Nge tubaka na mono, mono me fwana na yo ve ata fioti. Mono sabukaka nzadi ya Yordani ; mono vandaka ata kima ve na maboko, kaka nti na mono ya kutambudila. Kansi bubu yai mono ke vutuka na ndonga zole ya bantu.

12 Pardo, gulusa mono na maboko ya mbuta na mono Ezau. Mono ke mona boma sambu yandi ke kwisa kunwanisa beto, sambu na kufwa beto yonso, ti bankento ti bana.

13 Yindula mambu yina ya Nge tubaka na mono nde: 'Mono ta sadisa nge mbote na mambu yonso, Mono ta pesa nge bana mingi na mpila nde bantu ta kuka ve kutanga bo. Bo ta vanda mingi-mingi bonso bambuma ya zelo na lweka ya masa.' "

Kuyula bana :

- Yakobi lombaka Nzambi kusala nki ?
(Kugulusa yandi na maboko ya Ezau)

Kuyula bana ya me yela:

- Sambu na nki nge banza Yakobi bambukisaka Nzambi nde Yandi me sila nde yandi ta vanda na bana mingi-mingi bonso bambuma ya zelo na lweka ya masa ?
(Sambu kana Ezau kufwa fami yonso, nki mutindu Nzambi lenda lungisa nsilulu na Yandi ?)

Bana sala sambu na kusonga nki me salama :

Bana sala bageste bonso bo ke kudikumumusa na ntwala ya Nzambi, ke samba, ke sosa lusadisu na Yandi.

Kuyimba ti kukina :

Na kudikumumuka yonso
Yakobi sosaka Nzambi.

82.5 Yakobi tindaka basielo na yandi na ntwala, konso sielo ti makabu mingi sambu na Ezau.

Kutanga : Kuyantika 32 :14, 21 (Tanga mpi somere ya baverse 15—20)

14 Yakobi lalaka na kisika yina. Na suka yandi solaka bambisi sambu na kupesa kado na mpangi na yandi Ezau.

Tangila bana somere ya ya baverse 15-22 :

Yakobi solaka bambisi mingi mutindu na mutindu, ya nkento ti ya bakala. Yandi kabisaka yo na bandonga, ebuna yandi tindaka bandonga yina mosi-mosi. Bo yonso vandaka kusonga Ezau nde, "Yai makabu ya Yakobi, ti ya nkaka ke kwisa na nima na beto." Awa ndambu ya bandinga Yakobi songaka bo kutuba na Ezau:

21 Beno kuvila ve na kusonga yandi nde : 'Mpika na nge Yakobi ke kwisa kulanda na nima.' » Yakobi banzaka nde makasi ya Ezau ta mana sambu na kado yai ya yandi me tindila yandi na ntwala. Yandi banzaka mpi nde : « Kana beto kutana na yandi, mbala ya nkaka yandi ta wila mono mawa. »

Kuyula bana :

- Yakobi songaka nde yandi vandaka nani sambu na Ezau ?
(Mpika na yandi. Yai mpila ya kudikumumusa na ntwala na yandi.)
- Sambu na nki Yakobi tindilaka Ezau bamakabu mingi ?
(Sambu makasi na yandi kumana, yandi wila bo mawa.)

Bana sala sambu na kusonga nki me salama :

Bana sala bonso bo kele Yakobi, ke pesa basielo makabu sambu na Ezau.

Kuyimba ti kukina :

O, mpangi Ezau, Ezau!
Bika makasi na nge kumana!

82.6 Yakobi nwanaka ti wanzio kusosa lusakumunu ya Nzambi, ye yandi nungaka.

Kutangila bana somere ya baverse yai : Kuyantika 32 :23-33

Yakobi tindaka bankento ti bana na yandi, bo sabukaka nzadi Yaboki na ntwala. Yandi bikalaka na simu mpimpa yina. Na mpimpa yina, wanzio mosi kwisaka kunwana ti yandi. Yakobi zabaka nde kieleka yandi vandaka na mfunu ya lusakumunu ya Nzambi, kana Yandi lenda sadisa nde yandi wakana ti Ezau. Yakobi nwanaka ti wanzio yina mpimpa ya mvimba, ebuna na nsuka yandi nungaka. Nzambi sakumunaka yandi. Yandi ta kwenda kuwakana na Ezau kaka na ngolo na yandi mosi ve, kansi na ngolo ya Nzambi.

Kuyula bana :

- Yakobi nwanaka ti nani ?
(Wanzio ya Nzambi)
- Yandi sosaka nki na Nzambi ?
(Nde Nzambi sakumuna yandi na mambu ya kuwakana ti Ezau)

Bana sala sambu na kusonga nki me salama :

Bana sala bonso bo ke nwana na wanzio. Keba nde bo nwana ve na mpila ya lenda pesa mpasi na bo to na mwana ya nkaka.

Kuyimba ti kukina :

Sakumuna mono
na mambu ya Ezau

82.7 Yandi fukamaka mbala 7 ntangu yandi kumaka penepene na Ezau.

Kutanga : Kuyantika 33 : 1-3

1 Yakobi monaka Ezau ke kwisa na bantu na yandi nkama iya. Ebuna Yakobi bakaka bana na yandi, yandi kabisaka bo. Yandi pesaka bana ya nkaka na Lea, na Rashele ti na bampika zole ya bankento.

2 Na ntwala ya ndonga yandi tulaka bampika yina zole ti bana na bo, kulanda Lea ti bana na yandi. Na nsuka ya ndonga yandi tulaka Rashele ti Yozefi.

3 Yandi mosi Yakobi lutaka na ntwala na bo yonso. Ntangu yai yandi fukamaka ilungi na ntoto mbala nsambwadi tii yandi kwisaka kukuma na kisika yina ya mbuta na yandi Ezau vandaka.

Kuyula bana :

- Yakobi salaka nki kusonga kudikumumusa na ntwala ya mpangi na yandi?
(Yandi fukamaka ilungi na ntoto mbala 7.)

Bana sala sambu na kusonga nki me salama :

Bana fukama mbala 7, ilungi na ntoto, na mpila ya luzitu ti ya kudikumumusa.
Konso mbala bo fukama, bo tuba nde, « Ezau, lolula mono. »

Kuyimba ti kukina :

Mpangi, lolula mono na mbi mono salaka.

82.8 Ezau bakaka ntinu kuyamba yandi. Bo dilaka na kiese, bo pesaka beze, bo wakanaka mbote.

Kutanga : Kuyantika 33 : 4

4 Kansi Ezau vandaka me kwisa ntete ntinu sambu na kukutana na leki na yandi. Yandi yambaka Yakobi, yandi pesaka yandi beze, ebuna bo zole bo yantikaka kudila sambu na kusonga kiese.

Kuyula bana :

- Nki pesaka Yakobi surprise ?
(Mpila Ezau kwisaka, na makasi ve, kansi bonso yandi zolaka mingi kuyamba yandi.)
- Nki bidimbu ya luzolo bo pesaka to salaka ?
(Bo pesaka beze, bo dilaka na kiese.)

Bana sala sambu na kusonga nki me salama :

Bana sala bageste bonso bo ke yamba mpangi na kiese yonso.

Kuyimba ti kukina :

Matondo na Nzambi
Bampangi me wakana.

82.9 Yakobi songaka Ezau fami na yandi, ebuna bo yonso wakanaka mbote.

Kutangila bana somere ya baverse yai : Kuyantika 33 : 5-17

Yakobi songaka Ezau fami na yandi, ti bo yonso fukamaka na ntwala na yandi. Ezau yulaka sambu na bamakabu ya Yakobi tindaka, ti Yakobi tubaka nde yo vandaka sambu Ezau

kuwila yandi mawa.

Kansi Ezau buyaka makabu, sambu Nzambi mpi me sakumuna yandi, yandi vandaka mpi na bima mingi. Yakobi bondilaka Ezau, ebuna na nsuka Ezau bakaka bima yina.

Bana ti bambisi me lembe mingi, yo yina Yakobi lombaka nde Ezau vutuka na bwala na yandi, bo kulanda yandi malembe-malembe. Yo yina, bo wakanaka mbote, ti Yakobi kwisaka na bwala ya Ezau na kiese ti na ngemba.

Kuyula bana :

- Nzambi sadisaka Yakobi nki mutindu ?
(Yandi pesaka Ezau ntima ya kuyamba yandi ti kulolula yandi.)

Bana sala sambu na kusonga nki me salama :

Bana sala bageste bonso fami ya Yakobi ke fukama na ntwala ya Ezau.

Kuyimba ti kukina :

Matondo na Nzambi
Bampangi me wakana.

Kumanisa :

Ata Yakobi me sala mbuta na yandi Ezau mbi mingi, ntangu yai, bo wakanaka mbote. Ntete, Yakobi sosaka kuwakana. Ya zole, yandi sosaka lusadisu ya Nzambi na mambu yina. Ya tatu, bonso yandi me yiba Ezau na bilumbu ya ntama, yandi kwisaka na bamakabu mingi ya mbote, bonso kuvutula Ezau bima yandi me yiba. Ya iya, yandi kwisaka na mpeve mosi ya kudikulumuka sambu na kulomba mawa.

Na nsuka, Nzambi sadisaka. Ezau yambaka yandi na kiese yonso. Kiese mingi sambu bampangi me wakana!

Kana nge me kabana na mpangi to na nduku, nge mpi lenda sosa kuwakana na lusadisu ya Nzambi. Kuwakana ya bampangi ke pesa Nzambi kiese.

Devoir sambu na bana me balula ntima na Yesu dezia :

Beno bana ya me yamba dezia Yesu Kristo bonso Mvulusi ya beno, devoir mono ke pesa beno, yo yai : Na mposo yai, tula ngolo kunwana ve. Kana nge zaba nde dezia nge me nwana ti muntu, kana nge me wakana ve ti yandi, sosa mpila ya kuwakana. Landa mbandu ya Yakobi. Na mposo ke kwisa, mono ta pesa beno ntangu kusonga beto nki Nzambi me sala sambu na nge.

Kubinga bana me balula ntima na Yesu ntete ve :

Kukabana na bantu kele mbi, kansi kukabana ya nene-nene ikele kukabana ti Nzambi. Bible ke songa nde beto me butuka bantu ya mbi, bambeni ya Nzambi. Tii ntangu ya beto balula ntima na Yesu Kristo, beto me kabana ti Nzambi.

Yesu Kristo, Mwana ya Nzambi, kufwaka na zulu ya kulunsi sambu na kukatula kimbeni yina. Kaka na minute ya muntu balula ntima na Yesu, yandi me wakana ti Nzambi. Kana nge me tula ntima na Yesu ntete ve, keti nge ta sala yo bubuyai ?

Kana nge zola tula ntima na Yesu bubuyai, na nima ya ecodim, nge basika ve, kansi kaka kwisa kuvanda awa, sambu beto sadisa nge. *[Moniteur, songa sika ya bo ta vanda sambu na kusosa lusadisu.]*

=== NSUKA YA LESO 82

Leso 83. Yakobi twadisaka fami na yandi kuzika biteki, kusamba Nzambi kaka ; Nzambi pesaka yandi zina ya mpa Israele.

Kuyantika 35 :1-20, 27-29

REVISIO :

Kuyindula diaka leso me luta :

Na mposo me luta, beto monaka nde bampangi zole me wakana na nima bo me zinga na kimbeni bamvula mingi. Bo vandaka banani ? (Ee, Yakobi ti Ezau.) Na kati na bo zole, nani sosaka kuwakana ntete ? (Ee, Yakobi, muntu ya me sala mbi na mpangi na yandi Ezau.)

Kulanda devoir ya leso me luta :

Na mposo me luta, beto pesaka beno bakristo devoir nde beno kunwana ve na mposo yai. Nani lenda tuba nde yandi me nwana ve mposo ya mvimba ? Mbote mingi. Felisatio na beno.

Beto lombaka beno mpi, kana kimbeni to kukabana me kota dezia, kusosa mpila ya kuwakana diaka. Nani lenda songa beno mpila yandi me wakana ti muntu ya nkaka na mposo yai ? Benolanda kaka kusosa kuwakana na kati ya bantu.

LESO YA BUBU YAI :

Kikuma :

Na nsuka ya leso yai, bana ta bakisa nde Nzambi zola bantu na Yandi kubuya biteki, kusamba Yandi kaka. Yo yina, bo ta buya konso makambo ya biteki to ya banzambi ya nkaka, bo ta samba Nzambi kaka.

Verse ya kulonguka :

*Mono muntu kele Mfumu Nzambi, yo yina zina na Mono !
Lukumu na Mono, Mono ta pesa yo ve na nzambi ya nkaka,
ata na biteki mpi ve !
Yezaya 42 :8*

Bankunga ke kwenda nzila mosi ti leso yai :

Banzambi ya nkaka
Lomba na Nzambi Kaka
Mfumu ya Bamfumu Yonso
Nkembo, Nkembo
Nzambi Ikele Nene
Vutuka, Afrika ! Vutuka !
Zitisa Zina ya Yesu

Kuyantika :

Ntangu Matani kwendaka na cité, yandi tambulaka na taxi. Na dibaya ya vandaka na ntwala ya taxi, yandi monaka kulunsi. Yandi vandaka na yo kiese. Yandi yindulaka nde, "Muntu ya ke nata taxi yai, mbala ya nkaka yandi kele mukristo." Kansi na nima, yandi monaka mpi kiteki mosi ya fioti. Nki mutindu ? Kulunsi ya Yesu ti kiteki, yonso zole sika mosi ?

Matani yulaka muntu ya nataka taxi, « Sambu na nki nge ke na kulunsi ya Yesu, kansi kaka penepene na yo, nge kele na kiteki ? Nki mutindu ? »

Muntu ya nataka taxi zabaka ve nki kutuba. "Kana Yesu kele kieleka, mono me tula kulunsi, kana kiteki kele kieleka, mono me tula yo mpi," yandi tubaka.

Nki kele mabanza ya Nzambi na mambu ya biteki ? Beto me mona dezia na verse ya beto ya kulunguka, nde Nzambi ta pesa lukumu na Yandi ve na biteki to na banzambi ya nkaka. Na lesu na beto bubuyai mpi, beto ta mona nki Yakobi salaka ntangu yandi bakisaka nde bantu na fami na yandi vandaka kusamba Nzambi ti biteki kaka mbala mosi. Kuyantika kapu 35, nzila ya kutanga, nzila ya ntete (Kuyantika 35 :1).

Malongi ya nene na bandambu 6 :

83.1 Nzambi lombaka Yakobi kutunga mesa-kimenga kusamba Yandi ; yo yina, Yakobi songaka fami yonso kukatula biteki na bo.

Kutanga : Kuyantika 35 :1-3

1 Nzambi tubaka na Yakobi nde : « Nge yilama, kwenda na bwala Betele, kisika nge ta zingaka. Nge tunga mesa-kimenga na kisika yina ya Mono monikaka na nge ntangu nge vandaka kutina mbuta na nge Ezau.

2 Ntangu yai Yakobi songaka fami na yandi ti bantu yonso vandaka na yandi nde : « Beno katula banzambi ya biteki yina kele na kati na beno, beno katula mambu yonso ya mbi na ntima na beno, beno lwata bilele ya nkaka.

3 Beto ke katuka awa, beto ke kwenda na bwala Betele, kisika ya mono ta tunga mesa-kimenga sambu na kusambaka Nzambi. Yandi muntu sadisaka mono na ntangu ya mpasi, Yandi mpi vandaka na mono bisika yonso ya mono vandaka kwenda. »

Kuyula bana :

- Nzambi lombaka Yakobi kusala nki na Betele ?
(Kutunga mesa-kimenga sambu na kusamba Nzambi)
- Nki mutindu Yakobi songaka fami na yandi kuyilama sambu na kusamba Nzambi?
(Katula biteka na kati na bo, katula mbi na kati na bo, lwata bilele ya nkaka.)

- Tala verse ya beto ke longuka bubuyai (Yezaya 42:8). Sambu na nki beto lenda samba Nzambi ti biteki mpi?
(Sambu Nzambi ta pesa lukumu na Yandi na biteki ve ata fioti.)

Bana sala sambu na kusonga nki me salama :

Bana sala bageste bonso bo kele Yakobi ke songa fami yonso nde bo fweti katula biteki na bo sambu na kusamba Nzambi kaka.

Kuyimba ti kukina :

Yimba nkunga: Banzambi ya Nkaka

83.2 Fami pesaka Yakobi biteki na bo yonso, ebuna yandi zikaka yo yonso.

Kutanga : Kuyantika 35 :4

4 Ebuna bo pesaka Yakobi banzambi yonso ya biteki ya bo vandaka na yo ; bo pesaka mpi bima-makutu ya bo vandaka kulwata. Yakobi zikaka yo na nsi ya nti mosi ya nene yina vandaka penepene na bwala Sikemi.

Kuyula bana :

- Na nima bo yonso me pesa Yakobi biteki na bo, yandi salaka na yo nki?
(Yandi zikaka yo na nsi ya nti mosi ya nene.)

Kuyula bana ya me yela:

- Na kati ya Bible beto ke mona bima ya nkaka beto lenda sala ti biteki.
Tanga baverse yai ti songa nki bantu salaka na biteki ti bima ya magi ti kindoki. Bisalu 19:19; 2 Bansangu 34:4.
- Kana beto kele na biteki, Nzambi ta zola beto kusala nki ti yo?
(Kuyoka yo tiya, kuzika yo, kuzenga yo bitini, etc. Kubebisa yo na mpila nde yo benda beto diaka ve, muntu ya nkaka mpi lenda sambila yo diaka ve.)

Bana sala sambu na kusonga nki me salama :

Bana sala bageste bonso bo ke sosa biteki ya me bumbana, ke nata yo na Yozefi. Na nima, bo sala bonso bo ke sadisa yandi kutimuna dibulu ya nene, bonso bo ke losa biteki na kati.

Kuyimba ti kukina :

Bana yimba diaka: "Banzambi ya Nkaka"

83.3 Boma simbaka bantu ya nsi yina, yo yina bo bikaka fami ya Yakobi na ngemba.

Kutanga : Kuyantika 35 :5

5 Ntangu Yakobi ti bana na yandi yantikaka kwenda, boma mingi simbaka bantu ya babwala yina vandaka penepene, ebuna bo monaka mpila ya kulanda bo ve.

Kuyula bana :

- Na nima fami ya Yakobi losaka biteki na bo, Nzambi sadisaka bo nki mutindu ? (Yandi pesaka bantu ya babwala boma na bo, ebuna bo landaka bo ve bonso kunwana ti bo, to kukanga bo nzila kutambula na nzila. Bo bikisaka fami ya Yakobi na ngemba.)

Bana sala sambu na kusonga nki me salama :

Zenga bana na bandambu tatu. Ndambu mosi vanda fami ya Yakobi, bandambu zole ya nkaka vanda bana ya babwala penepene na bo. Fami ya Yakobi tambula sambu bo ke kwenda na Betele kutunga mesa-kimenga kusamba Nzambi. Bana ya nkaka ya babwala, boma kusimba bo, bo lenda sala kima ve, ebuna fami ya Yakobi luta na ngemba.

Kuyimba ti kukina :

Boma simbaka bantu
Bo pesaka mpasi ve.

83.4 Bo tungaka mesa-kimenga bonso Nzambi me songa bo.

Kutanga : Kuyantika 35 :7

Yandi tungaka mesa-kimenga pana (na Betele, vs. 6), ebuna yandi pesaka kisika yina zina Ele-tele (disongidila nde Nzambi ya Betele), sambu po pana Nzambi monikaka na yandi ntangu yandi vandaka kutina mbuta na yandi Ezau.

Kuyula bana :

- Ntangu bo kumaka na Betele, Yakobi tungaka nki kuna ? (Mesa-kimenga sambu na kusamba Nzambi)

Bana sala sambu na kusonga nki me salama :

Bana yonso sala bageste bonso bo ke sadisa Yakobi kutunga mesa-kimenga.

Kuyimba ti kukina :

Yimba nkunga: "Mfumumu ya Bamfumumu Yonso" to "Zitisa Zina ya Yesu"

83.5 Nzambi monikaka na Yakobi diaka sambu na kusakumuna yandi.

Kutanga : Kuyantika 35 :9-13

9 Ntangu Yakobi kwisaka kuvutuka na nsi ya Mezopotamia ya yandi kwendaka, Nzambi kwisaka kumonika na yandi diaka. Yandi sakumunaka yandi,

10 Yandi pesaka yandi zina ya mpa. Yandi tubaka nde, « Zina na nge vandaka ntete Yakobi, kansi katuka ntangu yai tii kuna zina na nge ta vandaka Israele,

11 Nzambi tubilaka yandi diaka nde : « Mono kele Nzambi-Mpungu. Buta bana mingi. Bana na nge ta vanda mingi, bana ya nkaka ta vanda bamfumu ya nene. Bana na nge ta vanda mingi-mingi, mpidina bo ta kuma makanda mingi ya bantu.

12 Ntoto yai ya Mono pesaka na Abrahama ti Izaki, Mono ke pesa nge yo. Mono ta pesa yo mpi na bana na nge.

13 Ntangu yai Nzambi bikaka Yakobi pana, ebuna Yandi kwendaka.’

Kuyula bana :

- Ntangu bo sambaka Nzambi, Yandi monikaka diaka na Yakobi. Yandi pesaka Yakobi nki ya mpa ?
(Zina ya mpa, Israele)
- Nzambi zolaka Israele kubuta bana mingi to fioti?
(Kubuta bana mingi.)
- Nzambi silaka kupesa nki na yandi ti bana na yandi?
(Ntoto yina, sika bo vandaka.)

Bana sala sambu na kusonga nki me salama :

Bana tuba mbala tatu zina ya mpa Nzambi pesaka Yakobi : **Is-ra-ele, Is-ra-ele, Is-ra-ele.** Na nima, bo songa na lweka na bo yonso ti tuba, Ntoto yai, mono ta pesa yo na bana na nge.

Kuyimba ti kukina :

Yakobi, Mono pesa nge zina yai:
li-i-is-ra-ele!

83.6 Rachel butaka Benjamin, ebuna yandi fwaka, Papa Izaki mpi fwaka.

Kutanga : Kuyantika 35 :16-20; 27-29

16 Yakobi ti bantu na yandi katukaka na kisika yina Betele. Ntangu bo kumaka mwantama fioti na bwala Efrata, Rashele mpasi ya kubuta simbaka yandi. Yandi monaka mpasi mingi.

17 Ntangu mpasi simbaka yandi mingi mpenza, nkento yina ke butisaka tubaka na yandi nde: "Kumona boma ve, yai kele mwana ya nkaka ya bakala."

18 Rashele vandaka penepene na kufwa. Ntangu yandi zolaka kufwa kimakulu, yandi bingaka mwana Bene-Oni, kansi Yakobi pesaka yandi zina Benyamini.

19 *Ntangu Rashele kufwaka, bo zikaka yandi na nzila ya bwala Efrata (ntangu yai bo ke bingaka yo Betelemi).*

20 *Yakobi tedimisaka ditadi na zulu ya maziamu ya Rashele. Ditadi yango kele tii bubu yai. (Yandi zola tuba nde yo vandaka kuna ntangu ya bo sonikaka mukanda yai ya Bible).*

27 *Yakobi kwisaka kukuma na kisika ya tata na yandi na bwala Mamre penepene na bwala Kireati-Arba (ya bo ke bingaka bubu yai Ebroni), kisika ya Abrahami ti Izaki zingaka.*

28 *Izaki vandaka me kuma bamvula nkama mosi makumi nana (180)*

29 *ntangu yandi fwaka. Luzingu na yandi vandaka luzingu mosi ya nda ti ya mbote, ebuna yandi kwendaka kukuta bankaka na yandi yina me fwaka ntete. Bana na yandi Ezau ti Yakobi zikaka yandi.*

Kuyula bana :

- Rashele, nkento ya Yakobi, yandi fwaka na ntangu ya kubuta nani ?
(Benyamini)
- Nani lungisaka bamvula 180 na ntwala yandi kufwaka ?
(Papa Izaki)

Bana sala sambu na kusonga nki me salama :

Bana sala geste bonso bo kele kutimuna maziamu ya Rashele, na nima bo sala bonso bo kele kutimuna maziamu ya Papa Izaki. Bo dila bonso muntu me fwa.

Kuyimba ti kukina :

Mwana ya mpa butamaka
Yandi Benyamini

Bantu zole kufwaka
Rashele ti Papa Izaki.

Kumanisa :

Yakobi bakisaka nde fami na yandi lendaka kusamba ve biteki ti Mfumu Nzambi, yonso zole mbala mosi. Biteki ke nunga ve kubaka bisambu na beto. Biteki, bo gangaka beto ve. Bo ke na ngolo ve kusadisa beto. Kiese mingi nde fami ya Yakobi katulaka biteki yonso na bo. Yakobi vandaka ntwadisi ya mbote kutwadisa bo na mambu yina. Na nima, bo sambilaka Nzambi na kiese, ti Yandi sadisaka bo.

Devoir sambu na bana me balula ntima na Yesu dezia :

Bantu ya nkaka kele na biteki to bima ya magi bo me bumba kisika na kisika. Bantu ya nkaka me

kwenda kusosa nkisi kusadisa bo kusala mbote na examen, to kukeba nitu na bo, to kubenda muntu ya nkaka kuzola bo. Nzambi buya mambu yina yonso.

Yandi zola nde beto sosa lusadisu na Yandi kaka, mpi beto sambila Yandi kaka. Yandi nunga kubaka bisambu na beto, sambu Yandi gangaka beto. Devoir mono ke pesa beno bakristo, yo yai: Kana nge ke na kima bonso yo, kana yo kele kima ya nge mosi, nge losa yo. Lomba lusadisu ya beto to ya pasteur kana nge ke na yo mfunu. Na nima, samba Nzambi ngolo konso lumbu na mposo yai.

Kubinga bana me balula ntima na Yesu ntete ve :

Kansi mbala ya nkaka, nge me tula ntima na Yesu ntete ve. Yai zola kutuba nde nge me bikala nkwa-masumu, mbeni ya Nzambi, muntu ya mpimpa, mwana ya Satana. Kana nge me balula ntima na Yesu ntete ve, zaba nde Nzambi zola nge. Yandi tindaka Mwana na Yandi Yesu Kristo na ntoto yai sambu Yandi kufwa kufuta mfuka ya masumu ya nge. Yesu fwaka, Yandi mpi telamaka na lufwa.

Nzambi ke benda ntima na nge sambu nge kwisa, nge kuyamba Yesu bubuyai. Kana nge kuwa kubenda mosi na ntima na nge, kubuya ve. Yina kele Mpeve ya Nzambi, ke benda nge kukwisa na Yesu, sambu nge kuma mwana na yandi, mukristo ya kieleka.

Kana na ntima na nge yonso, nge zola balula ntima, bisambu bonso yai lenda sadisa nge:

Tata Nzambi, mono bakisa nde mono kele nkwa-masumu. Mono me sala mambu mingi ya pesaka Nge kiese ve. Kansi bubuyai, mono kwikila Yesu Kristo. Mono lomba Yandi kukwisa kukota ntima ti luzingu na mono sesepiyai. Kitula mono mukristo. Lolula masumu na mono. Pesa mono ngolo kulanda Nge. Merci sambu Nge me kitula mono mwana na Nge sesepi yai. Na zina ya Yesu, Amen!

Kana nge me yamba Yesu Kristo sesepiyai, kwisa songa beto na nima ya ecodim. Beto zola kusambila nge Nzambi, ti beto zola yangalala ti nge.

===NSUKA YA LESO 83

84. REVISIO YA LUZINGU YA YAKOBI

NSAKA YA REVISIO YA BALESO:

Na ntwala ya classe, sonika bazina na bitini ya papier ndambu nene ti ngolo sambu bana lenda mona yo. Sonika bazina yai, konso zina na kitini na yo: Ismaeli, Agare, Izaki, Rashele, Yakobi, Rebeka, Yozefi, Benyamini, Rubeni, Lea, Labani, Ezau.

Nge lenda sadila kol na kutula bitini yina na bisika na bisika na salle de classe, to nge lenda binga bantu 10 sambu na kukwisa na ntwala ya classe, kusimba bitini yina. (To, nge lenda sonika bazina yina na zulu ya dibaya ya craie.)

Kabisa bana na bandambu zole sambu na competitio, ti pesa bo nzila kusola zina sambu na ekipe na bo.

Na nima, nge ta tanga mambu mosi ya ta tadila muntu mosi na kati ya bantu 10 yai. Ekipe ya ntete ta meka kutuba mambu yina kele ya nani. Kana bo nunga, bo baka 100 pwa, ti bo ke na mpila kutuba mambu mosi ya nkaka sambu na muntu yina. Kana bo lenda, ti yo kele kieleka, bo baka 200 pwa ya nkaka, yonso 300 pwa.

Na nima, ekipe ya zole sala tour na bo. Ekipe ya baka pwa ya kuluta, bo ta nunga, ti ekipe ya nkaka fweti pesa bo « Felisitasio, shampio ! »

Kuyula sambu na bantu yina : (Bana lenda tuba bazina yina kuluta mbala mosi.)

- ✓ Mono butaka bana-bakala 13. (Rebeka)
- ✓ Mono mbuta na kati ya bana ya Yakobi. (Rubeni)
- ✓ Mono mbuta ya fami, kansi mono tekaka kimbuta na mono. (Ezau)
- ✓ Mono monaka kimatinu ke katula na ntoto, ke kwenda na zulu. (Yakobi)
- ✓ Mono mwana ya ntete ya Rashele. (Yozefi)
- ✓ Yakobi banzaka nde yandi kwelaka leki na mono, kansi papa pesaka mono na kisika na yandi. (Lea)
- ✓ Bo kulaka mono sambu mono sekaka Izaki. (Ismaeli)
- ✓ Mama Rashele butaka mono, ebuna yandi fwaka. (Benyamini)
- ✓ Mono kusaka papa na mono. (Yakobi)

- ✓ Mono kusaka mpangi na mono Yakobi. (Labani)
- ✓ Mono banzaka nde mwana na mono fweti kufwa na nzala na nseke, kansi wanzio songaka mono masa. (Agare)
- ✓ Mono zingaka tii na bamvula 180. (Izaki)
- ✓ Mono zolaka kufwa leki na mono na makasi. (Ezau)
- ✓ Mono pesaka masa na bashamo ya vizitere. (Rebeka)
- ✓ Mono buyaka kunwanisa banto ya masa. (Izaki)
- ✓ Mono mwana ya Abrahami. (Izaki)
- ✓ Mono ntekolo ya Abrahami. (Yakobi)
- ✓ Mono mbuta na kati ya mapasa. (Ezau)
- ✓ Mono vandaka na meso-kufwa na nsuka ya luzingu na mono. (Izaki)
- ✓ Nzambi pesaka mono zina ya mpa Israele. (Yakobi)
- ✓ Mono bendaka mwana na mono kukusa papa na yandi. (Rebeka)
- ✓ Mono tinaka sambu mbuta zolaka kufwa mono. (Yakobi)
- ✓ Mono twadisaka fami kukatula biteki na bo. (Yakobi)
- ✓ Mono leki ya bana yonso na fami ya Yakobi. (Benyamini)
- ✓ Nkento na mono zolaka Yakobi mingi, kansi mono zolaka Ezau mingi. (Izaki)
- ✓ Mono fikaka maboko ti nkingu na nkanda ya mbisi ntangu mono kwendaka na papa. (Yakobi)
- ✓ Nzambi pesaka mono nzila kubuta mwana ya ntete sambu bakala na mono zolaka mono mingi ve. (Lea)

NSAKA YA REVISIO YA BAVERSE:

Nge tuba diaka baverse yonso ya beto me longuka, mosi-mosi. Na kati ya kutuba, nge bika, ebuna nge songa mwana mosi. Yandi fweti tuba bandinga tatu ya ke landa. Ebuna nge manisa verse. Nge lenda bika kuluta mbala mosi na verse mosi kana nge zola.

KUBAMBUKA DIAKA HISTOIRE YA MUKANDA YA KUYANTIKA TII SIKA YAI :

Mambu ya nene na mukanda ya Kuyantika (na ndonga) :

Songa visuel ya landa dititi yai. Bana songa nki bo me bambuka ya konso evenement. [Moniteur, Histoire yai ta landa diaka na Mukanda ya Kuyantika 5, Luzingu ya Yozefi.]

[Atasio, Moniteur ! KEBA ! Katula ve visuel yai na mukanda, sambu bantu ya nkaka fweti sadila yo diaka na nima ya nge. Nge lenda sala yo fotocopi, to nge lenda sonika bafraz yina nge mosi na papier ya nkaka.]

Nzambi ganga yonso

Masumu

Masa fulusa ntoto

Babel-bantu panzana

Abrahami

Izaki

Yakobi